

Saunoaga Faataupou a Sui Usufono 1961-2011

PALEMENE VIII 1982-1984

Afioga Hon NONUMALO LEULUMOEAGA SOFARA



Itumalo Faaalaalafaga:

Sagaga le Falefa

Filifilia:

13/4/82

Tofia ma Fofoga Fetalai

13/4/82

Faatauto:

13/4/82

Uluai Lauga Faa-Fofoga Fetalai:

13/4/82

Ae ou te le i nofoia le Nofoa e avea ma Fofoga Fetalai, faafetai tele i sui usufono mamalu ona o lenei mamalu tele ua outou faia mo au, o le tuuina mai lea o au i lenei tulaga. Ou te tautino atu i le Fono Aoao o le Pule a le Fofoga Fetalai e faamoemoe lea i le lagolago mai ma le finagalo malilie o sui usufono uma o lenei Fono Aoao. O le a ou taumafai i mea uma ina ia ou maua la outou lagolago mai ma lo outou finagalo malie.

Ou te faasilasila atu i le Fono Aoao ua ou faamoemoe ina ia tuuina atu au nei i le Ao Mamalu o le Malo e tusa ai ma Tulafono Tumau. Ou te faamoemoe o le a matou malaga faatasi ma le na faatuina au ma le na faaluaina faapea foi le tóatele o sui usufono mamalu e mananao ina ia auai faatasi.

Ou te faasilasila atu o le a faataatia ese galuega a le Fono Aoao mo se vaitaimi.

Afioga Hon TOFILAU ETI ALESANA:



Itumalo Faaalaalafaga:

Faasaleleaga Nu.1

Filifilia:

31/12/1982

Tofia ma Palemia:

31/12/1982

Faatauto:

31/12/1982

Uluai Lauga Faa-

Palemia:

31/12/1982

Lau Afioga i le Fofoga Fetalai, le mamalu o le Fono Aoao Faitulafono a Samoa i Sisifo, faavanoa ia o lenei taimi ma ou te faanoi atu ai foi sei ou tuuina atu ai se manatu e tusa o lenei fono a Samoa i Sisifo mo le faamaeaina o le galuega tupito. Ae o savalia lo tatou agai atu e manatunatu ai ma mafaufau ai e le gata i lenei itu o le lalolagi o loo tatou iai ae faapea i le lalolagi atoa o e o loo taua ia te i latou taimi na tuuina mai i le pule tutasi a le Atua soifua sa tatou savali mai ai i le uluai aso o le 1982 sei taunuu mai i lenei aso o le toe aso o lenei lava tausaga.

Lau Afioga i le Fofoga Fetalai, le mamalu o le Fono Aoao Faitulafono a Samoa i Sisifo, le paia taitoatasi o sui o Itumalo Faa-aalaalafaga e a latou le filifiliga na tuuina mai i totonu o lenei Maota Fono ma ua tatou nofoia ai o latou nofoa e avea ai tatou ma sui tatou te faaali le lagona o le lagona lava lea o le tapuaiga ia Samoa atoa i ona vaega faalupelupeina le ee ma le afio o le Ao Mamalu o le Malo o Samoa i Sisifo le susuga ia Malietoa Tanumafili II, le ee ma le afio o Sui o le Fono a Sui Tofia, le paia i Tama a Aiga, Aiga ma a latou tama, e faapea foi i le mamalu tele i le tapuaiga a auuina a le Atua i lea fata faitaulaga ma lea fata faitaulaga Kerisiano o loo avatu ai i luma o le Atua i lea aso ma lea aso le faaalua o le talitonu moni ma le agaga o le faatuatua moni i le pule le vaaia i le mana ma le na vaaia ae malosilona oo mai na te faatinoina ma faataunuuina fuafuaga uma ma manatu o loo tatou taumafai i ai mo le faaleleia o lenei atunuu na tuuina mai o lo tatou tofi mai le Atua tatou te galulue ai ina ia maua lona viiga i ni galuega faatauavaa ua mafai ona tatou faatinoina. E faapea foi i le paia tele i le tapuaiga ia Samoa i lenei taeao.

Lau Afioga i le Fofoga Fetalai, ou te auai faatasi i lau tuleiga poo lau saunoaga ma moomooga ua e tuuina mai. Ou te fia faailoa atu ai i le tulaga aloaia, lau tofa Tupuola ma le mamalu o e sa lagolagoina, ma e sa outou galulue faatasi i lea vaitaimi ua tuanai atu e ui ina puupuu ma saasaa le taimi ae le asa se taimi galue ma ona tiga ma ona faafitauli. Malo galue, malo taumafai, malo taupati, malo faalagolago i le pule tonu a lo tatou Matai ua na faasinoina ma taitaiina lau tofa ma lau pulega faa-Malo i lea vaitaimi sa outou tulai mai ai.

I lenei lava taeao e tatau foi ona faamalo i le mamalu o Sui aoao o le Fono Faitulafono, a outou afioga i alii faipule, o outou lava o maa na filifilia o e na lautogia i le finagalo o Itumalo Faa-aalaalafaga o Samoa ua mafai ai pea ona tatou sasao faatasi ua mafai ai ona tatou soo aao, soo i saunoaga, soo i fetalaiga i totonu o lenei Maota Fono. Faamalo onosai, faamalo faapalepale, faamalo taumafai, faamalo galue. E ui lava e lei matua leva naua ma e lei atoatoa ona tino se galuega ua tatou faia ae o loo silafia e le Atua mea uma ma lagona uma o loo i ai i o outou finagalo ma o tatou loto.

Ou te momoli atu foi le faafetai tele i le Ao Mamalu o le Malo mo lenei avanoa ua tuuina mai e mafai ai ona tauaofia le Fono Aoao Faitulafono i sana tauaofiaga faapitoa e faamutaina ai aloaia la tatou galuega mo lenei tausaga 1982.

I gasologa ma tulaga faa-Palemene, aemaise lava i totonu o le Taupulega, o e ua mafuli atu lo latou lagona, o e ua latou lagolagoina faiga faa-Palemene Faavae o le Malo Tele o Peretania ou te faaalu atu le fiafia ma le lagona faamaualalo i luma o le Atua ona o le avanoa ua mafai ai ona ou tulai atu i totonu o lenei Fale Fono poo totonu o le mamalu o outou sui o loo afifio ma alaala, ma lau Afioga i le Fofoga Fetalai. Faafetai, faamalo.

I lenei lava taimi e tatau ona ou taua i tualumaga ni upu ou te avatu i luma o le mamalu o le Fono Aoao Faitulafono, le itu e uiga i la tatou galuega fai aemaise

foi tualumaga e pei ona o loo tatou faatinoina a o loo tulimatai mai le maimoa ma le tapuaiga ia Samoa i le mamalu tele i ona tulaga faalupelupeina. I le amata mai o la tatou nofoaiga ia Aperila i le tausaga nei, sa feagai lenei lava nofoaiga ma le tele o ni faafitauli. E le gata i faafitauli ua tino mai ma ua faamaonia i le tulaga tau tamaoaiga o Samoa, ae faapea foi ma nisi o faafitauli ona o le eseese o talitonuga ma le eseese o manatu ia te i tatou, o le tautai o upufai o Malo i totonu o le tatou atunuu. Ae faamaonia atili ai le lagona ma le talitonuga o le agaga e tofu lava taimi uma o taumafaiga mo le lelei ma ona faafitauli e aliali mai.

Ae o le mea sili lau Afioga i le Fofoga Fetalai, o lo tatou lagona lea ma lo tatou iloa e le o tuulafoaiina i tatou i le aao malosi o loo lilo pea na te taitaiina i le manuia, e le gata i totonu o lenei Maota Fono ae o le tapuaiga ia Samoa Aoa. O le ala foi lea lau Afioga i le Fofoga Fetalai ua mafua ai ona tupu ae se manatu i le Kapeneta ma au nei o loo fai ma Taitaifono i totonu o le Kapeneta ina ia fautuaina le Afioga i le Ao Mamalu o le Malo e taloina lenei Fono faapitoa ona o loo i ai nisi mataupu tau ama le ogaoga lona tatau e ao ona faamaeaina. E ui lava ua toetoe o se aga tatou taunuu atu i le tapunia o lenei Maota Fono ma lona tolopina aemaise lenei tausaga ua toe o ni nai itula tatou taunuu atu i lona faaiuina manuia.

Lau Afioga i le Fofoga Fetalai, e pei lava ona silafia i totonu o aiaiga aemaise faatonuga e faapea foi ma upu tuu ua taoto i totonu o lo tatou Faavae e ao i lenei Fono Aoa Fautulafono ona faia sana faaiuga faapitoa ina ia faaalua ai le finagalo e toe tolopo atu i tua la tatou galuega mo le Tala Faatatau o le Tupe. Talu ai ona o le taimi ma le gasologa o loo tatou o i ai ua fetinaina ai tatou i le tele o tiute tauave ma le tele o matata e ao ona faataunuuina. O lea ua i ai le taofi e ao ona fai se faaiuga a lenei Maota Fono mo le toe tolopoian i tua poo le toe tuuina atu i tua o la tatou galuega tau tupe ma le fuafuaina o Tupe Maua ma Tupe Faaalu a le tatou Malo mo le tausaga 1983.

I lenei lava taimi lau Afioga i le Fofoga Fetalai, ou te talitonu o loo ia te oe poo lau Afioga le tomai ma le silafia e faatonu mai ai ma faasilasila mai ai i le mamalu o lenei Maota Fono le tulaga e ao ona tatou taunuu i ai e tusa ma tulaga aiaia i totonu o loo tatou Faavae, le Tulafono Tumau a lenei Maota Fono. O le mea lea a talafeagai ma tusa ai ma lou finagalo lau Afioga i le Fofoga Fetalai, ou te faatu atu se manatu, o le a le tofa i lau Afioga, e atoatoa ma lelei ma matagofie foi ma saafia pe afai a o lei oo atu i le tele o galuega ua fuafuaina mo le aso ma le lumanai aemaise lea tausaga o loo tatou vaavaai au nei i ai pei o se ata lona faatinoina. Ou te faatu atu ai se manatu o le a lou finagalo tau lava ina tuuina mai se fesili aloaia i lenei Maota Fono e faamaonia ai le filifilia o au e faapea foi le Kapeneta ua ou filifilia latou te faafouina la outou galuega ma le faatautaiga o le vaa o Samoa i lenei tausaga 1982 i ona itula o totoe aemaise le lumanai sei taunuu atu i le 1985 o le taimi o loo faataoto ma aiaia i totonu o le tatou

Faavae e toe faataapeina ai le Fono Aoa Fautulafono ma tatou alo atu i se isi faiga palota.

Lau Afioga i le Fofoga Fetalai, o le manatu lea ia te au ae o le a taatia atu i lau faasilasilaga ma le tofa ua lava tapenaina lau Afioga mo itu faapenei. Ia manuia le Fono Aoa Fautulafono.

Afioga ALIIMALEMANU SASA



Itumalo Faaalaalafaga:

Alataua Sisifo

Filifilia:

11 Mati 1982

Faatauto:

13 Aperila 1982

Lauga Faataupou:

3 Mati 1983

Lau Afioga i le Fofoga Fetalai faapea le Afioga i le Palemia ma le mamalu i le Kapeneta, ou te faatalofa atu foi i le faafofogaaga a le atunuu aemaise le tapuaiga a lo'u itumalo o le Alataua Sisifo.

O le Tala o le Tupe lenei ua taatia mai i lumamea, ou te iloa e tasi lenei Tala o le Tupe ua leva ona faatalitali i ai le mamalu o le atunuu ona o se uluai Tala o le Tupe foi lea a se Faigamalo fou ma se faiga-Vaega Faaupufai foi lea e pei ona lausilafia. Ua te masalo po o ua lata nei i le 4 tausaga talu ona faatuina lea itu e taua o le HRPP - Pati e Puipuaia Aia Tatau a Tagata.

O le Tala o le Tupe foi po o fuafuaga faataatia ua leva ona faatalitali i ai nisi ona sa alalaga foi nisi e toatele o le atunuu, o le a maua ai se faaolataga. O lenei la ua taatia mai nei iu lumamea ma ua lausilafia foi e le mamalu o le atunuu ma le faafofogaaga a Samoa tulaga e pei ona laualuina e le Afioga a le alii Palemia i le taimi ua fano. O le faanoanoaga a lou nei Sui ona le tulai mai o fuafuaga e faatonutonuina ai le tamaoaiga o Samoa, ua le o talafeagai lea ma fuafuaga ma saunoaga sa tulai mai i aso ua mavae. Afai tatou te tagai i faamaumauga o fonotaga a le Maota nei, o lo o tele lava ni mea o lo o aumai ai i totonu o le Tala o le Tupe sa matua tetee i ai le tele o ni sui i totonu o le Maota. E le gata foi i saunoaga i totonu o lenei Maota, a o faasalalaga foi e le gata i nusipepa po o nusipepa lava foi a lenei itu faa-pati, ia a e faapena foi i nisi o saunoaga lava i nofoaga faalauaitete.

O le faanoanoa la o lou nei Sui pe ai se a na tetee ai i aso ua mavae a o lenei ua tulai mai e tele ina leai ni mea fou o tulai mai i totonu o le Tala o le Tupe. Pau lava le mea e tulaga ese ai, ona o le tele o ni faiga fou i le sailiga o le seleni mo le taumafaiga o le Malo o Samoa. O se taimi la mulimuli ou te tautala ai i le aoga po o le le aoga, o le faiga faatonutonu e pei ona taua, a e o le atugaluega o lenei tagata i lenei taimi i lau fua faatatau atu pe a faatatau i nei saunoaga, e tatau lava ona le talia lenei Tala o le Tupe, aua e ala ona faapena ia lau tala pe a fua i saunoaga ua mavae, fua tau i le mea ua tulai mai ai le Tala o le Tupe. Sa i ai le vaitaimi na fai ai le faapau

le aoga o le Tala, tele e na saunoa i totonu o le Maota leni e tetee. Sa i ai le taim sa faapea o le a sii le tiute sa tetee foi nisi faasolosolo lava i mea uma faapena. O leni la ua tulai mai ia pei e foliga mai i lou nei tagata ua ese taimi ua mavae ese le mea lea ua tulaga mai nei.

O se tasi o mea malosi lava sa faaaogaina i le tiami ua tuanai atu e avea ma faatosina i faiga faapolokiki, o le upu lea o el tau o le soifuaga ma e le o po se lilo i le atunuu ma lana faafofogaaga, o le faiga-Malo ua tulai mai nei o le faiga-Malo sa tulai mai, masalo o le mea pito sili lea na malosi na aveina mo le tulai mai o le faiga-Malo, o le aveina lea o le tau o le soifuaga. O lea la ua tulai mai e le i i ai ni folafolaga faapea e faatali le tau o le soifuaga e pau i le tausaga fou, po o le isi tausaga leai o le faaupuga i ai, a tulai mai ua pau le tau o le soifuaga lea ua taatia le Tala o le Tupe, ua lausilafia sii le tiute i le CDV i le CIF, sii le tiute faaopoopo sii pili o tamaiti aoga, faaitiitia le aoga o le tupe. E pei e le talafeagai lou nei tagata aua e foliga mai e ese le taumafai o faapau le tau o el soifuaga i le taimi nei, ese ia tulaga ia ua tulai mai ai. I fuainumera faamaumauina pe a taumafai nei e faatusatusa tulaga. O tau o le a i ai nei o le tau o le patuamoa e pei ona ou taua i el taimi ua mavae ia Fepuari i le tausaga lea e 1982, tau o el patuamoa ia e i ai lisiti ia e tusa e 50 sene i le pauna mai le oloa siiatoa i le po o le vaiaso na tea nei, po o le vaisao i ona tua atu sa faatauina ai le patuamoa i le 62 sene i le pauna, fuafuaga ma faatatauga pe a fai nei e pasia nei le Tulafono nei o le Tiute pei ona faataatia, e ono oo atu foi i le 80 sene po o le sili atu foi i le tau o le a i ai le patuamoa. O le tau o le taga suka sa i ai ia Fepuari i le tausaga talu ai 1982 e \$23.03 sa maua talu ai nei i le \$28.20. E talitonu a fai e maea ona pasia ia leni Tulafono, e ono oo atu i le sili ma le \$30.00 i le taga. O lea foi e lausilafia e le atunuu faaeleleaga a le atunuu i le maketi, sa maua aufai lapopoa i le tausaga na tea nei i le....

O le tau lea na ou taua e aafia uma ai le mea lea e taua e le na o se tiute a e o le afaina o tau i mea uma lava e pei ona taua. O lo o i ai le faaitiitiga e sao ai lava le saunoaga a tuufaatasia uma mea pei o lea e ala ai ona maua atu lau fuainumera.

Lau Afioga le Fofoga Fetalai, muamua e fia faamanino atu lau tautalaga muamua, sa ou tautala i le aofaiga, ou te le i tautala i le CIF po o le CDV a e lavea ai ma le 'primage' lea. E le gata la i lena, o lena e faapau i lalo le pasese a e o la lava e sii le CIF ma le CDV toe faaopoopo ma le 'primage' faaopoopo me le 'devaluation' lea na ou lisiina atu i le amataga mea ia e ou te tautala ai, ou te lei tautala na o le CIF ma le CDV. Ona ou te faaeteete tele e fia manaomia sina taimi lau Afioga.

o faamaumauga foi o tau o taavale aemaise o taavale laiti ia o pick-up, pei ua ou aumaia na faaitaiga ona o taavale na e aoga tele mo faatoaga numera a le ali Minisita a e o faiga lava na aua e eseese lava tau a kamupani ma mea faapena. I lau suesuega o le pick-up pe o le \$9,000 o le a oo atu i le \$12,000. O le uiga la o

lau faamatalaga na ou amata atu i le tau o le soifuaga sa avea ma faatosina a e o lea ua tulai mai le Malo ua le talafeagai le TALA o le Tupe, o le uiga lena o lau tala, ua le talafeagai le aumaiga o le Tala Faatatau ma le fuafuaga sa i ai le itu tau tupe.

Faafetai lav ai lau Afioga. E na ona ou fia faamanatu atu, sa ou taua muamua ou te tautala mulimuli i se taimi ona ou tilotilo lea i le Tala o le Tupe i le lelei ma le leaga. O lea ou te fai atu nei o le faatusatusaga ma folafolaga ma le mea ua tulai mai ai le Tala o le Tupe, e lei fai atu lava sau tala pe ou te tetee pe ou te le teena e oo mai i le taimi nei.

O fuafuaga tau le tamaoiga e pe oan faataatia mai nei i le Tala o le Tupe, ou te talitonu ua tele le mafatiaga o le atunuu o le a maua mai ai, e tele le anoanoai o alagatupe a le Malo o le a amoina e le atunuu, tele le siitaga o el soifuaga a e o leni o le a tau taofiofi totogi, faaitiitia le aufaigaluega, e le gata i le aufaigaluega a le Malo a e ou te talitonu e tele ai foi ma le aafi ao kamupani. o le tulaga lea ua i ai nei Samoa, o se mea o lo o aafia um aia atunuu laiti tau atiae, aemaise lava atunuu e le o taugata le soifuaga, tele oloa e auina mai, itiiti oloa e auina atu, nofo aitalafu i fafo e tutusa uma lava le tele o faafitauli, e le o se mea e fua tasi ia Samoa. O fofu la o le faafitauli lea na tuuina mai nei, o le fofu o se mea sa fuafuaina mai fafo o le IMF. O se fofu foi ou te taua....

Sa ou taua e faapea, "le tele o atunuu" a e ou te lei taua po o ai le atunuu o lo o aafia ai.

Pei la ona ou taua muamua le tele o fofu po o faafitauli nei o lo o tuuina mai i le Faalapotopoto lea o le laoloagi e taua o IMF, ou te taua foi la fuafuaga ma faatatauga pei ona taua o lo o aumai fuafuaga faatatau aua o faafitauli e valatalata o latou uiga ilea atunuu ma lea atunuu, e faapena foi ona tuu atu i ai fautauga i lea atunuu ma lea atunuu ina ia fuafua faatatau i ai a latou togafitiga pe o le fofoina o le faafitauli. Ona sa i ai nisi o felafolafoaiga i totonu o le Maota nei e uiga i le Mataupu lea o le IMF aemaise foi lo latou savali mai i le tausaga ua tuanai. O lea o le a ou faia ai sina faamatalaga laitiiti e uiga i le itu lea.

E papale atu la matou faiga-Malo i le tausaga lea na tea nei ua foi mai le malaga a le Minisita o Tupe i le vaitaimi lea mai i Kanata, sa feutagai ai la ma le IMF. Atonu foi o ia feutanaiga na iu ina faataunuina ai i el sau o se savali ma e oo mai le savali lena ua matou nofoia le nofoa. Na fai la latou Lipoti tuuina mai ia latou fautuaga sa faapena ona feutagai ma o mea uma lava ia o lo o sau i totonu o le Tala o le Tupe e uiga i le faatonotonuina o el tamaoiga sa aafia uma ai i totonu o le Lipoti ma isi foi o nisi o mea, aua o lo o tau mai e latou mea e aupito sili ona manaomia a e ou te talitonu o le Tala o le Tupe lea ua tulai mai e fai sina sili atu mea ia e aumai ai nai lo le vaega pito i maulalo lea sa manaomia. E fia faamalalama atu o lau Tala o le Tupe lea sa fai e le tatau ona iloa e se isi aua e lei taliaina e le Palemene lona aumaiga, a e o lea ou te vaai atu o lea ua tele Sui ia e i ai.

Saunoaga Faataupou a Sui Usufono 1961-2011

Ua ou maua atu o lo o e saunoa faapea e tulai atu e toe amata le saunoaga. O lona uiga ea toe 30 minute lou taimi?

Sa ou tuua lau faamatalaga i le malaga mai lea o le IMF ma fai feutanaiga. O le packaga atoa lenei sa tuuina mai i le taimi lena. Ona fai lea o feutanaiga sa faapea lava ua oo i se taimi ua taliaina le aveeseina o se 'front'. O le 'devaluation' sa talanoaina i le matou fonotaga mulimuli, o au nei ma sui o le Ofisa faapea foi ma sui o le IMF ma sa faalala mai ai le mataupu lea ma o mataupu foi na e faigata oan tusitusia aua e faalilolilo ae peiseai e sili lava ona faaali atu i le Maota ina ia silafia. Sa faaali mai le 'devaluation' ona ou fai atu lea i ai e fai sina mamafa o le avega ma afai la e i ai se fuafuaga e fai le 'devaluation' e le mafai ona faamalieina lou tagata vagana ua mafai ona outou tau maia ia te au le aoga tonu o le 'devaluation' i atunuu na. Ma ou te le talitonu foi i ni faaupuga ia e masani ai e tele oloa e ave i fafo a e laitiiti oloa e aumai i totonu. A e ou te manao ia fai mai se lipoti ma se suesuega faapitoa mo le 5 tausaga e tau mai pe fia popo, pe fia koko o le a le tau o le soifuaga, o a uma mea faapena e ta aofai mai. O le mea lena na tutaia ai loa ma le aumaiaga o le 'devaluation' aua e faigata tele ona mafai e se isi ona tatou iloa atu po fea le tulaga o le a i ai. O iina loan a taatia ai le 'devaluation' ma le faia.

O lau faitioaga autu i le Tala o le Tupe lea ua ou oo atu nei i ai. O le tele o mea ua aumai i le taimi e tasi. O le tele o mea ua tele le mafatiaga o le atunuu o le a i ai.

Lau Afioga i le Fofoga Fetalai, e lei i ai se tusi na ioe ai. E i ai le tusi na ave e faamaonia ai tusitusiga malamalama e lavea uma ai ma le tiute ma mea uma lava. O le faiga lava lena o feutanaiga, a uma onam fai ona fai lea o mea e malamalama ai le isi atunuu po o a mea la e manao mai le isi atunuu, a o le taimi e lei faataatiaina le....

E mafai ona ou lauina atu le amataga o lau tusi.

O le autu o lenei tusi ina ia toto se malamalamaga lauaitale ona lisi ai loa lea.

O fuafuaga a le IMF e pei ona ou taua o le 'package' e mafai lava ona fetuunai, e tuuina atu mea a o le tiute o le taitai o le atunuu o el vaai pe talafeagai lea ma le atunuu, pe talafeagai le avega ua tuuina mai ma fuafuaga e aumai e le IMF. Ia ona faapena lea o feutanaiga ma afai o le a aumai se eseese ma ou te talitonu o le IMF foi e tatau lava ona faapena ona faafaigaofie ona faamalieina aua e faigata ia i latou o lo o aafia ai le soifuaga o tagata o isi atunuu.

O lenei la ua aumai nei le Tala o le Tupe pei ona i ai nei ma ua faaupu o se vailaau faigata ona o le mai tigena. O le fesili la ua tulai mai so o se mai tigena lava ma ua oo i ai se vailaau faigata o le mea muamua lava e tatau ona mautinoa e aoga le vailaau mo le manua. O le fesili la lena o le a ou avatu - Ua lava a outou suesuega ua lava a outou saililiga ua lava a outou talitonuga o le fofu lenei o Samoa? E mafai foi ona ou avatua le tali, o le tali e leai. E ala ona ou afai atu e leai aua e leai se isi na te mea e aumai e le fofu Samoa leaga afai o se mea e te

le mautinoa e le aoga ona fai suesuega ma faataitaiga i le soifua o tagata Samoa.

Faafetai lava i lau Afioga. O le ala o lou fai atu e le mafai ona mautinoa e se isi, aua o mea faapenei e tele tele mea e le o iloa e se isi (unknown) tele mea e fefoifoiai (variables), tele mea e le mautinoa (assumptions) tele vaega mai fafo (external factors) e faigata ai e se isi ona fuafua po o fea tonu lava. Pe fia le aofai o popo, fia le aofai o koko, fia le tau o le soifuaga, fia le tau o le eleni i le tausaga lea o le a sau. O le ala foi la lea so o se atunuu ma so o se faiga-Malo e tatau ona fai fuafua. A sau pe lua ni mea faigata, ia lelei. Aua a tupu ane ni pefea a o la e mafai ona fai.

Lau Afioga ona o lo o e faatagaina pea faauilavea, a o lou talitonuga, e le o talafeagai ma Tulafono Tumau e pei lava foi ona taua muamua. Pe mata la e maua mai sau faatonuga po o se faasilasilaga o le a tuu maia le avanoa ou te faauma atu ai lau aluga ona faatoa toe tu lea i luga o se isi.

O lou nei la Sui lau Afioga i le Fofoga Fetalai o au, ou te piitia se fofu mo Smaoa e mautinoa e manuia ma mautinoa e lelei ai. Afai e mafai ona faamanino mai ma mautinoa mai e se isi le mea e manuia ai....

Ou te iloa ana maua lelei mai lau faamatalaga mai le amataga e ala ai ona ou fai atu, aumai taitasi pe tai lua, aua e lelei mea laiti e mafai ona faatonutonu, a e a oo ina tupu maini pefea i se avega mamafa o le soifuaga o le atunuu lea e aafia.

Pei o le atugaluga lena o lou tagata ona e matuia o lo o fai fuafuaga i luga o tagata soifua. Ia epi a o lau tala faatusa lea ua taua soo, o le fomai ma lana vailaau o le mai. O le fomai la ma lana vailaau, afai o se vailaau e faigata a e manao e faatofotofo e le faaaogaina ni tagata soifua. E ese mea e faaoga. afai e manuia ona faaoga lea i gasegase o tagata soifua.

Faafetai lava i le Sui. Pau lava le mea e lei faatauina maia au mamoe i le tusi lena na fatau mai i le lisiti lea e ia te au ma le faleoloa. O fuafuaga la na ua taua muamua....

O le a taumafai i ai i se tulaga faapena pe afai o le a maua le lisiti.

E pei ona ou taua muamua le mea lea o le (ready made package) ona aumai lea o mea nei faapenei aumai ia tatou ave i isi atunuu vaivai ona uami lea faataitai ai. A e tagai lelei i ai e matua tetee i a atunuu malolosi. O atunuu o Niu Sila o la foi e afaina ma sa fautau foi i ai mea faapena. O le a ou.....

Sa lauga Muldoon i Kanata -"The classic response and once a deal urged on my country by a certain academic economists was to subject New Zealand to the most over. That policy would not have worked for two reasons. The arithmetic was against it." Ia ona alu ai a lea.

O se tasi lenei o tusitusiga pei foi na tuuina mai ma tuuina atu nisi saunoaga i le taimi ua mavae. Peitai o tuutuuga a le IMF e ono mafai ona faigata tele.


Lau Afioga i le Fofoga o le Fono, leai o mea lava foi e tatau ona lau atu mafaufauga o isi tagata aua e le gata o

Minisita o Tupe o Niu Sila, e le gata o le Palemia o Niu Sila a o ia sa taitaifono i le IMF lea e ona mea ia. E faapefea ona taitaifono i le IMF a e fai le packaga a e le talia e lona atunuu?

O le manatu taua ia ave lava le faamuamua i le vaai alofa i le soifuaga o le atunuu. Aua le faamuamua le IMF a ia muamua le soifuaga i le soifuaga o le atunuu. Aua m a ia ola ma soifua lelei tagata ona faapena lea ona faamanuiaina. Aua foi tatou te popole i fesoasoani mai fafo. E le mafai ona le maua fesoasoani mai fafo aua e episeai o siis mea nei e aumai, afai e le faia le mea lea ua leai ni fesoasoani. E i ai lou talitonuga e le mafai ona ola e pei ona i ai i nisi atunuu, aua e faigata tele ona e faamoemoe mai foi atunuu latou ia tatou. E avatu a tatou popo a e aumai taavale. Ia e pei la o lau tautalaga lena. O le mea muamua lava e taua ia te au o le soifuaga o tagata a ua aumai nei le Tala o le Tupe ua tele nisi mea ua faamuamua, o aitalafu, le IMF ma isi mea. Aua a manuia le tagata ma ola fiafia le tagata o le manuia foi lena o le atunuu.

A fuafua i aitalafu o lea foi e tele aitalafu a isi atunuu, e le na o tatou ia e aafia ai. Ona ua puupuu le taimi o le a ou faapea atu ai - Ou te lagolagoina so os e Tala o le Tupe e maua ai se fofu manuia a e ou te tetee i le Tala o le Tupe ona o le tulaga lea e i ai e ono aafia tagata a e tatou te le mautinoa pe faataunuu i fea. O lea ua tatou faalogo nei ua tau mai o la ua amata ona toe tau maua se manuia, o le suauu ua amata ona toe tau pau i lalo le tau, le suauu lea na amata ai faafitauli o le lalolagi lenei. Ua tele tupe ia ua ave e toe faatele ai le fesoasoani i atunuu vaivai. Ai se a ua tatou vavevave ai ma fai nei faiga a e tatou le faatali ua tafa mai ata o manu o se taimi maua so tatou manuia.

Tofa ASIASIAU SAUSOO



Itumalo Faaalaalafaga:

Lotofaga

Filifilia:

11 Mati 1982

Faatauto:

13 Aperila 1982

Lauga Faataupou:

3 Mati 1983

Lau Afioga i le Fofoga Fetalai ma le mamalu o le Palemene o le Malo Samoa i Sisifo, ou te tula'i atu ma le faaaloalo e fia faaalua le manatu e tali atu ai i saunoaga matagofie a le Minisita o Tupe. A'o le'i faaalua so'u taofi, ou te muamua ona ou avatu le faafetai tele i le Minisita o Tupe ona o lana saunoaga ua faafiafia ai lo'u loto.

Ona o le tulaga manuia e faaono foia ai ia faafitauli o loo aafia ai le atunuu i lenei vaitaimi, ou te lagona ai e ao ona ou tuuina atu nai fautuaga agai i le saunoaga a le alii Minisita o Tupe i le itulau e 6. O lana saunoaga o loo faatulai mai ai aiaiga e mafai ona faasaoina ai se vaega-tupe tele i ona vaega e lua. O loo faapea mai - o le

tofiaina o se Komiti taua, o le Komiti Faafautua o le faatumuina o avanoa faigaluega a le Malo. Ma le faaaloalo lava i lau afioga a le Fofoga o le Fono, po o lona uiga ea la e le mafai e le Komisi e pulea tagata Faigaluega a le Malo o loo i ai nei, ona latou faatino ia fuafuaga a le Malo? Aua o le aano o lea fuafuaga o le a faasao ai tupe. Peita'i, o le tofiaina o lea Komiti e tologiina foi latou, pe latou te fautuaina foi le Komisi e faatumu ai ia avanoa ma atili ai ona tele se vaega-tupe e faaaluina.

O la'u fesili la ma le faaaloalo i le Minisita o Tupe, pe le agavaa lea Komisi o i ai nei latou te faafoeina ia fuafuaga a le Malo, ua ala ai ona i ai ia finagalo ina ia faia se isi Komiti fou?

O le vaega e tolu. E faatuputupulaia le faafaigaluega o faiaoga i tama teine e faa-sikolasipi i fafo atoa ma i latou ua i'u i a'oga i Samoa nei. O la'u fesili ma le faaaloalo i le Minisita o A'oga, e le'i tofiaina faiaoga i le aiaiga lea ua tula'i mai. O le a la se faiga e fai ai e le Ofisa o A'oga? O le tofiaina o Faiaoga so o se tasi lava e fia faiaoga, pe masani ma tau i ai e tofia loa e fai ma faiaoga.

O lona fa o vaega. O le faaitiitia lea o le aufaigaluega le tumau i le 10%. Silasila foi lau Afioga a le ofoga o le Fono.....

Lau afioga a le Fofoga Fetalai, ona ua faauilavea mai le Sui lea, ia o tatou uma e fai tioata tai tolu lanu, a e faafetai lava. O lenei tulaga ua aliali mai e matautia e afaina ai le tamaoaga o le atunuu.

Muamua, ole a faaitiitia ai le au faatau, o le a faaitiitia ai le tupe mama a le aufai-pisinisi, o le a vaea ai foi aufaigaluega e Kamupani ma tapunia ai foi fale gaosimea, o le a faaitiitia ai foi mea fai ma nisi lava faafitauli o le a tula'i mai. Ou te taofi ai toatasi, e tatau i le alii Minisita ona silasila ane i ai i ia faafitauli e faaono aliali mai i lenei fuafuaga a le Malo. Silasila lau afioga a le Fofoga o le Fono, o le ala lena e tologi ai e Niu Sila tupe i tagata e leai ni a latou galuega i vaiaso taitasi, o le manatu tele i le tamaoaga. E faapefea ona soifua lenei vaega tele o le atunuu o le a aafia ai i lenei mala o le vaea ma galuega. I le itulau e 14, ole saunoaga a le alii Minisita i lana fesuiaga o le tatou Tālā, i lalo e tusa o le 10%. Lau afioga i le Fofoga o le Fono, e moni lava o taumafaiga uma lava a le Malo e faaleleia uma lava tulaga tau tupe e faaagaga mo fefaatauaiga, ia faifai malie ma ia manatu ifo i le mamalu o le atunuu ua taugata le soifuaga aua o loo fia faaulufale mai i totonu o le atunuu o le a atili ai ona taugata talu ai le pa'ū o le tālā.

O mea taumafa i faleoloa ua tau le maua, ua mafatia si o tatou atunuu. O lea e fia fesili atu ai i le Minisita o Tupe ma le faaaloalo, e ui atu i lau afioga a le Fofoga Fetalai, po o fea e taugofie ma maua gofie ai mea taumafa i totonu o le atunuu? Pe mafai ona fai se tulafono e faasaina ai faleoloa mai lo latou nanaina o oloa, a e tia'i le atunuu lautele?

Lau afioga a le Fofoga Fetalai e i ai le talitonuga o i ai se fesoasoani o maua mai mo Samoa i Sisifo e fesoasoani e

fetaia'i ai le taugata o le suauu mai atunuu. O le faatau mai o suauu aua a faatusatusa i atunuu uma o le lalolagi ona tatou le mafai ai lea ona totogi le tau sa'o o le suauu o loo totogiina mai e isi atunuu. E tatau ai lava ona i ai se vaega-tupe e maua mai i ia atunuu o Arapi. Afai la o loo i ai se fesoasoani faapea tau tupe, ou te talosaga atu i lau afioga a le Fofoga Fetalai i le Minisita o Tupe ina ia tuuina mai i luga o le Laulau-a-Fono se faamalamalama tusitusia e silasila i ai lau afioga ma le mamalu o le Palemene i le aofaiga o ia fesoasoani ma lona faaaogaina faatasi ma se vaega-tupe o loo totoe.

Ma le faaaloalo lava i lau afioga e fia talosaga ai foi i le alii Minisita i se pepa e faamalamalama ai i luma o lau afioga ma le mamalu o le Palemene le aofaiga o fesoasoani (aids) ua aumai mo Samoa i Sisifo, ma atunuu sa aumai ma sa faapefea ona faaaogaina. Aua o fesoasoani (aids) mai atunuu e felanulanua'i, o tupe, mea taumafa, masini o tagata ma taavale. O lona taua tele o nisi fesoasoani mo Samoa i Sisifo e ao foi ona malamalama ai le atunuu o loo faafofoga mai i lona aofa'i ma le faaaogaina.

Ou te fia tautala i le Ofisa o Galuega. Lau afioga a le Fofoga Fetalai e tele se tupe o loo tulai mai mo auala. O le auala i le mafa e ao lava ona fai i ai se fuafuaga a le Minisita o Galuega e faaoga i le toatele o le mamalu o le atunuu atoa foi ma o tatou uso tafafao mai fafo, e ao ai lava ina faia i lenei tausaga. O le tele o maga-auala ua faaleagaina e le aufonotā talu ai lo latou le faia lelei o galuega. E aliali mai le faapito a le alii Minisita o Galuega aua ua faata uma le atu Falealili ma Safata. Po o le a le agasala a le mata-Aleipata, ai o se agasala. Faamolemole, aumai i luma.

Lau afioga a le Fofoga Fetalai o le tele o le atunuu.....

Lau afioga a le Fofoga Fetalai, talu ai ona o lea ua tofia nei le alii, a e afai o i ai nisi mea o la lava e silafia lelei e le atunuu o se isi vaega o tua atu, ma le vaega nei lea ua tula'i mai, ua tatau loa ona fai ma faatino.

Faafetai i le afioga a le alii Minisita o le Tupe i le faauilavea. E aumai lava i le amataga seia oo i le Minisita o tulai mai nei, ua na o se mea pei e faapito, ia faapitoa le tatau ona fai ma ia manuia a e le faapea e faapito tonu i le Minisita lea o loo i ai nei.

Lau afioga a le Fofoga Fetalai, o le tele o le atunuu o loo fia maua sina fasi eleele e faamautu ai ma faa-aoga ai lana fanau. Ou te taofi ai ma le faaaloalo, o gauta o Samoa College po o le TTI o loo i ai se vaega eleele pe tusa o le 20 eka e lē o faaaogaina e le Ofisa o A'oga. Pe le mafai ea ona faamatuu atu mo le atunuu? Afai foi e tali mai le Minisita o A'oga o le eleele lea e faaagaga mo mea tau a'oga, ia tailo, e tatau lava la i eleele ua i ai nei ona aoga mo le isi 300 tausaga, ua tele ia eleele ua faaagaga (reserve) mo le 500 tausaga i le lumana'i, a e faapefea le atunuu i le vaitaimi nei ua nonofo i lalo o laau.

O le femalagaa'iga ou te fia tautala i ai. Lau afioga a le Fofoga Fetalai o tagata tafafao maimoa mai, o se tasi lenei o atiina a'e faamoemoeina i totonu o le tatou

atunuu, e faitau miliona tupe e maua mai ai. A e paga o le fuafuaga a le Malo i le siitaga o le (airport tax) lafoga o le malae vaalele mai le \$5 i le \$20, e faaono manu'a ai le toatele o loo fia tafafao mai ma maimoa i si o tatou atunuu. O lenei tulaga o se mea lelei e pei ona saunoa i ai le alii Minisita, ae pei ou te taofi ma lo'u faaaloalo e mafai lava ona faatino i nisi auala e aunoa ma le iloa ua siitia le (tax) lafoga. Silasila foi lau afioga i le Malo o Niu Sila e i ai foi la latou (airport tax) lafoga o le malae vaalele e maualuga atu i lo tatou, a e leiloa ona e nana i se faiga i totonu o le Tulafono. Ou te talosagaina ai le alii Minisita e toe silasila ifo i ai, pe toe i ai se isi faiga e foia ai lenei tulaga.

Ofisa o le Atiina A'e. I lau afioga a le Fofoga Fetalai ua leva ona pasia le Tulafono e faatosina mai ai pisinisi i totonu o Samoa, o le (Incentive Act) Tulafono o le Faatosina. Ona o le taua tele o le Kamupani I'a mo Samoa, e ao ai lava ona malosi i ai sana fesoasoani e pei lava o le tuai o le fuafuaga a le (Incentive Act) Komiti Faafoe o le Faatosina e ala ai ona faatinoina le Kamupani i ia fuafuaga. Ae silasila foi lau afioga o ituaiga atiina a'e nei e vave ona foia ai le popolega o le Malo i le faaleleia o le tulaga i mea tau tupe. O le tele o tagata o isi Malo o loo latou faagotaina lo tatou ogasami. Ma e ao lava la i le Incentive Board ma le alii Minisita ona faanatinati i a latou faaiuga mo le faatinoina o galuega a Kamupani mo le lelei lautele o Samoa i Sisifo.

Silasila foi lau afioga i Amerika Samoa o lana (main export) oloa autu e faatauina atu i fafo o i'a, ma e faitau miliona ma miliona i le tausaga. Faasa'o mai se upu ua sese. A e pei lava e lua Kamupani I'a ua talosaga mai mo ni fesoasoani a lo tatou Malo e faafaigofie ai ona amata ana galuega. Ou te taofi e le'i i ai foi se faaiuga a le Matagaluega ma Komiti i lau afioga a le alii Minisita. Sei silasila ane i ai i lenei faafitauli e ao ona faasa'oina vave. E le gata la i i'a a e i ai foi isi pisinisi e faaoga ai le vaomatua latou te taina ma fai auala, uafu i nuu eseese e la'u ai le laau.

O ia uafu e faaaogaina e Setima tetele, o le a manuia Malo pe a toe foi i ai tagata. Silasila lau afioga a le Fofoga Fetalai, e manatu atu i le saunoaga a le alii Minisita o Tupe e manaomia vave ni tupe ma ana galuega fai i le eleele-fou. E ao ona faatagaina i ni pisinisi a e maua mai ai se vaega-tupe.....

Lau afioga i le Fofoga Fetalai ou te fia tautala i le itu lea, o a'u nei ma lo'u Sui ou te tuto'atasi, ou te le manatu lava e fai faaituau po o le faapolokiki. O lo'u oo mai i le Fale lenei ou te tuto'atasi, ou te tautala i le amiotonu ma mea e lelei ai le atunuu.

Ua matau atu i le faaituau o Sui o le Palemene i saunoaga a Faipule. O Sui e lagolagoina le Tala o le Tupe, o Sui e tete. O lo'u Sui e tutoatasi e lē mulimuli i ni tulaga femulimulita'i.....

O le faaitaiga la pe afai e maua se avanoa ou te toe saunoa ai, e pei o se au lakapi, a fesili le laufali ona alu lea o le tagata sikalamu i lona itu, a e tatau i sui ona fesili i lona manatu e tusa ma lona lagona i le taitaiina o lana vaega.

O le IMF ou te fia tautala i ai. A o Minisita le afioga a Tofilau i le Tupe i le faiga-Malo a le afioga a Vaai, sa faimalaga ai i Kanata i le fonu a le IMF. Ma sa ia ioe i ni fautuaga a le IMF e tusa ma ni fuafuaga o le tatou tamaoaiaga.....

Faafetai atu i lau afioga a le Fofoga Fetalai, ua aoga foi lo'u saunoa i lea mea ua maua ai le tele o faamalalamalama. A e talu ai ua i ai lo'u lē fiafia i le saunoaga a le alii Palemia ina ua saunoa le alii Palemia nei masalo ai na tuuina mai e Tupuola ia mea. Leai, e leai, ua silafia lelei lava e le alii, e leai se isi o fealua'i i le auala na te le iloa ia mea. O le ala lea ua ou tulai atu ai e faaauau la'u tautalaga.

I le tula'i mai o le Malo o Tupuola, o.....

Lau afioga e moni, o le ala tonu lea.

Ia pe o le a faaiu ea, e toe tasi lava si mea a e a pe a tuu mai sina lua. O le tula'i mai o le Malo o Tupuola na teena ni vaega, e i ai fautuaga na tuuina mai e Tofilau.

Lau afioga i le Fofoga Fetalai, malie ia e pei e ala lava ona soona ou alu atu ina ne'i maimau lo'u taimi a e le'i uma la'u tautalaga lea. A e ui o lea ia e avatu le faafetai e faamalulu atu ai foi i le alii Palemia ma le Kapeneta faapea foi le mamalu o le Palemene o Samoa i Sisifo. Ia soifua ma ia manuia.

Afioga ASI SAGAGA FAAMATALA



Itumalo Faalaalafaga:

Vaimauga Sisifo

Filifilia:

11 Mati 1982

Faatauto:

13 Aperila 1982

Lauga Faataupou:

2 Mati 1983

Lau Afioga i le Fofoga Fetalai, le Afioga i le Palemia, le mamalu i Afioga i Alii Minisita, le paia tele i sui usufono mamalu o le atunuu ma le Palemene o Samoa i Sisifo. Ua talitonu le Vaimauga ua lava paelago paia o Samoa i le tapuaiga a Lana Afioga Mamalu O le Ao o le Malo, le paia i Tama a Aiga, Tumua ma Pule, Ituau ma Alataua, Aiga i le Tai ma le Vaa o Fonoti, le Tapuaiga a Aiga o Nofo, Aiga o Papa, Aiga o Tupu i Faleupolu e fia faapea foi le mamalu ma le paia i le Afaigaluega Paia a le Atua aemaise le paia i le Malo o Amerika Samoa. Ua uma foi ona oo atu se leo o lenei itumalo e pei ona tulei le Afioga i le Patu ma e lagolagoina e lo'u nei tagata itu uma mo le atinae o si o tatou atunuu, aemaise le Vaimauga ma lo tatou talafatai.

E talitonu le Vaimauga o manuia o nuu ma atunuu e afua mai mauga, o ia mauga lau Afioga e pei ona molimauina e le Tusi Paia ma talitonu i ai lona nuu, e le o mauga o le Vaimauga, a'o le matietie o lenei Maota i sui mamalu o le atunuu. E talitonuina foi lo'u nei tagata, vaeane le paia, e leai lava se tamalii po o se failauga o lo o afio ma alaala i inei e le o tapuaia mai e lona itumalo sona leo aua e fai ma o latou sao mo le lumanai manuia

o Samoa. E talitonu foi e leai lava se tamalii po o se failauga o i totonu o lenei Maota e le o tumua i lona agaga mea sili mo lona atunuu, mea sili mo ona tagata, mea e gata mai ai le mafaia mo le manuia o Samoa, ma ana tupulaga, tupulaga nei ma tupulaga a taeao. O lea manuia e talitonuina ia ala mai i faamanuiaga o le tino nei o le mafaufau aemaise le manuia faale-agaga lea na talitonu i ai o outou tusa ma ni o matou matua e faavae ai Samoa, o le 'Atua' lea. Ailoga o ai se Sui mamalu o lenei Maota o le talitonuina lenei upu moni, a tatou muai saili le Malo o le Atua ma lana amiotonu, o a lava nisi atugaluga, o a nisi faigata e faigofie ona faaopoopoina mai.

O le Tala o le Tupe ua taatia nei ma ua faaalua finagalo o Sui mamalu i lea itu ma le aitu, o i e maua ai ni o tatou sao mo le sailiga lava o ai manuia. Ma e fia faapai atu ai ma le faaaloalo tele e ala atu i lau Afioga le Fofoga o le Fonu i le Afioga i le tatou alii Palemia, Afioga i o tatou alii Minisita ni fautuaga po o ni faatalosaga i lea lava agaga e tasi o le tatou sailia o le manuia o le fealofani filemu o Samoa ma ona tagata, mo se tauleleia ma se matagofie ma se viiga o le Atua e ala mai i a tatou taumafaiga.

Lau Afoga a le alii Minisita o Faamasinoga ua ou matua talitonu ua tele faamasinoga o lo o tuua o lo tatou Malo a e ua ou talitonuina foi le tomai o o tatou tamalii i le faiga o faamasinoga. O lenei foi ua tele o tatou loai pasi ma pasi maualuga mai fafo e tautuaina le atunuu mo le faia Tulafono. Ae a pe a toe tofia nisi o tatou alii Faamasino ina ia aveave pea galuega taua ma galuega paia o lo o latou fita i tuga a e maua se toomaga o le atunuu. Ua ou talitonuina foi o lo o i ai ni vaega-tupe tele a lo tatou Malo pe pai atu i le afa miliona o lo o le mafai ona aoina mai sala o ia faamasinoga. Afai e moni lea fuaitau e lava le tupe e ono foia ai le atugaluga mo se \$150,000 o lo o fia maua mai i le siitaga o pili o le fanau aoga mo lea faafitauli o tulai mai.

Lau Afioga a le Minisita o Eleele, ua tulei le Patu ma e lagolagoina lo tatou Vaimauga, o le mea o lo o afifio ai le 51,000 o le faitau aofai o le gata i le Vaimauga i Sasae, Vaimauga i Sisifo aemaise le itumalo o Faleata o lo o avea ma taulaga o lo tatou nei atunuu. O i lava e maua ai se sao taua ma se sao tele o lenei itumalo mo le auina atu i fafo o fua o ana faaeleeleaga aua ni tupe e ono aumai. E tele itu e mafai ai e le Vaimauga e sili atu sa latou matatia mai nisi itumalo o le atunuu aua e tau lalata i le tulaga, e faigofie ona pue mai vaa i le taunuu mo le auina atu i fafo i lo o le tau aumai mamao. E faigofie foi i vaalele ona auina atu ia fua o le faatoaga ma faaeleeleaga pe afai e maua lava ni eleele e pei ona tulei atu le uso-a-Faipule le Afioga i le Patu. E mafai ona galueaina e le Vaimauga. Aua e moni lava o lo o galulue i le tele Matagaluega a le Malo ma Kamupani le mamalu o lenei itumalo, a e lava si taimi i le afiafi e manava ai ma faatinoina ia galuega. Ou te talitonu o le agaga foi lea i lau Afioga e pei foi ona e saunoa i ai ma fetalai i ai i tiami ua tuanai atu mo le atiina ae lava o fua o le lauelele e auina atu i fafo o le poutu lea ma le sini

lea o faamoemoega uma lava mo ni tupe faaagaga aua oloa e fia ulufale mai.

Lau Afioga le Minisita o Faatoaga. Ou te matua lagona lou faanoanoa pe a ou matau atu i le Tala fuafua o le Tupe pe o le 45% le tupe sa fuafuaina ua toesea mai lau matagaluega, a e o i lava le toomaga o Samoa i si o tatou atunuu vaivai mo le atiina ae. O le talosaga, o a lava ni malosi o i ai, o a lava ni toe sagone o i ai, sei ave lava le faamuamua i lo tatou Ofisa suesue o le a afaina vave lava lo tatou tamaoiga i le itu tau i niu ona o faamai ua lamatia ai. Ou te avatu foi le faamalo i le Matagaluega lea mo le puipuia o le faaofi mai o le sisi Aferika o lo o maua i Samoa i Sasae aemaise foi le faamai Niu, ae i ai lava le avanoa e ono oo mai ai pe afai tatou te le mataala e sailia togafiti e puipuia ai ma foia ai e auala mai lea i sailiiliga faa-saienisi i nei aso. Ou te talitonu o lo o iinei nisi porofesa i lea itu sa faamalieina i ni ana taumafaiga i le manu'ai niu, o ia lava taumafaiga e ono faasao mai ai le tupe tele lava a lo tatou Malo mo ni taualumaga o lumanai.

Lau Afioga a le Minisita o Galuega. O lo o moomia tele e lenei itumalo le faaauauina o el polokalame mo moli eletise. Talu ai le tele o mea ua aliali mai i totonu o le talafatai i tupulaga ma e e le taupulea o se foia foi lea e puipuiina ai pe afai e mafai ona faatinoina vave le sopoia o lo tatou talafatai i moli eletise i totonu o auala. O lena o lo o silafia o lo o tele foi le manao mai i ia itumalo mai i ia lava mea.

O le ala-galue o lo o afaina tele ai lo matou itumalo i Tiavi, ua faamoemoe lava, pe a tusa ai ma lou finagalo le vave faatino o ia faamoemoega mo le fia galueaiina o fanua ua tuuina mai e le Malo mo si o matou itumalo. E avatu ai foi le faamalo ma le faafetai tele i ia itu ae peitai ua le sao i ai ni auala i nisi o nei fanua, pei ona e silafia fanua ua tuuina atu mo Vaiala, Magiagi faapea foi Apia ma Matautu-uta ua talosagaina lou fesoasoani mai mo le vave faatinoina o ia faamoemoe.

Lau Afioga le Minisita o Aoga. E fia avatu lava se agaga mo le siitia ua i ai nei totogi o aoga. O tupulaga a taeao o Samoa e faamoemoe tele i ana tupulaga aoaoina. Pe lei oo ea i ona tau e tatau ai ona fausia ni Tulafono e noatia ai matua ina ia faaoga uma a latou fanau? Pe lei oo ea i ona tau e faatinoina ai nisi o tatou folafolaga po o ni manaoga o tagata mo le tuuina ifo i lalo, po o le aveeseina o le totogi o aoga aemaise lava i aoga maulalo ma aoga faataitai. Ou te matua mitamita lava lou tagata pe a faitau i nusipepa i Malo i fafo, e maualuga tele le pasene o tagata soifua o lo tatou atunuu o lo o silafia faitau tusi ma tusitusi i lo o le tele lava o atunuu tau atiae o le lalolagi. Maumau pe a tumau pea lea numera ma lea taumafaiga, a e atugalua lou mafaufau i lenei siitiaga o le pili o tamaiti ona o le fia Sali mai o le tinoitupe e \$1,500 ma se faaupuga faapa sei tau fesoasoani i se tupe o le a fuafuaina mo le totogi o lo latou faiaoga. Ou te lagona lava i lau Afioga le Fofoga Fetalai ma le mamalu o le nei Maota, o a uma lava tupe tatou te mafai ona faalelei ai le aoaoina o outou alo ma a tatou fanau, o le matua atiina ae sili lea ona taua ma e fua mai i ni fua e tele e tai selau

i ona po e tatau ai. A e a faatuutuu nei, pe toe sii nei, talofa i le tele o le atunuu o le a mafatia, talofa i le tele o matua o le a faapopoleina, a e sili ai ona alofa i ni alo o le atunuu o le a le mafai ona latou maua le avanoa e faaogaina ai.

Ou te fia faapai atu foi i lau Afioga i le Minisita o Aualavou, Taaloga ma Aganuu. O lenei lava faamoemoe o le taaloga o le a fai mai i lenei tausaga i le tatou atunuu, o se matua pine taua lava lea mo le faasilasila atu i fafo ma avatu i fafo le igoa mamalu o Samoa, i ona tulaga e moomia ai, e le gata i faiva o taaloga, faaaga-tama aemaise foi le maimoa a e o le a omai ma ni tupe o le a ono tatou maua mai ai. Ona o ia la itu, ou te matua talosagaina ai lau Afioga ma le mamalu o le Malo ina ia alofagia ina ia faia mea uma lava e tatau ai mo le faaleleia ma le vave faatinoina o le faamoemoe.

O le aganuu. Ou te talosagaina lau Afioga i le Minisita ina ia faaauauina pea fuafuaga sa faia e le tatou Malo mo le faaleleia lea ma faatinoina lenei faamoemoe mo le aganuu, aemaise lava i lenei tulaga i totonu o Tiafau nei. E o gatasi lea faamoemoe sa faia e le tatou Malo ma ni finagalo sa faaalua i lenei Maota mo le faia lea o ni ofisa o Sui mamalu o le Fono. Ua mattau atu i le tatou Tala o le Tupe ailoga o afea e ono gafatia ai? A e afai la e mafai ona faatinoina ma tuuina atu i itumalo faa-alalafaga e i ai o latou Sui i totonu o lenei Maota latou te gaosia na faatuina ni o latou lava Maota ma fuafua tatau i Tiafau nei Maota lava faa-tatou nuu, ma gaosi ai ni a latou mea taulima ma tulaga e faatinoina ai le aganuu mamalu ma faatuina ai, o le a le taumateina le fiafia o e maimoa mai e faatauina. A e o le a le taumateina foi se mafutaga fiafia ma se mafutaga mafana e ono maua pea e Sui mamalu o lenei Maota ma o latou itumalo. Ia avefa foi lea ma mataaga taua i e maimoa mai ma maimoaina o tatou agaifanua, ma o tatou lava uiga o lo o soifua ai, o uiga o le faa-kerisianoina o le tatou aganuu.

Lau Afioga a le Minisita o le Soifua Maloloina. Ou te matua talosagaina lau Afioga, semanu o tatou vavalalata pea ma o tatou Malo po o Niu Sila o lo o fesoasoani mai i le tatou falemai ina ia toe faatinoina ma faataunuuna le fuafuaga sa fai mo le tatou falemai fou. Ua ou talitonu ua i ai fuafuaga a Niu Sila o le a faamuta a latou gaoioiga ae peitai o se mea e le matua tulaga matagofie le tulai atu a e lei uma le lifi o le ala lea i luga ma isi fale e lua, aemaise foi se falesa, sa uluai ioeina i le fuafuaina o le tatou falemai fou. O lea ou te talitonu lava i le Minisita o lo o i ai le avanoa e toe talosaga ai i Niu Sila mo le toe faaauauina o lea faamoemoe e pei ona uluai lava s ii ai mo le falemai.

O le Minisita o va i fafo. O se agaga ina ia tausia lelei pea le tatou faafetai tele atu i le Malo o Ausetalia mo le latou fesoasoani tel eua tuuina mai i le tatou atunuu ma le tatou Malo ina ia faaauauina pea, ua le gata i le tatou Malae Vaalele a o le Ofisa o Faatoaga ma nisi laa fesoasoani mai fafo. Ua le gata o Ausetalia ma Niu Sila a o le Malo o Saina, ma e le tatau foi ona faagaloina pea

nisi o o tatou Malo po o uso a Malo o lo o tau lalata mai pei o Amerika Samoa ma le malo o Nauru. E tele le fesoasoani ma le auina atu o a tatou oloa i fafo pe afai e tausia pea le tatou va lelei ma Nauru mai luga o ana vaalele o le a malaga atu i Hawaii aemaise foi le latou vaa o le a galulue i totonu o le Pasefika. E ao foi ona faatumauina ma saga uunaiina ma talosagaina ni fesoasoani mai Faalapotopotoga o Malo tetele mo le fesoasoani mai mo le tatou vaivai. Pe lei tataua ea ona toe faamautu o tatou Ofisa i Malo i fafo e pei o Tutuila ma le Ofisa o Malo Afaatasi? Ma ua ao foi ona mafauina le tatou Ofisa i mea o lo o vevete ai tuelo o Malo o le Lalolagi, faalapotopotoga o Malo i Europa po o le EEC o lo o ala mai ai nisi o o tatou manuia.

O le fautuaga ma le talosaga i le Afioga i le Minisita o Atiina ae. O le tulaga i le faapauina o el aoga o el tatou tala. O le mea e popole tele ai lou mafauina o leni faapau, e le foliga mai e ono tau lalata mai se vaitaimi e ono toe mafai ai ona toe maua le tulaga malosia po o se tulaga siitia sa i ai. Ma ou te fia faatepa lau Afioga i le Fofoga o le Fono ma le mamalu o le Palemene, e moni e le mafai ona tatou pulea le matagi e agi pea le matagi i mea e alu i ai a e mafai e i tatou ona faatonutonu o le tatou la, le tatou folau i le agi mai a le matagi ina ia taunuu i le mea o lo o tatou faamoemoeina.

Pe ou te matauina pen a ioeina ai e le tatou Malo fuafuaga a le IMF mea uma lava nei ia faapau le tau o lau tupe, ia sii mai le faiga o tiute mai le CDV i le CIF, ia sii i luga le tului o faletupe, ia faaitiitia oloa ulufale mai, ia vaea le afaigaluega ia taofi le soona faaalu o tupe i totonu o le afaigaluega a le Malo. Ma e le o se mea fou lea mea e faia e le IMF po o Faalapotopotoga o Tupe a le Lalolagi i lea Malo ma lea Malo. O le ala lea ou te fia faatepa ai lau Afioga i le Fofoga Fetalai ma alii Minisita ma le mamalu o le Kapeneta, ia faia ia fuafuaga i le masina o Setema a o tatou iloa ma matauina e taitai o le lalolagi le utiuti o le tupe o lo o i totonu o le IMF. A e peitai i le 3 o vaiaso talu ai nei, na fofogaina ai e le lalolagi ua toe tului le Sao o Amerika i totonu o le Faaputuga-tupe a le IMF. Mai i le 3 vaiaso ua mavae nei, ua tatou maua ai ni faamaumauga faamaonia ua siitia le tupe faasoaga ma le tupe maua a le IMF i le 47%. O lea 47%, o le siitia mai lea i le tupe na tau utiuti ma faasoaga mo atunuu vaivai i le 66 piliona seia oo atu lea po o le siitia atu lea i le 97 piliona. O le Sao o Amerika lava ia i totonu o le IMF o lea ua taotu maua e 8 piliona. O lea la ua toe faafuaga nei e Malo o lo o faafuaga o latou la ina ia sao le latou sa, ae peitai ua vave ona tatou ioe po ua vave ona tatou taliaina o le tatou foloia o fualaau po o vaialaau ua tuuina mai e le IMF, e mautu afaina tele ai lo tatou atunuu. O le iuga lava o le tausaga na sei mavae nei ma toe feiloai ai ma le IMF i totonu o le tatou Malo nei, o le tali e le mafai e le tatou Malo, e mafatia o tatou tagata pe a talia uma ia mea o lo o outou aumai. O ia foi na faatonutonu ai le la o Malo tele o Niu Sila ma faapea ai le upu a le Afioga i le Palemia o Niu Sila le Susuga ia Muldoon, e le taliaina e Niu Sila fuafuaga a le IMF. O i foi na laga atu ai finagalo o le Taitai o Malo e tau nei o

Malo o le Lalolagi i le Nu.3, po o Malo tau atiae e i ai tatou e le mafai ona matou talia ia mea uma ua tele le avega a e tatou te silafia uma lava e le mafai e le IMF ona omai e pulea se Malo. E omai ma a latou fautuaga ona tatou fuafua tataua lea i le mea e tatou te gafatia, le mea tatou te ono mafai.

Ou te talitonu i Afioga i Minisita faasao mai au pe afai ua ou sese, a e ou te talitonu tulai mai nisi o lea mea lava lea e aumai ia faapau la ua ou maua foi i ai faamaoniaga o nisi Afioga i Minisita sa tulai mai i lea tofi sa tetee ai sea aua e le mafai e Samoa ona tauaveina uma ia mea. E mamafatu le avega.

Faafetai lava i le faauilavea a le Afioga i le alii Minisita. O lea e mau i faamaumauga o pepa o le Fono le Minisita sa latou matua teena le IMF ma a latou fautuaga ia ina ia pau le tupe. E le gata i lea, ia aua nei talia lea mea, ia teena le Sui i le CIF. O lea foi o afifio mai ma alaala mai Afioga i alii Minisita ma i le taua o le Tala o le Tupe na sei teena nei e le Afioga i le Sui mamalu a o lea tatou te talanoaina le Tala o le Tupe o lo o i ai nei. E lei i ai se Tala o le Tupe na teena ona o le finagalo lava o leni Maota na teena a e lei faitauina e lei silafia e le atunuu e lei faafofoga foi leni Maota i lea Tala o le Tupe. Ma o le tusa ai ona laga ni fesili e uiga i lea Tala o le Tupe e lei fofogaina e le atunuu ma le mamalu o le Palemene.

Ma e le na o Samoa sa teena le tele o fautuaga faapea. O lo o faia lava e le tele o Malo o tau atiae, ma o le fatu lea o le IMF. A o le agaga moni i lau Afioga i le Fofoga Fetalai o lea la ua toe tului tupe a le IMF pei ona ou uluai tau ape lei alagataua ai ona toe tau faamama avega mai i le avega ua oo nei i le tatou atunuu.

O le gasegase ua taua nei o le gasegase o le atunuu, ma e pei ona taua e nisi saunoaga faapea ua ui, o lou talitonuga lava e maua lava i totonu o leni Maota lea vaifofo pe a fai tatou te saili i le amiotonu, pe afai tatou te saili i le moni o a tatou folafolaga ma taua ia i tatou o tatou tulaga mamalu ma le tauaveina e leni Maota ona tiute mo Samoa ma ona tagata mea e atu o se isi avega tele lava i le atunuu, e pei ona sa ou faitau i se isi nusipepa faapea ua mamafa le amo o le pologa, sa ave e le atunuu. Afai na tuu ai ma lima-tusi tusi ma tuu ai i le faiga Malo ua tulai mai a le Afioga i le alii Palemia i nei ona po, ou te talitonu lau Afioga a le Fofoga Fetalai, o iinei lava e maua ai le tatou agaga e tasi o le galulue faatasi e pei ona augani ai ia taitai i aso ua mavae. O lea sa taua e se tasi Sui i le 1979 ma le alu i luga o suauu a le lalolagi, o lea faatoa tau pau ifo le suauu a le lalolagi o mea sa tatou sinio ma tatou tatalo i ai o leni ua toe faapoopeo tupe a le IMF o le a faaosofia le atunuu e galulue. A o le lafo atu i le tatou atunuu o leni mea o tiute, CIF, toe pau le tupe, tipi le afaigaluega a le Malo, ou te talosagaina lava ma le faaaloalo ia aua nei gata mai le tatou silasila i le 10% o le afaigaluega a le Malo o le a vaea ia oo atu i le 100, e afe ona tagata e afaina ai aua e tasi le tagata faigaluega pe luasefulu tagata o le a afaina ai lo latou soifua.

O le tau o oloa o le a siitia ma o le a afaina tau o oloa e sili ona moomia. Ou te matua faanoanoa ona o nisi

tulaga e pei o le tau o pusa aisa aua e tele lo latou sao mo le soifua o le atunuu. A e le gata i lea fa ita nei o le a aumai se isi faamama avega i lafoga e pei ona tuueseina o lafoga o nai faifeau ma e o lo o galulue i totogi mautu ae le gata i lea o Tulafono tatu te atiina ae ai le amiotonu e pei o le faamamaluina o le Sapati mo se manuia e faaopoopo mai. Ia manuia lava lau Afioga ma le mamalu o le Fono. Faafetai.

Tofa ATIIFALE FISO



Itumalo Faaalaalafaga:

Vaa o Fonoti

Filifilia:

11 Mati 1982

Faatauto:

13 Aperila 1982

Lauga Faataupou:

2 Mati 1983

Lau Afioga i le Fofoga Fetalai ma lou faaaloalo

lava, nei avea se lafo e faatu mai e faoa ai se isi minute o lau lauga, a e ou te faasilasila atu ma le faaaloalo e uma lelei lava le lauga i le 30 minute.

Lau Afioga i le Fofoga Fetalai, le paia o le tapuaiga ia Samoa o lo o faafogafoga mai, tapuaiga i aulotu eseese o le Tala Lelei, ou te faatulou atu i la outou faafogafoga i luga o le ea i lenei taimi, ona o le tafola lea ua ou tu ai nei, o le ofe ma lona afa o le a ou sasau i le moana i luga tonu ae o la outou faafogafoga i luga o le ea. Po o le a se upu e lape pei o le mafuaga lea e mafua ai ona tofi le Palemene.

Lau Afioga ou te fia oo loa lava i le tulaga o lo o i ai le Palemene. I se taimi ona fai lea o se manatu i le Tala o le Tupe. A e o le a amata lau tautalaga i le Minisita o Aoga, le mafuaga o lo o fefautua ai ai le Maota lenei, i se mea lelei aua le tatou faiga-malo. E mamao i lou taofi i le taofi lea o le feteenai o ni o tatou finagao faaalua, afai sa leaga i lea faiga-malo, o lea foi ua alaga i le leaga o lenei faiga-malo. A e a maua la lou manatu lea ona maua ai lea o lau tali i le Tala o le Tupe. Lau Afioga i le Minisita e ala atu i le Nofoa ua maua i se faalogo se tasi o vaega o tupe i le faagaoioiga mai o le faiga-malo i le 1980 po o le 1981-1982, o lo o i ai se fesoasoani mai Ausetalia faapea sa tuuina mai mo le fausia o faleaoga i itumalo e faagaoioi ai se faleaoga o se tiutmalu i le \$10,000. I lea lava vaega o lo o i ai i lou itumalo le faiaoga o el itumalo sa lavea i le Komiti lea na tofia e asiasia itumalo ia po ua fia ni faleaoga ua maea? O le tulaga e leai se faleaoga o lenei itumalo i lea vaega.

O le mea la ua maua e faapea ua alu ai se vaega-tupe tele, a e tulai mai ina ua toe moomia e Ausetalia le fesoasoani lea e faaauau e le tele ni faleaoga e fausia i Samoa uma, vagana nisi o itumalo po o Savaii. A o le tupe ua i ai ua uma ona faaogaina le vaega-tupe lea ae leai ni faleaoga. Lau Afioga e fia maua se faamalamalamaga i lea vaega, aemaise foi se tasi o vaega-tupe o lo o tuueseina mai i e sa avea ma failautusi i

ia vaitaimi. A o le mea o lo o aliali mai sa usua fono sa leai ni fono e faia a e sa totogi pea ia vaega-tupe. Lau Afioga ou te faamoemoe o le a maua mai se faamalamalamaga i lea tau tupe ia, aua o lo o tatou vevesi nei i le taugata o aoga a le fanau.

Lau Afioga i le Fofoga Fetalai ua ou atu i le Minisita o le Soifua Maloloina. I le matauina i le tala o lo o taua e nisi o Sui, e tetee foi i ai lou Sui Usufono. I fomai o lo o galulue, e leai ni o latou ovataimi e totogia, a o lea ua ova i lua le sii o le mai e avatu i le falemai. E le gata i lea o se tasi o vaega ua maua i luga o le ea le faasalalauaga lea i fesoasoani lea, o Leulumoega ma Sataua. Pe lei talafeagai pe a fai ua maua lea fesoasoani mai ona tuuina atu mo le atunuu atoa aua e vaivai uma lava falemai o itumalo o lo o i ai nei, aemaise foi lenei itumalo o la e leai se fomai, le lelei le falemai?

Lau Afioga i le Minisita o Faatoaga ua vaaia ma le faanoanoa le mamalu o le Sapati i le Maketi fou. Sa faataga lea vaega e uiga i le faatauga o ia ma fualau, ae a e silasila totoa i ai i le mea o lo o tulai mai nei ua pei lava o le aso aunoa i le aluina o el talo, popo, ua pei e le o le aso Sa lea a o le tala la e i fafo i le lalolagi o Samoa e faaaloalo i le Sapati a o le mea lea e tulai mai ua le mamalu.

O le tasi o vaega e fia tautala i ai o el tele o fesoasoani mai fafo, o auala ia i faiga-faiva. O le fesoasoani lea na aumai i Iapani po ua tusa nei o le tausaga, ona aumai lea fai ai le faaiuga e faapa e tuuina atu mo le aufai-faiva. O le mea la ua maua e le kalapu fai-faiva lea ua aumai le fesoasoani lea faatau ai pole, maea, ma mea uma e fai ai taula i tai ina ia faigofie ona maua ia e le aufai-faiva. Ona maua mai lea o ia e le fai-faiva lea toe sau i le maketi toe siitai le tau o i'a i luga. O lona uiga ua tulai mai ua lua ona faamanuiaga e maua e le tagata fai-faiva, a e oti ai le o lo o ona faatauina ua na maua le fesoasoani i tupe mai fafo ua faigofie i'a, toe maua le tupe lautele ua faataugata i'a. Lau Afioga silasila i lea vaega pe talafeagai ai se fautuaga mo le sologalelei o le tatou atunuu i le taugata o lo o i ai nei.

O le Minisita o Faamasinoga e ala atu pea i lau Afioga i le Fofoga Fetalai. A matauina malie le tele o faamasinoga na tuanai nei i le faiga-palota, e afua i le lisi o matai, a o lo o matauina foi e le atunuu le gasolo atu o alii Ofisa e suesueina matai e lua suafa, e sili atu i le 3, matai ua maliliu, matai o lo o i nuu mamao. Ona aumai lea i le lisi lea faasao ai mo le faiga-palota o lo o i le lumanai. A o le a le mea lea e tulai mai nei? I le faamasinoga talu ai ua palota isi matai maliliu, ua palota faalua isi matai i o latou suafa ma molia atu i le Faamasinoga i le faiga-palota. A o le galuega lea sa fai i i e pei e aliali mai ai le le faamaoni o el aufaigaluega. O nisi aua la e soli ai le Tulafono ma ua soloia ai nisi o Sui mamalu sa i totonu o le Palemene lenei. Silasila i ai lau Afioga i le Minisita mo lea vaega.

O le tasi o vaea o le Ofisa o le Faamasinoga, o Tulafono o Faiga Palota sa taua e se tasi o Sui. E oo mai i le taimi e faamaonia ai Sui mamalu, faatoa faatautoina Sui-a-Faipule ina ua uma ona saina le Ao o le Malo i

pepa. O se tasi o ia vaega e popole ai ma le faanoanoa, ua matua matauina lava e lou Sui le le mamalu o le saina o le Ao o le Malo, ona o lea ua saina ua faamaonia le tofi faipule a e toe molia i luma o le Faamasinoga. O nisi o mea ma Tulafono o lo o i ai nei e saina le Ao o le Malo ua faamaonia ia mea, faia le tautoga. A o le tulai o le Ofisa lenei ua tuutuu atu lava ma ua le mamalu ai nei mea. A faitau lou Sui ua saina ai le Ao o le Malo o au o le faipule, pe talafeagai ai ona tuu atu le saina a le Malo sei uma ni faamasinoga.

Lau Afioga i le Fofoga Fetalai, e faasoso atu i le faigapalota. E taua e se tasi o Sui le vavamamao tele o le faataapeina o le Palemene ma le toe sosoo atu o le faigapalota e tolu masina pei ua tel elea vaitaimi. Pe a pe a tuu mai i le 1 le masina ina ia aua ai ona avanoa ni faatosina nei aua ua avea lea vaitaimi umi ma mea e faagaioi ai kamupani e lau atu tupe ma ava e faaosina ai tagata i itu e manatu ai. O lea la ua siitai nei tau o oloa a kamupani, o ai nei o iloa po o le auala lea e mafua ai ona fai ona taugata e alagaina nei mo le atunuu?

O le Minisita o Leoleo ma Falepuipui. O se tasi o pepa sa faasalalauina ai se fasi fuaiupu faapa - "Pagota auai i le faauuina o se tofi Palemia". E lagona tele lou faanoanoa i lea vaega. O ia foi upu ua oo i fafo i malo i fafo, a e a manatu i le Faavae i totonu o le Maota lenei ma le atunuu, a taua se Palemia o le faauluuluga o le Malo o Samoa, tulou le Ao o le Malo a o el va i fafo ma isi malo o le tatou fu'a lea i fafo ma va o Malo. O le tatou tofi Palemia, a e auai ni pagota i sauniga mamalu faapenei. Afai foi....

Lau Afioga ma lou faaaloalo o la e foi e i ai tulafono a le atunuu e masani ai, e sa ona sue se lauga o la e i ai togi-sala ma ona afu a e ui i lea faafetai i le faaaloalo

O le mafuaga o le faaauau o lea vaega.....

E mafua ona ou taua lea vaega lau Afioga a le Fofoga o le Fono ona e le toatasi se tamalii o le atunuu e nofo i le Toese. Afai lava la e mamalu ai se faauuga faapa, e ao la ona talo uma le Toese e omai e faamamalu se tofi Palemia, ona mamalu lea e pei o le mea lea o lo o i ai nei. A o le agaga e fautua ai i faiga malo o lo o tulai mai nei ina ia au le toe tulai mai ia faiga e le mamalu ai tofi Palemia o lo o tatou faamamaluina nei.

Lau Afioga i le Fofoga Fetalai ma lou faaaloalo tele ou te tautala ai i lea lava vaega. O le mafuaga o lenei Maota le tatou vaia o tulaga e ono mamalu ai le taitaiga o faiga Malo, po o le a le mea na leaga ai i ia taimi tatou talosia ia aua nei toe oo i ai nisi vaitaimi. Lau Afioga i le alii Palemia, o lo o taua foi sa faia se inuga-ava i le falepuipui i se tasi o faipule e aofia ai se pagota....

Lau Afioga i le Fofoga o le Fono ma lou faaaloalo tele e saga avatu ai pea ni manatu ina ia tatou fulitua ai i mea e le manuia ai le faiga Malo. Talofa i le atunuu o lo o faafogafoga mai i le Maota lenei o lo o lote ai upu a Samoa, ma le ola o lo o ola ai. O lo o faalogologo mai i a outou Afioga i alii Faipule o lo o i ai le tofa ma le faautaga e fautua ai i ia vaega. Afai e toe oo i ai la outou faiga Malo lau Afioga a le Palemia a e a faapefea le

atunuu? O la e maimoa ane foi nisi tamalii i ia faiga tatou te puipui ai mo le laulelei ma le matagofie.

Faafetai i lau Afioga a le Fofoga Fetalai, e le o sau tali atu i le fesii a le alii Palemia, a e pei o le mafuaga o le upu, afai na ou faaogaina ona o mea ia sa tutupu i ia vaega o le o atu o alii Faipule taumamafa ava i totonu o le falepuipui, a o la e silasila le atunuu, o lea la e mafua ai le taofi, afai ua tulai mai le faiga Malo e silasila i ai e le talafeagai, e fautua atu i a outou Afioga e silasila ane i ia vaega pe le talafeagai i le faafogoga a le atunuu aemaise foi la tatou faiga Malo o lo o feagai nei.

Lau Afioga a le Fofoga o le Fono ua oo atu lau faamatalaga i le Minisita o Eleele, pei ua taua nisi o eleele o le WSTEC o le a fuafua e faatauina i le taimi ua faasalalauina.

Pe lei talafeagai i le Afioga a le alii Minisita o Eleele.

Lau Afioga a le Fofoga Fetalai, o lenei foi vaega o le aso ua tatou i ai, faafetai i le Atua ua toe amatalia manuia tualumaga a le Fono Aoao. I le mataupu sa i ai, ua i ai foi le talitonuga lafo atu ia i le alii Palemia e tusa o nisi o mataupu na sau i le lauga mo se faamalamalama i se taimi ma o le a avatu i ai.

E manava le Fono o lo o i ai le manatu i luma o le Minisita o Eleele. Ua faasalalauina nei nisi o vaega e fia faatauina atu i le Esetete Tausi a le Malo o Samoa. I le matau atu i lo tatou fia maua o fua o faatoaga i le auina atu i fafo o lo o utiuti nisi o itumalo mo le faia o faatoaga. I le afuafua mai i le tuuina atu o eleele o Samoa e fai ai eleele o le WSTEC, i le taofi moni lava atonu o ia taimi e lei atoatoa ona malamalama i ni auala na toesea ai nei eleele, pe lei talafeagai ona faafoi atu nei eleele i itumalo o lo o i ai i tootnu o WSTEC, e le faapa o le a faafoi uma a e o le taofi, pei o le mea o lo o fai nei ma muagagana e tua i le sami tua i le papa nisi, a e afai e tuuina atu le Esetete i le ogatotonu o le vaomatua o se mea taua, a e faafoi atu e aunoa ma se tau i eleele o Samoa sa maua i nisi o auala.

S atua ai foi i le vaega o le Esetete ni tupe faaalu po o le atiina ae o le lumanai manuia o Samoa e ala mai i tatou oloa e auina atu i fafo. Afai e lava eleele mo le atunuu o le lava foi lea o le atiina ae o fua o fai ma faatoaga. I le agaga moni o le taofi ma le lauga, tatou lagolagoina se mea e ono lelei ma manuia ai le atunuu o lo o tapuai mai ma faafogafoga mai i la tatou faiga Malo.

O le Ofisa o Galuega. Lau Afioga i le Minisita, o le Tala o le Tupe o lo o i ai e i ai se vaega e ono tali atu ai mulimuli a e faaauau atu ni nai mea e manatu ai. O lea lava ua gagana ai ou te oo atu ai loa i lou itumalo, i le faasologa o galuega i le matau mai, a o matou nonofo i fafo ua faitau tele le aofai o meaalofa e auala mai i tupe e foai mai i Malo i fafo. A manatu foi i tupe faaalu a le Malo e tofusua lava, e i ai le upu faa-Samoa le ao le a ou faaogaina, "e na o le gata lava e fasi a o pupula". A ou i lea itumalo, aumai lea fesoasoani ave i lea itumalo tulai mai lea Minisita faaleleia lona itumalo. Lau Afioga a le Fofoga Fetalai, e ala atu ai se fautuaga i le Minisita o Galuega, a ou manatu i le itumalo o lo o ou tu mai ai nei ona ou faafetai lea i le Atua i le avanoa ua oo mai ou te

tu mai ai e logo atu lau Afioga ma le Malo atoa, le gata lea e fasi so o a e pupula. E afua i lenei, e ofo lava le taofi, a fesili atu i se fesoasoani a e fai mai e le lava le atiina ae e maua i Fagaloa ma lenei itumalo. A fesili atu i faleaoga, a fesii atu i falemai a e fai mai le tali e leai se atiina ae e laitiiti le numera o tagata. Paga lea lau Afioga e, ma le faaaloalo ua faitau i lenei vaitaimi ma le eseese o tausaga ua tatou i ai nei ma le lagona ua ou lagona ma le filemu, i le amata mai o le taua lona lua a le lalolagi na aafia le atunuu i le nofoia e maligi ma le au fitafita mai Amerika iinei, sa leai ni mea e tua i ai, sa leai ni mea e ola ai le tele o e e nonofo i le taulaga, a e sa taumafai le itumalo lea e alo mai vaa e aumai ai le fofoga taumafa o le atunuu a o lo o i ai le maketi tuai.

O le tulai mai la o lenei mataupu, ou te talosaga atu ai i lau Afioga Fofoga Fetalaia...

Ona manatu ai lea o le taofi i le leai o se fesoasoani a le Malo i ia tagata soifua, a e galo faale tautua a lenei itumalo e ala ia a matou fanau, e ala i a latou fanau e tautua e aoaoina nsii o alo o le atunuu. E le gata i lena a e o le soifua maloloina o Samoa, toetoe lava a sili atu fomai i Samoa mai totonu o le itumalo lenei. Lau Afioga le Fofoga Fetalaia o le fea ea e taua? E taua le fua o faatoaga ma le numera o tagata pe taua le ola o tagata ma galuega e faia e tagata e ola ai le atunuu? E le o auaua lenei itumalo? A e o lea e matau atu nei ua tufa i o, tufa i o, tufa i o a e leai lava se fesoasoani a le Malo. I nai minute o lo o toetoe e 2, o le upu lea na ala ai ona oi Moretekai, pologa lea faiga malo, polog alea faiga malo ma le Tala o le Tupe, talofa i le faiga malo ua outou amo se avega mamafa. Fai mai Moretekai ina ua oi Isaraelu, Eseta o ai na iloa e fai oe ma Masiofo i aso faapenei? Aso o le faigata aso o le pologa, tagi Isaraelu ua leiloa e maupu ai, a e o le a le mea lea ua tulai nei i le faiga malo? Ua foi i tua. Ia tatou foi i luma tatou felagiai se pese fetaliai. Alofa ia i le Malo afai o lo outou tofa lea e mapu ai le Malo i ia mea e fai oe ma masiofo aua le mafatia o le atunuu o lo o i ai nei.

Lau Afioga, o le o lo o fatautaia oloa mai fafo, aua le faia finauga, afai e le lkelei le tau o lo o faia ai nei faiga o oloa aua le feteenai o taotu taofi ma finau ai i le malosi a e ia maua se mea lelei...

Lau Afioga ou te faaaloalo atu, a e pei e mataga foi se tagata a e soli fono soo i totonu o le Maota o le atunuu. Afai la e toe aumai se avanoa ou te toe tu ai ou te toe tali atu i le mea o lo o finagalo ai le Sui ona ou nofo lea.

Tofa FAIUMU ETEUATI



Itumalo Faaalaalafaga:

Palauli Sisifo

Filifilia:

27 Iulai 1983

Faatauto:

29 Iulai 1983

Lauga Faataupou:

7 Tesema 1983

Faafetai lava mo lenei aso. Ae ou te le'i fai atu se upu, e muamua ona momoli atu la'u faafetai ma le viiga e faaopoopo e tusa ma la tatou tapuaiga e pei ona siitia e lau Afioga i le Fofoga o le Fono.

Faafetai i le alofa ma le agalelei o le Atua e tusa ma taualumaga e pei ona tatou i ai i lenei aso. Mai le aso ananafi e oo mai i le aso, faafetai ua tatou fesilifai i le lagi e mama ma le soifua maua. E le gata i lea, o le tapuaiga a nofo i Ekalesia faapea foi si o tatou atunuu. Peitai la le uiga o le aso ma taualumaga o le tatou fonotaga, ia malo faafetai i finagalo faaalua mai le aso ananafi e oo mai i le aso. Ia tatou faamoemoe i le tatou Matai i le Lagi e fesoasoani mai ia i tatou. Peitai o le fetuleiaiga o finagalo ma faamoemoe, ia faapena lava taualumaga o Malo mai taimi ua mavae e oo mai i taimi o lenei foi faiga-malo. O a tulaga ma fetogiaia ia o i ai lava le agaga ma le faamoemoe i le Afioga i le alii Palemia ma alii Minista o outou lava e avatu i ai agaga, o lea sui ma lea sui. Aemaise lava le Malo e ua tulai mai i lenei tolu tausaga. O le mea la lea e avatu ai le agaga fiafia ma le agaga faafetai ia aua nei outou tio i sea tulaga. Ia mamao le tofa i la outou Afioga Tofilau, le ua avea ma Taitai o le tatou Malo, faapea foi le tofa mamao ia outou Afioga. O a tulaga, o a lavelave, o a tugā ua matou manatu e faaali atu, e leai o outou o le Malo o le faatafunaga, tulou! O le upu to ia te au, o a tulaga ia e faapea ona matou avatu so matou agaga vaivai e lagolagosua e tusa ai o finagalo ma faamoemoe, ia e faapena lava, pei ona saunoa le aloalii i le aso ananafi, ia o faufautuaga lava mo outou. O mea lelei ma mea leaga, o ouotu lava o lo o i ai le faafoega o le tatou Malo e tusa ma lenei vaitaimi.

Peitai le uiga o le aso, o nai manatu e lafo atu e tusa ma taualumaga. Aemaise lava foi le uiga e pei ona taua i le aso ananafi o le Minista o lo o faafeagai ma lo tatou motu nei, aemaise le motu ia Salafai, e pei ona faaalua ni agaga o Sui mai le aso ananafi. Ia e faapena foi se manatu ma mea e lafo atu e tusa ma le uiga o tulaga o lo o i ai le tulaga o le popo ia Salafai. Ae faigata le uiga o mea ua tatou oo i ai i aso ua mavae. O le gasologa mai ia sa i ai kamupani i totonu o lea nuu ma lea nuu, i totonu o le motu ia Salafai. Peitai o lenei vaitaimi ma lo tatou Malo, o faioloa o lo o i ai nei, ua leai ni oloa o kamupani, a ua faapito lava i le aufai-pisinisi. Ia ua le manao i le popo, ae peitai o Salelologa ia, o lo o agai mai i ai le popo i le motu tele ia Salafai. Ona o le mamao o alal ma ia tulaga, a o lo o taumafai mai le motu

tele ia Salafai. Ona o le mamao o ala ma ia tulaga, a o lo o taumafai mai lava.

O lea la e avatu ai se agaga faapena e pei ona faaalua e le Sui i le aso ananafi. Ia o lo o i ai le totogi o le taavale, totogi o taga, atoa foi la ma le uiga o le tuu mai o la ta lisiti ua aveese mai se tupe mai totonu o ia tulaga faapea mai, ia o tupe na o lau lafoga la lea o lo o i ai. O le mea la lea e lafo atu pea i lumamea le uiga ma le taualumaga o le tatou popo. Tasi la lea itu o lo o vevesi ai le tatou atunuu, ona o le tamaoaiaga faapea ua taugata po o le a le tulaga ua oo i ai. Masalo ua silafia uma lava le taugata ua oo i ai si o tatou atunuu o lo o i ai nei. E leai foi se isi o tio i ia tulaga faapena. O manatu lava e lafou atu i Taitai o le tatou Malo ina ia faafoe o ia tulaga ma foia le tulaga e pei ona ua taugata tele le soifuaga. Ia ae peitai o el taugata ua i ai nei, ia lafo atu pea i lumamea le agaga o le finagalo ina ia foia o ia tulaga o lo o ua tatou i ai. Masalo o le mea lava lea sa i ai faiga Malo o lo o ua mavae o le taugata o le soifuaga e oo mai foi i lenei taimi. Ia o lea la e lafo atu i le Afioga a le alii Palemia ma le aiga Minisita. Le mamalu o le Palemene ia lafou atu ia ni o matou manatu, ae faafoe malie ave pea e a outou afioga. E avatu lava le agaga faapena masalo o Salelologa agai i Asau e lelei tele auala. Lau Afioga a le alii Minisita o Galuega lau Tofa Taua, o lenei lava auala puupuu, masalo mai lava faatoa tutoatasi le tatou Malo o leaga mai le afega i gatai i le uafu i Mulifanua. Silasila i ai e oo atu loa iina ona faalemu lea o le taavale a ua felafolafoaina solo le mamalu o le atunu o lo o feafioai a ii taavale. Ua matua faigata tele ma leaga tele le auala lea i le uafu i Mulifanua. Atonu e le o silafia e Afioga a alii Minisita, leai na ona ou faapea atu ia masalo o lo o affio i le ea, ia a o matou o lo o malaga atu, i lea fasi auala e matua leaga tele. E faapea foi le auala lea o alu atu i Samatau e alu i Falelatai, ona e le o faapito manu ia tasi. Pau lava, a ta ui atu loa i le oga-auala lea ia ta te iloa le faigata tele ma le leaga.

Ia faafetai lava i lau Afioga Tofilau. E pei o le agaga maua lea sa i ai i lou loto o si au foi vaai atu i ai e le faapea ou te sau o au o le sui o le itumalo mai Savaii ona ou faapea lea o mea o lou itumalo. Ae pei o lau vaai la i i le gatai atu lea i Samatau ma Falelatai, ia atonu o i ai le tofa ia Manoo ia pei o le auala lena, e pei ona saunoa atu le Afioga i le alii Palemia.

Faafetai lava. O vaa lau pasese. E pei foi ona faaalua e se tasi i le aso ananafi, masalo o ia vaa o ni vaa o le Malo o Tutuila, i la ta vaai i ai. Ua tau le lava gaoioi e ia vaa e lua o lo o i ai. Ae peitai o lea ua aumai i le Malo o Samoa i Sisifo, pei o lea la ua faaoga nei i le va o Upolu ma Savaii. E tasi la le tatou vaa o i ai. Pe fai, fai lava tei ua tuu ia vaa, aua na o le tasi. Ua fiu i faatali, faatali na o le fia malaga mai ae ua leai ni vaa. E le faapea o lou agaga o le a fai ai, leai na ona lafo atu i lumamea. E le faapea foi e faigofie, atonu pe tali taunuu mai se tatou vaa lau pasese lelei, ia ona aveese ai loa lea o ia vaa e lua o lo o i ai nei.

O ala-galue. E pei la ona taua foi i le aso ananafi faapea o le a uma le toe faagaioia o ala-galue. A o lea e

matau atu e leai, o lo o faataoto foi lea fuafuaga i lena tausaga, o le a toe amatalia ai auala-galue.

O le matou falemai. Pe la ona saunoa le uso-a-faipule i le aso ananafi ua maua ai o lo o i ai. E le faapea la o le a ma avatua lava na o o matou falemai. O le mea lea e avatu ai le talosaga e tusa ai ma ia tulaga o le a se fuafuaga ma faasologa o falemai o le tatou atunuu ia Upolu nei ma Savaii? A i ai se faitauga i le tatou aemaise le alii Minisita o le Soifua Maloloina, ia faafetai mo ia tulaga. Na ona valualusia aa o le fau i le lafo atu i lumamea le uiga o ia tulaga.

Ia leaga ma te le tupulaga o le uiga o ia tulaga e fai si ona laitiiti ma si ona faapena. Matau mai le Sui Fepuleai leai, e le faapea o ou talosagaina le falemai ona o se isi itu. E pei la o le falemai lenei. O matau mai lava e Sui, leai e le faapea ou te talosagaina, e peiona ou fai atu i le aso ananafi a o lea ua faataoto le tulaga o le Tala o le Tupe ma o le a fai. E pei o le agaga moni lena, ae faafetai tele i le alii Minisita i le Tofa ia Lavea o le Minisita o le Soifua Maloloina ona ua i ai se agaga fiafia o lenei itumalo, faafetai.

O si toe agaga lea e faaali atu, e tusa ma le saunoaga i le Afioga ia Vaai i le aso ananafi, i ana faufautuaga ma talosaga vaivai. O lou nei sui lau Afioga i le alii Palemia ma le mamalu o alii Minisita ia toa lava le tai ma le tofa e tusa ma le finagalo faaalua. O le mea la lea o le tatou Malo lena e i outou aao ma le faafoeina o le uiga o si o tatou Malo. O le tatou Malo faatasi uma lava lena, e lagolago atu laa le uiga o i matou nei, pe vaivai se manatu e avatu ae togi atu lava i luma o lau Afioga i le alii Palemia ma le mamalu o alii Minisita e faafoeina.

Peitai o le aso ia ua uma se lagona ma se manatu e tusa ma lenei aso. O taualumaga e tusa ma le aso, ia faatasi mai le tatou Tama o i le Lagi e manuia ai si o tatou Malo. O lo o tapuai mai i le Ao Mamalu o le tatou Malo, le Nofo a Ekalesia ma le mamalu o Samoa i Sasae ma Samoa i Sisifo, ia faamanuia mai lo tatou Matai i le Lagi. Ia taitaiina lenei aso e lau Afioga i le Fofoga o le Fono e faigata le galuega ma ua tele aufai tofa ma le aufai uta o lenei Palemene ia ae toatasi lau Afioga, tau ma lau Afioga e faafoe.

O lea la e tautala atu ai ma le ava ma le faaaloalo e tusa ma le aso, ia faatasi lo tatou Matai i le Lagi e amata fono le tatou Matai i le Lagi, faaiu e le tatou Alii i le Lagi e manuia ai. Soifua.

Afioga FEPULEAI SEMI



Itumalo Faaalaalafaga:

Salega

Filifilia:

11 Mati 1982

Faatauto:

13 Aperila 1982

Lauga Faataupou:

28 Fepuari & 1 Mati 1983

Lau Afioga i le Fofoga o le Maota ma le maua lea o le

Palemene, ou te muamua ona ou faatulou atu i lau Afioga o lo o avea le foeuli o le tatou Maota. Ou te talitonu o le tofa i lau Afioga, le Maoputasi, lau Afioga le Tama a le Malo, o lo o foeuli ma ulimasaoina ai ma tafesilafai ai le Laau a le Tamaitai aua Samoa ma lana faafogafoga. Ma ou te lagona foi o le Nofoa e le mativa i le tofa, o le Nofoa foi o lo o tuu atu i le Atua i taeao uma, le Atua o Malo, le Atua alofa ma le Atua agalelei. Na te faamalumalu ia Samoa ma aumaia upu moni i totonu e avatu e sui mamalu o le Palemene aua Samoa ma lona auiluma a taeao.

E faatulou atu foi i le paia o Samoa o le atunuu tofi. E leai, e leai se tasi e soona tapulalaga pe soona 'au'augagalua i ai i matutu oo o Samoa, e leai foi se tasi e soona malimali pe soona faasapilima le paia o Samoa, e leai foi se tasi e soona tautala faatama i le Maota leni aua o le Maota ua autovaa i ai le aufai-uta ma le aufai tofa. E oo foi i ooga o upufai o Malo, i sui mamalu o le Palemene, leai ua sama se malo ae tautai se potu e faautauta i lona tulaga mai. Tulouna la Samoa aua e faigata le paia maualuga o aiga o tupu, aiga o nofo, aiga papa, e matua mamae i ai le tautua a Faleupolu e fia o Samoa, falefa o Tumua ma puleono ia Salafai. O le mamalu maualuga o faleupolu tofitofi o le atunuu vaeane le faafogafoga mai o le Faleagafulu ma le auvaa o Tootoo, e faaeteete upu aua e matamalumu ma augata le vasa o aiga ia. A pau'ū mai foi i le Maota o le Palemene, e leai se fia tagata iloa, leai foi se e soona avatu ni ona manatu, vaeane le paia maualuga aua o le aufai tofa ma le aufai uta. Ona ou faatuloulou atu lea, afai e i ai se vaega o le faamatalaga a le Sui a Faipule e faaletonu i la outou faafogafoga, e sala le gagana o lape o faamatalaga. Ia, ia vaa tele la outou tofa.

Lau Afioga i le Fofoga o le Maota, e fia oo foi se vaega o faamatalaga, e amata mai i fatia ua sola ma faiga Malo ua mavae, ma e ao foi ona motu le pa ua silafia, vaeane le faafogafoga a Samoa. O le tele o fatia ua sola, o le tele o le peau matalololoa o le atunuu o lo o ua mou, e muamua lava ona faafetai foi i Taitai o ia faiga malo, e muamua foi ona lagona le agaga faafetai atu i la latou taumafai. Faafetai i lo latou naunau e taumafai Samoa. A o lena foi lelei, o lo o i ai i totonu o lena lelei le tele o mea e sili atu ona le manuia, le tele o mea e le mafai ma le gafatia e Samoa le faigata. O le faasoasoina la o le Malo o Samoa i lona amataga maiga, i taimi ua maoti mai le faiga Malo, e le o se Malo na tuumamaina, e le o se Malo na faafaigofie. Afai la na faigata sili i lena vaitaimi ma tulai mai ai ni faafitauli ogaoga, e le mafai e le tatou auga-tupulaga ona gafatia. O le ala tonu la lea e tau fofo malie atu....

Lau Afioga le Fofoga Fetalai, lau Afioga le alii Palemia, paia maualuga i le Kapeneta, Sui mamalu o le Palemene o le Malo o Samoa.

E muamua ona ou toto le niu i le tuaoi ma ou afea le mea ula o le vai fagaloa aua le taeao fou ma le taeao matagofie ua foai e le Atua e faaopoopo i lo outou soifua ma lo tatou ola vaeane le maleifua mai o aiga e fia o le

atunuu, e ala mai i fanuga lelei o faleupolu e fia o Samoa o latou faafogafoga mai leni foi aso ma le taualumaga o le Fono Aoa. Ona faafetai ai lea i le Atua aua o lo o tatou talitonu pea o lo o i ai le Atua o se Tama agalelei ma se Tama agaalofa ia Samoa, e faamalumalu pea i ona manuia ma ona taualumaga mo nei ma a taeao.

O le a faaauau pea ou lagona ma manatu foi ua maea ona tuuina atu i le aso ananafi ina ia faaauau e uiga i le Tala Autu o le Tupe lea ua tuuina mai 1983 ma o le a agai foi i ai se faamatalaga.

O le vaaiga aoa o le Tala o le Tupe lea ua faataoto mai, o le mea moni na o lagona mafatia i totonu o le manatu; aua ou te talitonu o se mea e sili ona faigata le tau fuafua ma le tau faasoasoa ma le taumafai o se auala e mafai ai ona maua se laugatasiga malie o vaega taitasi o le Malo. O le lagona la o lo o tulai mai se mafatiaga i le vaavaai atu i le auauai mai o Ulu o Matagaluga i le tau faasoasoina lava o leni tamai tupe, ou te faaupuina i se faaupuga faapea "o lo o faasoasoa pea e Samoa."

I le amata mai i le tausaga ua tuanai sei oo mai i le tasuaga nei ua faateleina le tupe aitalafu ae ua leai ni auala e mafai ai ona foia le le lelei o le galueaiina o le lauelele atoa foi ma nisi vaega taua e mafai ona maua ai se tupe faasili a le Malo. O lea foi la sa taua e nisi o Sui ia latou lauga a faapea, "e mamafa-tu le avega", ma a faapea e tele naua le tupe o lo o ua tulai atu i se tasi o faiga-Malo i le taimi nei ma o lo o tulai mai ai se faafitauli tele, ua ao loa ona le 'alo a e gaoioi i ai Taitai o Malo. E sao ma ou te faasao foi. O e taitai iloga ma le taitai matapalapala, o ia lava pe faitau piliona e ao lava ina gaoioi i auala e foia ai ma e ao foi la ina le faaitiitia faamatalaga a le Palemene vaeane le faafogafoga a Samoa, i le auala na ala ai ona oo Samoa i le mafuaga tele ua taoto mai i le nofo aitalafu o le atunuu o Samoa.

O le mea moni, e matua tau atu e lou lava Sui, vaeane le faafogafoga a Samoa, e leaga le fuafuaina o le Malo ua tuanai, le tofa Tupuola ma le faiga-Malo. O le leaga foi, atonu toe o ni nai miliona o lo o totoe ona uma lea o le tau o Samoa i Malo i fafo. Faafetai i le Atua ua mafai ona tulai mai le faiga-Malo e lavapapale mai ina ia foia ae lei tupu se vaega sili ona matautia, o le tagi mai o Malo mai fafo o Samoa ua uma lou tau, lea ua maea ma ua i o matou lima le ola ma le soifua o aiga o Samoa ma Tupu ma ee o Samoa ma ama tama fanau. E ao foi la ina auiliili ma matua manino lelei, ia motu le pa ua silafia auala leaga ma auala le tatau ona faataunuina sa fai ai le faagaioioiga o ia tupe muamua. O lea foi la ua tulai mai i le taimi nei e le o se mea la e ao ai ona lauga ma avatu ai ni manatu faasea i le taumafai o le Malo i le tulai mai e tagitagi mai ma tau tuu mai le Tala o le Tupe o lo o tau tuuina atu i luma o le atunuu, aua ou te lagona, o ai lava le Sui mamalu o le Palemene o e sa i totonu o faiga-Malo ua mavae, e ao ona lauga i le lauga e tatau ai ona loto maualalo i le Maota leni; e tatau ai ona lauga i le lauga faatoese ia Samoa aua ua leaga. Tulou Samoa lo tatou faiga-Malo a lo tatou atunuu ma lona tamaoaiga ona o le le fuafua ma le le magafagafa i auala e ao ona

Saunoaga Faataupou a Sui Usufono 1961-2011

faataunuina mo le taumafaiga o le auiluma o le Malo o Samoa.

O upu moni la e matua lagona le faigata ma le alofa i le auai mai o le atunuu i le avea o lou lava Sui o se tasi o Sui Usufono i le Komiti o Tupe. Ua auauai mai ai le tele o matagaluega e faasoasoina se Tala o le Tupe e sili ona matua itiiti, se tupe laitiiti lava o lo o tau fuafuaina e le faiga-Malo. I lou lava la manatu ma sa tele ona ou talatalanoa i nisi o Sui mamalu o matagaluega, o leni lava e faasoa e Samoa leni tamai tupe a o fea ea se taimi e mafai ai ona faasoa e Samoa se \$100 miliona? O lona uiga ua ao nei ona manatunatu Samoa ma taitai o le Malo i se auala ina ia le toe saesaeina vaeane Samoa leni fasi-tupe itiiti, a ia faasoa pe tai \$3 miliona a le matagaluega e fai ai so o se mea mo le Malo o Samoa. O le ala foi lea afai e tagi mai matagaluega a le Malo ma le aufaigaluega a le Malo, o le upu moni e tau atu o le agaga e ootia pe a vaai atu i o latou totogi e laiti ae leai se mea e mafai ona faia e le Malo, aisea? O lo o nofo aitalafu Samoa i luga o Malo o papalagi, o lo o tatou nofo ma ola i se olaga mataga ma le le mafai ona tatou foia e tatou lava o tatou lava faafitauli, na ala ai ona mafua ona naunau e tuuina mai lona Malo ina ia pulea e ona tagata, tuu mai lona Malo e faasoasoa e ona tagata ma pulea i lana lava aganuu ma lana agaifanua.

O le mea moni ua na ona tau o lo taotu atunuu o se atunuu saoloto, le fua lea o lo o sisi nei i Tiafau e tilo laumea i ai le vaai ma tau laumea i ai le silasila a Samoa, a e ua na o se faaupuga, le upu lea o se "Malo Saoloto". O upu moni, e moni lava foi e itiiti totogi o ē e i totonu o le taulaga, ae ou te tau atu e faatoluina le mafatia o e o lo o i tua, o lo o faafogafoga mai itumalo; e faatoluina lo latou mafatia, aisea? E mafatia i luga o le lē lelei ona pulea e taitai o Malo, ua na o le faae'ee'e o avega mamafa ma tuuina atu a e a faapefea ona amo? E mafua lena ma ou te faupuina e au i lau lava faaupuga, mai i taitai latou te le lagona le ola tautua, "taitai e lei nofo tuavae, e lei faalogo i se upu mai i se matai, o lea, o lea, o fea e falala i ai, o fea e tulolo i ai, e faapena ona faagaoioi. E oo foi la i se taimi e seei ai matai ma nofo i nofo a matai, ua iloa ona fuafua aua e le mafai ona faatusaina totonu o le taulaga ma tua i nuu i tua o lo o latou faafogafoga mai i lo latou paia e lei iloa e taitai o Malo le vele o le vao a e ai e le loata le vae, vaeane Samoa. E le iloa foi e taitai o le Malo le tasi o le popo e i luga o le niu paoga a e a'e ai le toaina ulusina e tuu i lalo, toe alu ifo i lalo toe alu i le isi niu paoga e aumai i lalo le popo e tasi faaputupu na popo pe atoa se 6, sali se salimata aua se mea o lo o manaomia. Ae a tuufaatasi na mea e tele o lo o faia e ia toeaiina vaeatu le paia o lo o latou galulue ai, e tautua mai ia Samoa ona tuuina mai lea, ona tuuina mai lea faagaoioi e le au-matutua, faagaoioi lea e le au maumea, faagaoioi lea e le au-faiai popoto ma le au-faifaii ona manuia e e matutua ma e o lo o gaioi latou te faia.

O se tasi foi vaega lau Afioga le Fofoga Fetalai, o upu moni ma upu tautino e le tatau lava ona see ese Samoa ma ona Faavae. O le Faavae lava lea i le Atua e ao foi

ona manatunatu loloto i le Tala Autu o le Tupe o lo o tuuina mai. E tatau lava ona tatou manatunatu i se auala e foia ma faagaoioi ai leni tausaga 1983 mo le manuia o Samoa auiluma. O lona uiga e matua lagolagoina e lou lava Sui, ou te matua faafetai i le faiga-Malo lea ua tulai mai. Ou te faafetai i le auala leni ana o au foi e tatau ona ou matua fefe, ae tatau ona ou matua popole pe o le a se mea o le a ou faia e faamalie ai lou tagata-nuu; o le a se mea o le a ou faia e faamalie ai Samoa aua o se atunuu e le malie, o se atunuu e faigata ona faamalie, e faigata ona faaoleole la latou tofa, e faigata ona faupu la latou moe. Ou te faafetai foi i le totoa o taitai o leni vaitau ua tulai mai, ua le alo i mea moni, ua le alo i mea sao ae ua tuuina atu ai se vaega itiiti lava e mafai ai ona tau foia ma tau maua mai se vaega-tupe itiiti e tau tuuina atu i Malo i fafo i lo tatou nofo aitalafu.

O le \$20 lea o lo o laga e le Palemene ua maea foi ona i ai ni suesuega, ma o le upu moni e le o se mea fou i le lalolagi, e le o se mea fou ia Samoa ma le lalolagi atoa. So o se malae vaalele i le lalolagi o lo o i ai la latou tulaga lena le lafoga o le malae vaalele ua mafai ai ona totogiina e so o se sui e faimalaga ese ma le malae vaalele. O lona uiga e le o se mea e ao ona tatou nofonono ai, ae ao foi ona manatunatu Samoa latou i sana faiga mautu e mafai ai ona tuuina atu se totogi i e o lo o fai mai i totonu o le atunuu. Sa i totonu o le lau-fanua o lo tatou atunuu ma o la latou tala mai, e fai lava sina mafamafa, e fai foi sina tele, ae o le mea moni o le a taumafai pea i se auala e mafai ai ona ofi malie ai i agaga o e e fai mai i totonu o le atunuu, aua o le mea ua masani ai. O Ausetalia, Niu Sila ma le tele o atunuu o le lalolagi o lo o latou faia lena mea e tasi ma e le o se mea la e faapea e tatau ai ona tatou tei pe tatau foi ona tatou ofo pe tatou te mea i se mea lapoa o le a tuuina mai e faaopoopo i luga o tauau o ē o lo o fai mai i le atunuu. O le mea moni e ao lava i se vaega e tulai mai ai sona manuia ona faigofie foi lea ona faaofiofi i lagona. O le upu foi i lo tatou uso mai le motu o Tutuila ma Manua, e moni lava e tele o tatou uso o lo o i ai o lo o latou tau faimalaga mai ma galulue mai lava, ma latou faapea e oi i le \$20. O le upu moni o lea foi na saunoa le Kovana o Tutuila, faafetai e le o se mea tele lena mea ae avea ia o lena mea e fesoasoani atu ai Tutuila i le faiga-Malo a Samoa. E leai la se vaega e faapea o itiiti ai po o se vaega ua tele tele ai a o lo o i ai tonu le fua e ao ona fai ai.

O se tasi o vaega e fia tuuina atu lau Afioga le Fofoga Fetalai, o le lagona moni e ao ina faaleleia galuega taitasi a lo tatou Malo. E pei ona ou taua, e le alu se manatu o lou lava Sui e tau posiposi faapenei ni tupe laiti o lo o faasoasoa e le Malo, ae o lo o alu ou manatu, sa ou talatalanoa foi i Ulu o Matagaluega, i auala e mafai ai ona faaleleia le laufanua o le atunuu, e mafai ai ona faaleleia atiina ae o le atunuu. O lona uiga a lelei uma ia mea, o le a leai se tau omai i totonu o le Komiti o Tupe ma tau aveese lea vaega-tupe a e o le a i ai se tulaga e iu ina faasoa e so o se matagaluega le \$3 miliona i le \$4 miliona. E leai foi la se mea e ala ai ona toe tagi i so o

se mea aua ua tele vaega-tupe e tua i ai. O lona uiga lau Afioga le Palemia ma le Malo foi lea ua tulai mai, o upu moni e le milia faasuauu upu po o lo tatou i ai i totonu o le Palemene. Ia matua ave ae a latou tofa i luga, ia matua lalaga lo outou finagalo, ia lavapapale a latou taitaiga ae silasila ia Samoa o lo o ua matua oi. O le mafuaga o le oi, o le tele o lo tatou nofo aitalafu ua ala ai ona taugata mea uma ua le mafai ona faaleleia. O lea ua outou seei, e le aoga ona outou faalogologo tiga, ua ao ona outou faia so o se mea lelei e viia ai le Atua ae manuia ai Samoa ma ona tagata-nuu. Aua foi so o se tasi e faia mea lelei na te faia soo se mea e sili atu ona taua, o le lava na te faia mea silisili, o upu a le tusi, e manumalo pea.

E ao lava la ona silasila lelei pea aemaise o tatou nuu i tua. O upu moni e ese le mafatia, e ese lo latou pologa, o lo o latou taufai tagi i le mamafatu o lenei tau o oloa. O le mea ua tupu mai i le vaitau lenei ma le faitau atu ma le malamalama agai i ai, ua matua nofonofo lava le aufai-pisinisi, ua tele ina le aumai i luga le tele o oloa ua fenanatai. Afai o le oloa e \$1, e iu ina tuu mai i le mamalu o le atunuu ua \$2 ma le faaupuga ua matua le maua, ae o le upu moni o la e tele ma faulai. O agaga nei e ao lava ina ia silasila totoa i ai le Malo, e le o se mea talafeagai se saili o ni manuia o se tagata se toatasi i le soifua ma ola o Samoa. E le o se mea talafeagai le vaili pea o le manuia o le toatasi lava ia ma ona lava aiga a o lo o oi Samoa atoa.

O se manatu lautele ma o le aotelega foi lena o lagona. E ao ona silasila le faiga-Malo i se auala e mafai ai ona laugatasia ai Samoa i lona manuia auiluma, ia tutusa tagata uma, taatia ia ni faiga matai ma ni a nisi tulaga maualuluga vaeatu lo outou paia, ae tutusa ia a latou mea taumafa, tutusa i mea latou te feoi ai pei o taavale, o fale latou te nonofo ai. O lona uiga o manatu afai e taumasami ma taumamafa i 'steak' lo outou mamalu, o tatou uma lava e ao foi ona taumafa faapena o tatou nuu i tua, a e le o se mea talafeagai le feoi i taavale tioata ae tolotolo ma savavali le atunuu. E ao lava ona tatou faatusatusa i le vavevave o le taimi nei ma le auiluma o Malo uma o le lalolagi. Ua le iloa po o fea tonu le fale po o le maota e nofo ai le Palemia, ua laugatasia lava le maota o le Palemia ma le maota o lo o nofo ai isi tagatanuu. O lona uiga o le agaga faa-kerisiano lava lena, o le agaga faa-Atua lena ina ia laugatasia so o se tasi. Ia te au lava ma lou Sui Usufono o lo o faafogafoga mai foi lou itumalo. O upu moni, ou te le manao ou te milionea pe ou te mau tupe ae o lo o mafatia lou itumalo. Ou te le manao ia fue lau taga ia lava ae o lo o mafatia lo latou nonofo. Ou te le manao foi ou te ai i ni meaai e sili atu ona taugata ae o lo o latou pologa ma latou gaioi i se mea e sili atu ona taumafai i ai lo latou soifua ae le ausia ona o le taugata. So o se taimi lava foi ou te oo ai i totonu o itumalo, e vaavaai ma le faanoanoa i ia vaega.

O se tasi o vaega lau Afioga le Fofoga Fetalai, o le a amata ona ou tuuina atu auiliili laiti mai nisi o vaega e tataua ona tuuina atu mo lenei foi vaega o faamatalaga. E amata ona ou talanoa i oloa saoloto po o oloa o lo o

okaina tuusaoloto ('incentives'). O lea e ia te au nei le lisi lea o 'incentives' uma ma tagata uma o lo o faatalosaga ma latou mauaina e tai fia miliona ae e augapiu vaeane Samoa ma lana faafogafoga ma se Savaii e toatasi i le sailiiliga ma le auiliiliga i ai a le Komiti o Tupe ma ua matua taaalo ai ē e milionea. Ma ua atili milionea ai ē e milionea. O lona uiga o lo o faaoga itutasi mea a lo tatou atunuu, o lo o faaoga pito tasi le manuia o Samoa ma le tele o tupe maua ao lea e le o mafai ona laugatasia ai tagata uma. O lo o i ai le tele o faiga faa-togafiti o lo o faia i totonu o lenei mea. O oloa uma lava o lo o aumai i totonu o le 'incentives' e foliga mai o lo o sau lava i ni auala e aumai ai i totonu aiaiga o lea Tulafono ae o lo o faatau atu e tagata pe a oo mai i totonu o le atunuu i ni auala sese ma ni ala e le tataua.

O le Ofisa o Faatoaga. Lau Afioga a le alii Minisita o Faatoaga, o lea ua oo atu ou manatu i la outou aiga-Kapeneta ma le Palemia. O le mea moni o le itumalo lenei, e sili ona tele ma lelei lona lauelele o Salega. O le talo e pala, e pala le taamu, ae o le mea o lo o tupu, e le mafai lava ona aloaia lelei gaioiga a itumalo i tua mo le aumaiga o le latou tigaina po o lo latou pologa i fua o faatoaga o lo o gapatia ai itumalo. Ma o le mea moni e ao ona silasila totoa lau Afioga le alii Minisit. Afai ua sese nisi fatia ua sola, afai ua faaletonu nisi faiga-Malo ua tuanai, ua ao nei ona silasila i ai aua e mafai nei ona ou tauina atu e tasi lava le vaa atoa e tuuina mai i totonu o Samoa, e mafai e lo outou Malo ona fue atoa lena vaa. Ae o le mea ua tupu, seiloga lava ua le mafai ona outou maua ni talo mai nisi o le talafatai o Upolu po o nisi vaega latalata mai ona faatoa afea lea o itumalo mamao, ae o lo o latou oi ma pologa ma toto, toto pala. O le mea lea silasila totoa lau Afioga a le alii Minisita e ao lava ina ia matua laugatasia Samoa i le manuia e tataua ona i ai.

O lona lua lau Afioga le Minisita o Galuega, ua leva aso o tuitui nonofo ma papa nonofo lau Matagaluega o le SPDC ma lenei lava itumalo ma na amata lava ona o atu i totonu e faia galuega mo le auala, o fafaga lava e le itumalo; e tala gafa ma tala-api ma o le upu foi e fai atu i ai, ia outou alolofa, tausii lelei ma fai faalelei, o le agaga ia manuia la latou galuega i auala ma mea faapena. O lona uiga e tataua ona faalautele atu se manatu faapea, ua ao la ina faia sau faaiuga manuia, e tataua ona sua uma auala galue i totonu o lenei itumalo aua lo latou taumafai e fafaga lau aufaigaluega.

O le mea moni o lo o oi le vaega o le itumalo i tane nei sa faia i le taimi o le palota, ua tapei, tapei a outou popo ua le saliina. Aisea le mea ua ala ai ona oole le itumalo? O la ua afaafa tane. O isi tane o lo o kuata, o isi tane o lo o afa, ona tuu lea ua uma le faiga palota ua le faaogaina, aisea? O le fesili foi lena e tulai mai. E tau atu ma le amiotonu, e le o se faiga faa-tua lena, e le o se faiga tosina ai ni palota a e a maea ua le mafai ona faauma. O le mea lea lau Afioga le Minisita lea ua seei nei, faauma tane la. E le o se mea matagofie i le silasila a Tupu ma e'e o le itumalo le fai fai afaafa faapela. Ua maea foi ona feutagai lou Sui ma le Afioga i le alii

Palemia ma lana Failautusi, ua maea foi ona faaoo i ai ou manatu ua ao ina fai tane ia uma, e le o se mea lelei le tulaga lena.

O auala. Na sua sua auala i le aso Faraile ae aso Toonai le palota ma ai lava, ua le mafai ona uma ua na o le gaosa ma faatumu vale vaeane Samoa i totonu o ona laufanua i maa tetele na tasua ua leai se teuteuina ua oo i ai. Aisea? Ua ao ina faauma ia mea. E le o se mea talafeagai le tasua faulalai ai ae ua ao ona fai se faiga e teuteu ai. Lau Afioga le Minisita, faauma nei, faauma nei o se mea mataga le tulai mai o se faiga-Malo ae le mafai ona tua atu i ai le atunuu. Ua uma foi ona fesiligia lau matagaluega ina ua oo mai, ma o le tala o le Tulafono, e 5 aso e tatau ona sua ai se auala, a uma le 5 pe le uma pe a, e tatau lava ona uma iina. Ae o le upu moni lau Afioga a le Minisita, o la e silasila le Atua na o le aso Faraile, aso Toonai le palota o lona uiga e na o le tasi le aso na sua ai. E 4 la ni aso o lo o totoe e tatau ona toe sua ai auala o le itumalo.

Lau Afioga le Minisita o Galuega, o a tatou Vaipaipa. O le upu moni e pei o lea na ou taua, e le o manuia tane ia na faatino i totonu o le itumalo ma e ao ina faalelei. Ua maea foi ona ou oo atu i le Palemia ma lana Failautusi ma o le upu mai o le a fuafua. Lau Afioga le Palemia ua tatau ona fuafua ma fai, o le a leai se upu fuafua ae ua ao ona fai ona iloa lea o le manuia ma le manaia o la outou faiga-Malo. O upu moni, ua i ai vai o lo o i uta o le itumalo ua ao ina viliina, po o ai lava a outou Afioga i Minisita e agai tonu i ai lea vaega ia outou alolofa e faatino, o se mea le talafeagai le oi o le itumalo e fia maua se vai-inu ae o lo o tatou nofonofa ma auala e faatino ai.

Lau Afioga, ou te toe fia avatu pea se talosaga ona o lo o i ai se vaega tele o lo o fia talanoa ai e le o uma. E faamolemole atu i lau Afioga pe le mafai foi ona tefa le tauala i lau Afioga ia e finagalo malie e valuvalusia a'a o le fau o lo o tele nai mataupu e fia avatu. Pau lava foi lenei o le vaitaimi e oo atu ai ia le tausaga atoa e le toe feiloai ma se leo vaeane Samoa.

Faafetai i lau Afioga le Fofoga Fetalai. O le a oo sau faamatalaga i le Falemai o le itumalo. Ua lau silafia e Samoa le falemai o lenei itumalo ua leva ona mu.

Lau Afioga le Minisita o Falemai, ou te matua ofo i le Minisita sa i ai muamua i totonu o le Matagaluega o le Falemai, i le lē silasila totoa i le tele o le soifua aafia o le iutmalalo ma o lea foi ua maea ona ou tuuina atu le Lipoti tusitusia i le Minisita o lo o seei nei i le Nofoa ma avatu ai naunauga o le itumalo i se auala vave e faatino ai se falemai. Aua o le mea moni a taua lava i le agaga sao ua tele ē e maliliu o le itumalo ona o le mamao o le tūli. Suesue atu i le tulaga o le meaalofoa lea mai Iapani faapea o le meaalofoa lea na faatino ai le falemai i Leulumoega ma Salega, ae ua i ai se faaupuga faapea, o lea ua tuu nei i Sataua. O le mea lea o lea ou te tau fesili ai nei i lou Sui-a-Faipule po o ai na suia i Sataua lenei mea? Afai o faafogafoga mai se Sui na suia i Sataua le mea lenei ma le falemai lea o le a tuuina atu i totonu e ala mai i galuega fesoasoani a Iapani, na o le Atua la e

silasila. Ao Sataua foi vae ane o lo o afio mai lo latou faipule e tatau lava ona latou tautua ma mu mata ia Lega i lo matou va fealoai vaeane Samoa. O lona uiga e le tatau ona muamua lo latou nuu ae tatau ona muamua le mea o i ai Lega ina ia lelei lona falemai. Ae ui i lea, po o le a lava se faiga ua outou faia ai a e talosaga atu le Sui ua ao ina faatinoina. Ua maea foi ona ou tuuina atu i lau Afioga le Minisita le Lipoti tusitusia ma ua tuuina atu foi i aao o le Palemia. O le a lava se tupe e muamua mai i totonu o le atunuu e faa-mealofoa mai i nisi atunuu ia outou alofagia ua tatau ona fai aua e 21,000 tagata o lo o i totonu o lea lava itumalo o lo o oi ma ua le mafai ona maua so latou soifua lelei ona o le leaga o lo latou falemai.

Faafetai i lau Afioga ua lava ia ia manatu, a i ai foi nisi lagona e le o mafai ona tuuina atu ia o le a fesoasoani mai le Atua e faalatele. Ia alofagia e le Atua lou Nofoa, ia tafe toto ou ala, lau Afioga i le Tama a le Malo, ia lava pea lau toovae ma e taumafai e faatoatoa le Maota i tulaga e tatau ai. Ia maua lau tofamamao, maua lou soifua auiluma ma tului aso o lou soifua e aoga ai pea ia Samoa aua o oe o se Fofoga Fetalai aoga i le atunuu.

Ia manuia lau Afioga i le Palemia, lau Afioga i le Tootooalii, ia alofagia e le Atua lou tula'i i le foe o Samoa, ia manuia lou tulai mai. E matua tele le lauga e fia fai atu, le faafetai i le tele o au galuega lelei ua uma ona talanoa mai ai Muldoon le Palemia o Niu Sila. Ae ui i lea na o le Atua o lo o silafia au galuega lelei. Ia manuia a outou Afioga a Minisita o le Kapeneta, Sui mamalu e o le Palemene, ia maua la outou tofa Samoa. Manuia le tapuaiga i aiga e fia o le atunuu o tootoo au e fia o Samoa o a latou e puipui ai tapaa, ia maua la outou moe.

Ia manuia Samoa.

Tofa LEFUA LEAANA



Itumalo Faaalaalafaga:

Vaisigano Nu.2

Filifilia:

11 Mati 1982

Faatauto:

13 Aperila 1982

Lauga Faataupou:

2 Mati 1983

Lau Afioga i le Fofoga Fetalai, lau Afioga i le Palemia ma le mamalu o le Kapeneta faapa le paia o le Maota i sui usufono, le Susuga i le Failautusi ma le Ofisa o le Fono Aoao Faitulafono, ua faafogafoga le mamalu o le atunuu, le nofo a Ulu o Ekalesia e fia ae tainane le tapuaiga a le Susuga ia Malietoa le Ao o le Malo, le Fono a Sui Tofia faapea le paia ia Pule ma Tumua, Ituau ma Alataua, Aiga i le Tai ma le Vaa o Fonoti, faapea foi le paia i o tatou uso mai le Itu i Sasae ia Sua ma le Vaifanua, Fofa ma Aitulagi, le Launiu na Saelua ma Tootoo o le Faleula, Faatui o le Motu ma le Tama a le Manuatele.

Saunoaga Faataupou a Sui Usufono 1961-2011

Le paia o le Maota, ua i lumamea le Tala o le Tupe e pei ona tofa i ai le Afioga i le Palemia, o lea ua lauiliu i ai le tofa a le Maota ma le utaga e sailiili mamao aua se manuia o le atunuu. E itiiti nai mea e fia tautala i ai le sui usufono, e ui foi ina aafia i nisi lauga ua maea ona saunoa i ai nisi sui usufono o le Maota.

Muamua, o le siitaga o pili o aoga. Ou te manatu o le mea uliuli i le mata o matua o fanau, tulou. Po'o le a lava le maualuga, e naunau lava matua e faamalie alo o le atunuu. Ae peitai, ua ese le fuafuaga ua i ai, ae ou te talitonu foi e le tutusa le malosi aua o nisi o matua e lima vaivai i mea tau tupe, a manuia fanau e tutupu mai e atamamai ma popoto. O le mea lava o lo o vaavaai i ai, o le sailiili lava i tua i sailiga galuega i e o lo o maua tupe, ae a faamanuia foi fanau i le Kolisi o Samoa po o Avele, ia e taumafai lava. O le mea la lea ua i ai nei, pei ua faaopoopo mai se mamafa. Sa ma talanoa ma se isi alii e toalua ona alo i le Kolisi o Samoa ma o lana faamatalaga ua mamafa tele le avega, a o ia foi e lima vaivai, a o nisi foi o le vaega o le fanau, o lo o aoaoga i tua i tulaga-lua ma itumalo, o lea foi e taumafai nisi o le tatou atunuu e fau faleaoga. Ia o le mea la lea, le mamalu o lau Afioga i le alii Palemia ma le aiga Kapeneta, o le fautuaga, e le tutusa i tatou ma le lautele o le atunuu, e malolosi o nisi foi e lima vaivai i mea tau tupe a o lo o tutupu mai ai nisi atamamai e lumanai i ai le atunuu.

O lona lua ou te fia tautala ai, o le 13 miliona o le aitalafu i fafo mo oloa o lo o faaulufale mai. Ou te tautala ma lou faaaloalo, ou te le o faanoanoa tele i le 13 miliona le fuainumera, ona o lea lava e tau mai, o aitalafu mo oloa faaulufale mai. Afai ua faamaonia lea fuainumera, o le tulaga lea e i ai le atunuu o Samoa i tua i nuu e i ai matou, afai e le aitalafu i aso uma, ia e faaletonu foi a o aso uma lava e aitalafu le suka, fasimoli, karasini ma mea uma faapena. Ou te manatu foi o le auala lea e tataua ona i ai le Malo. E le faape ala ua ou faitioina le fuafuaga a lau Afioga a le alii Palemia ma le Malo, ae pau lava le fautuaga, ua mamafa. O le toatele i tua ia i matou nei, e tua mai lava i nai noga-tupe. Ia a o le mea lea u a i ai, a toe alu le noga-tupe i le taimi lenei, pe alu atu i le tolu afe pe fa afe, toetoe a oo atu foi i le afe le tului ma ua maualuga tele. Na o se fautuaga e faataatia atu i lau Afioga a le alii Palemia, o le mea lea e toomaga i ai le atunuu o le aitalafu; ou te talitonu foi e faapena foi ia te outou o e e malolosi, a le faia fuafuaga i aitalafu po o noga-tupe, e le maua le mea tele o lo o mafaufau i ai, vae atu le Fono.

O le isi mea ou te fia oo atu i ai, o le lafoga lea e \$20. Ou te talitonu o Samoa o se atunuu tusaafia i e mai fafo o tafafao mai fia maimoa mai i lo tatou atunuu. Ia o le fautuaga sa faapea lava o le \$5 i le \$10; e pei lava e taleni sa tuu atu i le lima, galue loa toe faaopoopo le lima, ia a o le lima agai atu i le \$20 ua mamao tele. Sa faapea e toe faaopoopo le \$5 i le \$5, a e le gata i lea, o o tatou uso mai Tutuila. Sa i ai le agaga tatou te o faatasi le \$5 lea ua sii i ai. Ui o lea, o le a lafo atu i lumamea, i lau Afioga i le alii Palemia ma le Malo, afai e manuia le atunuu o le mea sili lea ona taua i lou Sui.

O lau faamatalaga o le a oo atu i le aiga Minisita. Lau Afioga a le alii Minisita o le Soifua Maloloina, o le mea lea sa sau ai i tausaga ua mavae, e vaai le numera i le 10 sene a o le mea lea ua matau atu, sa ou i ai foi i le falemai, a ta loa le 8 ua 30 sene, a oo loa i le 4 seia oo i le 7 i le taeao o le \$1. Lau Afioga a le alii Minisita o le Soifua Maloloina, ua na o se fesili e fia malamalama i se taimi, po o silafia e lau Afioga, afai o silafia, ia e fia malamalama i ia vaega-tupe. O le tamaitiiti aoga e vaai le numera i le 30 sene a e o le pepa e ave i le faiaoga e faamaonia ai le mai e 50 sene. Ou te lagona ua mafatia alo o le atunuu lau Afioga, a olea foi ua taugata le aoga. O nisi foi o le aufaigaluega a le Malo sa fai fua o latou pepa mai, o lea ua lavea faatasi uma a o nisi foi sa matou i ai i le falemai, ua lau atu lava le gasegase ia ma avatu le sipuni, iputi ma lavalava, vae atu le Maota ma le faafofoga a le atunuu. O le mea la ua iloa pei ua aliali mai se faalavelave ua tupu i le falemai. Ia le Malo faapea foi le alii Minisita, o mea e fia malamalama ai, pe ua feauga lelei le fuafuaga a lau Afioga?

O le isi mataupu ou te fia avatu ma le faaaloalo, i lau Afioga a le Minisita o Galuega o a tatou ala-galue. O le tasi lea mea sili ona taua i le au galulue, i e o lo o taumafai mai le manuia o le atunuu. O le matou taamilosaga lea e masani ona alu i tua i Upolu ma Savaii, o lo o gata ala i mea e gata ai toganiu, koko a o mea fou ia ua galueaina i ona po nei, o lo o i ai le tamaoaiga o le talo ma le taamu e lei oo lelei i ai o tatou ala. E faamanatu atu la i lau Afioga a le alii Minisita, ia faaauau lea polokalame e sii ona taua ma o lo o manaomia foi e le aufai-faatoaga.

Ma lou faaaloalo lava, e faaali atu, ou te iloa foi, o lo o faia pea le uafu lea i lo matou motu i Salelologa. O fale o i ai e lelei i le taimi laofie ma le la, a e a oo loa ina timu, ia ua pala atoa totonu o le fale, e le lelei i le matamata a malo mai fafo. O le mamalu o le atunuu e nonfo i lalo i le sima a e laitiiti foi nai nofoa o lo o i ai. Ua papale mai lau Afioga a le alii Palemia ma le mamalu o le Malo, ia e fiafia foi le agaga aua o lau Afioga o le tatou motu, faalelei fale o le tatou uafu lea i Salelologa. A e le gata foi i lea, ua taugata pasi ma vaa, a e pei o lea lava e maua ni nai vaa taugofie saosaoa ma le lelei, o lo o faatasi lava le mamalu o le atunuu faatasi ma taavale, vae atu le faafofoga a le atunuu ma le Fono mamalu.

O nai mea ia o lou itumalo, a e le umi lau lauga. Ou te faafetai i le fesoasoani lea ua aumai mo le falemai o lo matou itumalo, mai Iapani ma ua uma foi ona oo atu le malaga ma ua pasia foi. Lau Afioga a le alii Palemia ma le faaaloalo lava, e mafua na ou faamanatu atu ina nei i ai se fesuaiga, a e ou te talitonu ua mausali ma mautu lea fuafuaga i Sataua ma Leulumoega. O le tagi talatala foi a Lega, e moni lava, a e tasi o le mea, e te silafia foi le tu feagai ai Lega, lau Afioga a le Sui mamalu, o le tama tane ma le tama teine, e faamuamua lava le tama tane, vae atu le Fono. O lea ua i ai le falemai i Sataua a e tapuai lava le itu o Salega pe a sii atu ma taunuu le faamoemoe.

Lau Afioga a le Minisita o Galuega, ua i lou Ofisa le faatalosaga ona o le faatanoa lea e ia i matou, ua leva ona fausia pe o le valu tausaga a e lei sua lava. Ma le faaaloalo, o le upu lava e lei taunuu le vaega-tupe. Afai ua i ai lea fuafuaga e tataua ona faataunuu aua e leaga le tutu ai i o a e lei se mea o i totonu, toatle foi tagata na maimoa i ai e le o sua. E le gata foi i lea, o le fuafuaga o lea tane, o le itumalo atoa e pau i le Falelima ia a e lei taunuu le faamoemoe ona e lei sua lava le faatanoa.

E faapea foi ma le Eletise, ua i ou luma foi le talosaga, o se tasi o vaega a lo matou nuu e fia faaoo atu i ai le fuafuaga lea, lau Afioga ma le faaaloalo.

O fuafuaga o ala foi ia e alu atu i le SPDC lea ua i ai matou. Ua ma fesootai am le sa seei i le nofoa, ua i ai i totonu le ala lea e i Papa o matou, o le fuafuaga lea. Ma ou te talitonu e tasi lea nuu e tele i ai maimoaga mai fafo, e lafulemu lona matafaga, tulou ma mea uma lava, afai foi e fai le auala ia atonu e i ai se manuia o se Malo i se taimi. O lea ou te talosaga atu ai ua i ai i totonu o le polokalame lea a le SPDC, ina ia galueaiina ma faataunuuina le faamoemoe.

Lau Afioga ma le mamalu o le Palemene, ona o le Malo e tataua ona o faatasi ma Ekalesia. Ou te manatu ia liliu ane i ai le tofa a lau Afioga a le alii Palemia, aua o le a gatasi a le Ekalesia ma le Malo, o el manjia lea e agai i luma. Ma lou faaaloalo lava.

Lau Afioga a le Fofoga Fetalai faapea le mamalu o le Maota, le Palemia ma le Kapeneta, Sui-a-Faipule ma le Ofisa, a i ai se sese o le lauga, ia faamagalou sou leo. Ia manuia le Fono.

Tofa MANOO LUTENA



Itumalo Faaalaalafaga:

Falelatai & Samatau

Filifilia:

11 Mati 1982

Faatauto:

13 Aperila 1982

Lauga Faataupou:

2 Mati 1983

Ia e faigata, ua e aumaia le tali sa ou faapea o le a tuu atu pea ia i ou uso a sui usufono e aumai se tali mai ia i latou.

Lau Afioga i le Fofoga Fetalai, ou te muamua ona ou faafetai atu i lau Afioga i le taitaiina o la tatou Fonotaga. E ui lava ua i ai nai itu e popoe ai le mafaufau, ae taltionu i le tomai o lau Afioga i le faafoeina o le tatou Fonotaga. Ua maea foi ona e siitia la tatou faafetai i le Atua i lenei taeao, e ui i lea e le uma foi lo'u fia faafetai i le Atua ona o Lana pule faasoasoa o lenei ua fesilafai ai i Tiafau nei le mamalu o le Palemene. E ao foi ona ou faafetai i lau tapuaiga Samoa, le paia i Tama ma o latou Aiga, Aiga ma a latou Tama, Tumua ma Pule, Ituau ma Alataua, Aiga i le Tai ma le Vaa o Fonoti.

E le gata i lea ae ou te faafetai foi i le tapuaiga a le Auaigaluega a le Atua i Fata Faitaulaga e fia. Ou te fia

molimoli atu la'u faafetai faapitoa i lau Afioga i le Palemia faapea le paia i tamalii ma failauga o lou itumalo o Faasaleleaga Nu.1, o le paia lava lea i le Aiga-Salevalasi i la outou faaaloalo faatupu sa outou tauaao i ai i le taimi ua fano mo le Maota lenei. Faamalo le teu faatupu, faamalo le aao malosi, ia toe faatutumu e le Atua mea ua gaogao ona o lo outou alofa faaalua. Faafetai foi ua toe talii mai lou lato i le ea i le manuia, ma e ao lava ona tatou viia le Atua i mea uma.

Ou te fia faafetai foi i lou itumalo o Falelatai ma Samatau i la outou tapuaiga, o outou paia ma o outou mamalu o le a ou le taua, aua e tumau mai le amataga seia oo i le gataaga. Ae ou te faamalo atu i a outou talosaga aemaise a outou fautuaga faifai pea. Le paia e o Aiga i Falelatai, a e tainane oe Leulumoega ma ou tapaa, a e tapuai maia ae sei ou taumafai atu se manatu aua so tatou sao, tau ina ia faitau ane ai i tatou i upufai a lo tatou Malo.

A e ou te lei tautala auiliili i le Tala o le Tupe, ou te fia faataatia atu se manatu e tataua ma onomea i lenei taimi e fai lea ma faavae o le manatu o Manoo i lenei fonotaga. Ua matau atu ua olioli mai foi Le-Tagaloa e fia faauilavea i le faamatalaga. Ia, ia malie maia oe le uso....

Faafetai i lau Afioga a le Fofoga o le Fono. E moni lava lea, o le agaga ia te au nei ou t le fia faaleaga i se tasi. Ma e pei ona maua mai, o Le-Tagaloa ou te fiafia tele i ai, ae ui lava ina faaletonu lana "tender system" ae ou te fiafia lava i ai.

Lau Afioga i le Fofoga o le Fono, ou te fia aumaia le manatu lenei o lo o tauina mai i la tatou Faavae. O le manatu lea e fia faa-autu i ai nai ou manatu i lenei taeao, o lo o maua lea i le itulau e 7 o le Faavae o le Malo o Samoa i Sisifo. Fai mai e faapea - 'O le Atua e alofa e faavavau.' O lona lua faimai, ua tataua ona i ai le faamautuina i tagata uma o a latou aia tataua faavae. Lona tolu, o tulaga pulea le faaituau, le amiotonu e tataua ona matua tausia atoatoa. O manatu ia e tolu lau Afioga a le Fofoga Fetalai ou te fia faamamafaina i lenei taeao, ma e faa-autu i ai lau tautalaga.

Lau Afioga a le Fofoga Fetalai, ou te fia faalauaitale nei mea e tolu e pei ona ou taua.

1. O le Alofa. Fai mai le Faavae, "O le Atua e alofa e faavavau." O le fesili o le a tonu lenei mea o le alofa? Fai mai se tasi tala i le tusi a Paulo ia Korinito, - 'Afai ou te tautala i gagana a tagata atoa ma agelu ae lei sou alofa, ua avea au ma apamemea taalili po o se sumepalo tagitagi. Fai mai o le alofa e le saili e ia ana lava mea, e le faaitaita gofie, e le tuuina atu i nisi le leaga. Ia faamamafa le mea lea, o le alofa e le tuu atua i se tasi le leaga, e le fiafia i le amio leaga a e fiafia i le faamaoni. Fai mai le Faavae e pei ona ou taua lau Afioga i upu tomua, e manaomia e le atunuu ia tatou ina ia tatou amiotonu. Fai mai e onosai mea uma, e le uma le alofa.
2. O le Aia Tataua a Tagata Uma. Ia lau Afioga a le Fofoga Fetalai, e pei ona taua o lo o tauina mai i

le Faavae le aia tatau a tagata uma, peitai ane, ina ua matau atu i le Tala o le Tupe ma fuafuaga a le Malo o lo o i ai nei, e foliga mai lau Afioga o le a aafia aia tatau a tagata uma, lau aia tatau ou te filifili ai. Pe ou te fia 'ai i se apa eleni, tulou o le upu e to ia te au, po o le a le ituaiga apa eleni ou te fia 'ai ai, tulou le Maota a o le a le mea lea o le a tulai mai? Lau Afioga i le Fofoga o le Fono, e leai sau filifiliga o le a fai. E i ai le upu faa-Peretania foi lea - "You stuff down your throat". O lona uiga lau Afioga, e tuu atu pea o lona o lona. Ia sa i ai lou faamoemoe lau Afioga e le oo mai i Samoa uiga faapea faa-pule faa-Komunisi po o pulega ua aafia ai le aia tatau a le tagata Samoa e pei ona taua mai i le Tulafono Faavae.

3. Tulaga pule le faaituau. O le amiotonu e tatau ona matua tausia atoatoa o mea moni e tatau ona manaomia i totonu o le Maota leni lau Afioga, e le tatau ona aumaia ni tulaga faa-ituau. Aisea? Aua foi o a outou Afioga ma tatou ua tofia i le tofi Faipule, o tama o le atunuu. Afai o tatou o tama o le atunuu, ia faapena ona faaali a tatou amio. E le tatau ona i ai ma faapatu i totonu o le Maota leni. Aisea? Aua tatou te galulue faatasi mo le manuia o le atunuu. O le mea e tatau ona fai e pei ona molimau mai ai se tasi Tusitala, e faapea lana faaupuga - "O leni pe tou te aai pe feinu, po o se tasi mea tou te faia, ia outou faia mea uma lava ia viia ai le Atua." O mea tatou te faia afai o ni mea e le viia ai le Atua a e viia ai oe, ua e manatu faapito. E le gata i lea lau Afioga, fai mai foi se tasi Tusitala - Ou te faasilasila atu i tulaga uma i mea uma lava....

Faafetai lava lau Afioga. I se tusitusiga a se tasi o faapea mai se faaupuga - "Ou te faafiafia atu i tagata uma i mea uma lava, o lo o le sailia e au lou lava lelei, a o le toatele ina ia faaolaina ai i latou." O lo o tauina mai le Faavae, lau Afioga le le faaituau. Ia tatou faia mea uma ma le amiotonu mo le manuia o Samoa. O lea e tauina mai i tusitusiga i le Afioga a le Atua e tau mai ai, aua o le faavae o Samoa o le Atua. O lea la e fai mai ai ina ia tatou faia mea uma e faafiafia lou uso a tagata, 'aua nei e faia se mea mo oe ma lou lava lelei.

Lau Afioga i le Fofoga o le Fono, o leni ua i ou luma faapea le mamalu o le Maota le Tala Faatatau o le Tupe 1983 faatasi ai ma Lipoti ua tuuina mai e Komiti o leni Maota i se taimi, ona ou tautala lea i ai.

A e ave ia o leni taimi ou te molimoli atu ai lau faamalo ma le faafetai i lau Afioga ile alii Palemia ma lau Kapeneta i la outou galuega fita na outou tau aao i ai. O leni ua i luma le Tala o le Tupe i le Maota, ou te talitonu e lei faapaole la outou Laulau. Ou te talitonu foi sa fai i le mea e gata ai lo outou silafia ma lo outou malosi. Faamalo le fai o le faiva. Malo le tautua i le atunuu. E ui la o lea, a e ou te faapea atu foi lau Afioga i le alii Palemia ma le mamalu o le Kapeneta, 'aua foi nei teena pe paopapa i la outou faafofogaaga ia ni manatu o

le a tuuina atu, aua o la tatou galuega e fai tele, e le faipitoina. E pei ona moni ai se tasi upu, "o le tele o lima e mama ai se avega", o le tele o ni manatu o le a manuia ai ni fuafuaga. Ua faataatia mai nei la e le Malo a latou fuafuaga mo le atiina ae o le tamaoaiga ma le soifua lelei o tagata-nuu o Samoa.

E le gata i lea a e faapea foi ona faailoa mai fuafuaga mo le faatinoina o lea faamoemoe, e auala lea i le Tala o le Tupe Maua ma Tupe Faaalu. I lau matau atu la i le Tala o le Tupe 1983 e foliga mai o lo o faavae le Tala o le Tupe i mea nei - 1. O le faaletonu o a tatou tupe faaagaga mo feaatauaiga; 2. O le maoae o le nofo aitalafu o le Malo faapea Kamupani ma Faalapotopotoga a le Malo i le Faletupe, o le Malo ma Faletupe o i Samoa nei; O le maualuga o le tau o le soifuaga faatasi ai ma le faaitiitia o le malosi o Tupe Maua a Tagata Taitoatasi i mea nei e tolu, e pei ona matau atu i le Tala o le Tupe, o lo o faavae ai le Tala o le Tupe 1983. Ua ou tauina foi mea ua tuuina mai e le Afioga a le alii Palemia ma lana Kapeneta ia togafiti e faamalolo ai le gasegase o le tamaoaiga o Samoa. O lea ua opea i le Maota le Tala o le Tupe 1983.

Faafetai i lau Afioga. E leai, o 'notes' (tusitusiga) mea ia e le o se lauga e pei ona atugalua i ai lou uso-a-Faipule po o le Afioga a le alii Minisita o le Falemai. Ma o lea la lau Afioga....

Faafetai o lea la ua maua atu, o le Afioga a le Minisita o le Soifua Maloloina. Ma e faamalulu atu foi i le Minisita o le Soifua Maloloina, ai o alu lou mafaufau, tulou i si au fuaiupu foi lea sa taua o lo o tau ai le gasegase po o le mai.

O leni la lau Afioga a le Fofoga Fetalai, o lea ua tuu mai le pepa o le Tala o le Tupe, ma ou te faatusaina la e pei ona taua e se tasi o ou uso-a-Faipule, o lo o gasegase le tamaoaiga o Samoa. Ma o lea la ua sii atu le gasegase o le tamaoaiga o Samoa e fia maua se fomai e aumaia se 'diagnosis' (togafitiga) e tau mai ai le faalavelave o lo o i ai le faatafa gasegase. O lea la ua tuuina mai e le Fomai ia le pepa e ave i le Fale-Talavai o le Apia Pharmacy e tala mai ai vailaau e pei ona tusia e le Fomai. Ia ma o vailaau nei o lo o tusia e le Fomai e pei ona opea i luma o le Maota.

1. Ia tipi i lalo le manao o le mamalu o le atunuu i latou manaoga.
2. Taofiofi aitalafu a le Malo faapea ma Kamupani ma Faalapotopotoga a le Malo i faletupe o lo o i Samoa nei.
3. Ia uunai ma faamalosi pisinisi a le mamalu o le atunuu e ese mai ai i lo le Malo.
4. Ia lagolagoina taumafaiga mo le faaleleia o fua o faatoaga faapea oloa e gaosia i Samoa mo le auina atu i fafo.

Ae le gata i lea o le uunaiina lea o fale gaosi-meia ina ia faaitiitia oloa e auina mai fafo. Ia o le 'prescription' (vailaau) lena lau Afioga i le Fofoga o le Fono, ma o le pepa foi lea lea ua ave i le Apia Pharmacy e aumai ai vailaau.

Saunoaga Faataupou a Sui Usufono 1961-2011

Lau Afioga i le Fofoga o le Fono faapea le mamalu o le Maota, o lena ua faataatia i outou luma le faafanua o le sini ma le faamoemoe o le Malo mo le foia o le gasegase o Samoa i le tamaoaiga. A e o le faatinoina ma le tuuina atu o nei vailaau, ia o le mea la lea o lo o atugalua ai lou nei tagata. Fai mai le togafiti i le pepa lea, ua ave i le Apia Pharmacy e lua au fualaau e foloia i le tai 4 itula. O lea ua fai mai le pepa ina folo uma ia le fagu lena ua tuuina atu o le a e malosi ai.

Faamolemole lava lau Afioga i le Fofoga Fetalai e mamao tele ia au lea tulaga o lou taufaaleaga i le Afioga i le Palemia ma lana Kapeneta. Leai, o lau faatusa lea e avatu ina ia faamalamalama ai nei ou manatu. Ae leai se agaga ia te au ou te taufaaleaga i ou Uso-a-Faipule.

Faafetai i lau Afioga. Ia o le a faapea ia ona fai, o le a tatou tuu i le Atua o lo o ona silafia mea o i totonu o tatou loto. Ae o le agaga lava ina ia avatu se manatu faatatau i lenei Tala o le Tupe.

Ia ma e fia tuuina atu loa la nai manatu e faatatau la i togafiti ia e pei ona taua. Ae o le a ou le toe taua Fale-Talavai.

Muamua la, i lau matau atu i le Tala o le Tupe o lo o taatia nei i luma o le Maota, e foliga mai o le Tala o le Tupe o lo o fausia mai i Uosigitone DC i Fale o lo o faaogaina e fausia o lenei mea o i latou uma o lo o omai i lea atunuu. O le mea la e fai ai sina popo'e o lou mafaufau o i latou ia e le o silafia tulaga o le tau ma tulaga o lo o feagai ai i tatou i Samoa nei. I lau matau atu la, e leai se eseese o le Lipoti lea a le IMF ma le tulaga lea ua i ai le Tala o le Tupe lenei. O le popolega la ia te au e ese mea e malamalama ai i latou i o, ese mea e malamalama ai i tatou iinei ma tulaga o lo o i ai nei.

E i ai se tusitusiga a se tasi alii lauiloa o Henry Kissinger o lo o i ai faaupuga faapenei i ana tusitusiga. Muamua e faapea - "O le tulaga matautia o lo o i ai nei o lo o aofia ai se luitau. O le gaoioiga muamua lava o le faaititia lea o oloa e faaogaina, faaititia oloa e faaulufale mai a e faateleina oloa e auina atu i fafo. E le aoga fuafuaga patino tonu lava tau le tamaoaiga". O upu ia a lea alii lauiloa i le lalolagi. Ona o le lava o lou taimi o le a ou le faitauina uma atu ai mea ia lau Afioga, a e a'e faatagaina mai ia o le a alu atu.

O le vaega lona lua o lo o taua mai faapea i le tusitusiga lava lenei. I feaatauaiga saoloto e maua e tagata uma le faamanuiaga. O toatuga tau tiute ma isi itu tau feaatauaiga e faatuputeleina ai le le lelei ona faatinoina, taofiofia ai tulaga faa-pisinisi ma pau ai foi le tulaga aoao tau le soifuaga.

Lau Afioga i le Fofoga o le Fono, o le uso lea o Kissinger ia o ia lea sa Failautusi o le State i Amerika. O ia foi lea o se Polofesa o Tamaoaiga i le Iunivesite e taua o Harvard o le taimi nei o le Susuga a Kissinger o se tasi lea o faufautua i le lalolagi i faalapotopotoga e lauiloa i le lalolagi.

Lau Afioga i le Fofoga o le Fono, se ou te manumanu ina nei tei ua uma lou taimi i fesii a Sui mamalu ia, ae fia malamalama iai ia e mafai lava ona aumai i tua le fesili ma ou fesoasoani atu i ai.

Faafetai a e o lea ua ou vaai atu i lau uati e 15 minute ia sa faauilavea ai Sui mamalu. Ia o le a ou taumafai atu i vaega la lona lua i le Tala o le Tupe lenei lau Afioga. Ou te faatusaina o le faavae o le fale ua fausia ma o le faavae la lea ua taumafai atu nei le alii kamuta ina ia faatopetopeina ma taumafai foi lea i le upu faa-Peretania ua 'cut corners'. Ua faapea atu ai loa le kamuta lea - "6 suo oneone ae tasi le suo sima". Ma ua faapena loa ona fai ma o le mea la ua oo i ai, ua faale-manuia le faavae. I le tulaga la i le Tala o le Tupe lenei lau Afioga ou te faatusaina i le mea lea. Ua 6 i le 1 o lona uiga o le faavae o le Tala o le Tupe lenei e i ai le tulaga e pagatia ai le atunuu i taimi o i luma.

Masalo lau Afioga i le Fofoga Fetalai, e lei maua mai e le Minisita na ou fai atu e 6 oneone a e 1 le suo sima. Ia taatia ia faapea ma o le fuafuaga la e faamallosia ai le manatu lea ou te tau avatua lau Afioga.

Lau Afioga i le Fofoga o le Fono, sa e taua e aumai lava le taimi aua ua tele le faauilavea o Sui mamalu. Ona ou faapea atu ai lea faapuupuu atu mea nei - Lau Afioga i le Palemia e fia maua sina faamalamalama i le tulaga ile tatou 'tender system' (tauofoga). E fia maua se faamalamalama i le tatou 'Monetary Board' (Komiti Faafae o Tupe) e fia maua se faamalamalama i le tatou vaega lea o le Komiti o Tulafono.

O le tulaga le 'STABEX' o lo o fia maua se faamatalaga i lea tulaga i le totogi o le aufaigaluega, aua o lea o le a sii nei le primage duty i le 8%. E fia maua foi se tulaga lea i le faamatalaga i le tului o tupe'interest rates'.

Lau Afioga i le Minisita o le Gataifale ma le Auala-Tele ma mea faapena, e fia maua se faamalamalama mai le 2 miliona lea o lo o taua le 'ForeignCapital Project' o lo o taua i le Vaega e lua o le Tala o le Tupe. Ou te fia malamalama ai lau Afioga i le Minisita pe o i ai i totonu iina le tupe lea sa tatou talanoaina ma ioeina o le a fai ai o matou auala mai Mulifanua e tau i Samatau ma Falelatai.

Lau Afioga i le Minisita o Aoga sei e tagai ane i le Kolisi o Samoa. O le 'facilities' o lo o i ai i mea o nofoa ma mea faapena ua matua leaga lava. Sei e silasila ifo foi i le pili o tamaiti aoga.

Lau Afioga i le Fofoga Fetalai, o le mea lea ua ou fia soso atu ai i lau Afioga leaga o au lea sa aafia i lau faaiuga i le mea foi lea ma le vaega lava lea o le gasegase ma vailaau. Sa e taua mai foi i lau faaiuga o na upu e i ai le faauigalua. A o lea la ua tulai mai le Sui lea o lo o i ai i lana lauga....

Tofa MATATUMUA MAIMOAGA

**Itumalo Faaalaalafaga:**

Aana Alofi Nu.1

Filifilia:

11 Mati 1982

Faatauto:

13 Aperila 1982

Lauga Faataupou:

4 Mati 1983

Lau Afioga i le Fofoga Fetalai, o le matua o la'u lauga i lenei taeao: "E taua

ma pele Samoa ia te a'u". Ou te talitonu foi i lau Afioga e faapea foi ona taua ma pele Samoa i lou finagalo.

E faapea foi i le Afioga i le Palemia ma le mamalu o le Kapeneta aemaise foi i sui mamalu o le Palemene. Aisea? O le paia ma le mamalu o lenei faatafafa, o le mamalu lava lea ia Tumua ma Pule, Ituau ma Alataua, Aiga i le Tai ma le Vaa o Fonoti. O le paia foi lea i Aiga ma a latou Tama, Tama foi ma o latou Aiga. Ou te talitonu foi o le e'e ma le tapuai o Lana Afioga Mamalu O Le Ao o le Malo o Samoa, Susu o le Malietoa, e faapea foi ona taua ma pele Samoa i lona finagalo. E le gata i lea o le Afioga i le Sui o le Fono a Sui Tofia, Afioga Tupua Tamasese, ou te talitonu foi o le faatumutumuga lea i finagalo o le Afaigaluega i Fata Faitaulaga e fia i Samoa. E le gata i lea, ou te talitonu ona e le mafai ona suia lo tatou Faavae, e faapea foi ona taua ma pele Samoa i finagalo o Amerika Samoa i le Maota Mauaialuga ma le Maota Maualalo, aua o le mamalu lava lea ia Sua ma le Vaifanua, Fofu ma Aitulagi, Tama a le Manu'a ma Tootoo o le Faleula faapea Saole ma Saleaamua ma le Launiu na Saelua.

Ou te talitonu ma le mautinoa ma molimauina o loo faapea foi le agaga mauaialuga o loo i ai i lou Itumalo o Aana alofi Nu. 1. E faamalo atu faafetai, faafetai atu i le paia o le Aiga Sa Tuala, ia te oe le Tuua ma le mamalu o le Falefitu ma le igoa matua, e faapea foi i aiga e tolu ma le mamalu o le Faletolu ma le Fuai fale, faamalo faafetai i la outou faaea ma le faaloalo la outou agalelei ua mafai ai ona avea lou nei tagata faatauvaa sei vaeane le paia o le Maota ma le mamalu o le faafofogaaga a Samoa e fai ma se tasi o o outou sui usufono i totonu o le Palemene, e avatu ai se sao aua le faaalagamaea i totonu o le atunuu.

Ua faamalo faafetai i lau Afioga i le Fofoga Fetalai, ua e saunoa ma ua muamua lava mea i Matautu Sa. E tatau o loo faataatia mai e o outou tuua ma ni o matou matua le faavae mausali ma maopopo o Samoa, e Faavae lava Samoa i talitonuga faa-Kerisiano i tu ma agaifanua, o lea ou te talitonu ua manuia ai Samoa.

Ua 21 nei tausaga talu ona Tutoatasi lo tatou Malo. O lea foi 21 tausaga, e le mafai ai ona faagasolo a tatou galuega e aunoa ma le toe tepa i tua, o lea foi lau Afioga, e ui atu i lau Afioga i le Fofoga o le Fono, e le mafai ai ona faaitiitia le agaga faafetai, o le agaga faamalo i Taitai o le atunuu, o i latou na mua i malae. Lau Afioga

Fiamae o lo tatou uluai Palemia, lau Afioga Tupua Tamasese, faamalo faafetai i galuega lelei sa punouai ai ma tautuaina lo tatou atunuu. E ala atu ai foi lea agaga e tasi lau faamalo atu ma le faafetai i lau Tofa Tupuola, tamalii ma failauga o le atunuu sa outou galulue faafetai atu i mea sa outou taumafai i ai mo le manuia o Samoa. E leai se faiva e leai se maumau, e faapea foi ona oo mai lau faafetai i le Afioga i le Aloalii, le Afioga ia Vaai ona o lea taimi puupuu sa tulai mai ai e faafoe le sa o Samoa, faamalo le galue, faamalo le taumafai, talosia ia alofa le Atua ma faafualoa lou soifua, e afio mai pea ma avea pea oe o se tasi o tama matua o le atunuu e te faufautua ma fesoasoani mai auala auga e tasi, e taua ma pele Samoa i lou finagalo e faapea foi i le aoao o lenei Maota.

Ua taatia i luma o le Maota lau Afioga i le Fofoga Fetalai le Tala Faatautu o le Tupe ua fuafuaina e le Afioga i le Palemia ma lana Kapeneta. O lona ua taatia i le Maota, ua faafofoga Samoa, ua avatu foi se finagalo o lenei Itumalo e pei ona saunoa lou uso a sui usufono, lau Afioga Leaupepe e lagolago i lenei Itumalo ma fuafuaga lelei ua alo atu i ai lau Afioga ma le Kapeneta. O le a le faamaoni pe a faapea atu o se Tala o le Tupe mamafa, e mamafa le avega. Ona ou toe fesili lea pe aisea aua ou te talitonu e pele ma taua Samoa i le finagalo a lau Afioga i le Palemia aemaise lau au Fono i le afio i Afioga i Minisita.

Ona tupu mai ai lea o se manatu e le tau matea, sa toe silasila lau Afioga ma le mamalu o le Kapeneta, o le 21 tausaga lenei ua savalia e Samoa talu mai ona Tutoatasi, e faigata le ala ao lea ua oo mai i lenei taimi ua faataatia mai e lau Afioga ma le mamalu o le Kapeneta, se tala e ono mafai ona faapea o se Tala o Tupe mamafa. Ae ui o lea e pei lava ona ou taua i le taimi muamua o Aana Alofi Nu. 1, matou te lagolago atu ma talosia ia alofa le Atua ia faa-auala mai i lenei Tala o le Tupe se tulaga ina ia mafai ai oan toe oo le tulaga tamaoiga o Samoa i le maopopo.

Afai o le a faia se galuega, ou te talitonu lava e fuafua ma maua faatautaga ma manatu e faia ai lea faamoemoe ona ua e silasila i tua, ua mamao foi lau silasila atu i luma, ona faia ai lea o lenei faaiuga i lenei taimi, ua tu lauelele lo tatou Sa i lenei vaitau o lenei tausaga.

O saunoaga ma fetalaiuga i nei aso e fa ua tuanai atu, ua faafofoga le atunuu o lo tatou aumaia o nisi o molimau ua le lelei lenei Tala o Tupe ona ua mamafa tele, sa tatau ona tatou aumai i vaega. Ae i ai foi nisi saunoaga ua aumai ma faafofoga le atunuu aemaise o sui mamalu o le Palemene, lau Afioga ua le alofia.

O lau talosaga i lau Afioga i le Palemia, ona ou te talitonu e taua ma pele Samoa i lou finagalo aemaise le mamalu o lau Kapeneta, taatia atu ai i tafatafa o lau Afioga ina ia manino le faamalalamalama a le atunuu ma lenei Maota ina ia aveese le popole ma le fefe aua ou te talitonu o ni vaega ia o lagona na faananau mai pea le malamala sei vaeane le mamalu o le Maota.

Lau Afioga i le Palemia e ui atu lea i le Fofoga o le Fono, sa matua faafiafiaina lenei Itumalo ina ua maua le tofiga a lau Afioga ma lou finagalo o le a faatuina se tasi

o Matagaluega ma avea ai lau afioga o se tasi o Minisita o mataupu tau totonu (Internal Affairs). E mafua ona faafiafiaina lenei Itumalo ona matou te talitonu o le itu lea e mafai ai ona foia nisi mau faafitauli aemaise o le atiina aeina o le atunuu. E i ai ma le faamoemoe maualuga o lenei Itumalo, afai e tau ai lou finagalo o le a mafai le avea o lau Afioga ma Minisita o lenei Matagaluega ua tau maoti mai, o mataupu i totonu o le tatou atunuu, o le a mafai ai foi ona fesilafai ma lau Afioga i ni taimi talafeagai ai ina ia mafai ai ona e faafofoga atu ma mafai ai foi ona faafofoga mai, tamalii ma failauga i tulaga o i ai lou faamoemoe i le atina aeina o le atunuu.

O se tasi vaega ua mafua ai foi ona maualuga finagalo o aiga nei ma faaleupolu o lenei Itumalo o Aana Alofi Nu. 1, o lea fuafuaga maualuga ua liliu i ai le tofa a lau Afioga, ona e i ai so matou talitonuga o le atinaeina o le tamaoiga o Samoa, o le toafilemu o Samoa o le fiafia o Samoa e pele i lou finagalo ma taua foi i o matou agaga e faalagolago lava lea i pule mamalu a alii ma faipule. O lea foi mamalu, matou te soso atu ai ma le faaaloalo, e taatia ane i tafatafa o lau Afioga ma le mamalu o lau Kapeneta, poo i ai nisi Tulafono e mafai ona faataatia, fuafuaina ma pasia e lenei Maota e mafai ai ona tapue ma faapoopo ma faamaualuga ia pule mamalu a alii ma faipule i Afioga ma alaalfaga taitasi o Samoa.

O se tala faatusa, masalo na o le 300 le fuainumera o le Ofisa o Leoleo, e le mafai e lenei fuainumera toaitiiti o le aufaigaluega ona tauaveina uma tiutee mafai ai ona tausia le saogalemu ma le toafilemu. O lea ua faatino mai i le aso o loo maualuga ma mamalu pea ma toafilemu Samoa ona o le pule mamalu a alii ma faipule i nisi foi Tulafono na pasia e lenei Maota, e le taumate na pasia ona o le faamoemoe ma le agaga e manuia ai foi Samoa. O la matou talosaga muamua lena e faataatia atu i tafatafa o lau Afioga ma le mamalu o le Kapeneta, o le a sau silasila i fuafuaga ma nisi tulafono e mafai ai ona faamamaluina ma faamautuina. E le gata foi i lea, e avatu foi le talosaga i le Afioga i le Palemia e ui atu i lau Afioga i le Fofoga Fetalai, poo i ai nisi tiute ma puleaga o tauavea e le Malo i lenei taimi, central government, e mafai ona faamautuina atu i alii ma faipule o afioaga ma alaalfaga. Ae matou te faapoopo atu i lea talosaga ina ia alofagia e lau Afioga am lau Kapeneta, afai e ae se tofa, e i ai ni galuega ua fuafuaina e lau Afioga ma le mamalu o le Kapeneta e mafai ona lagolagosua mai alii ma faipule o alaalfaga taitasi, ou te talosagaina ina ia faatulafonoina ma ia maopoopo ma mafai ona faatinoina pea oo i luma o Faamasinoga.

Ou te manatu ma ou te talitonu o le pele ma le taua o Samoa i o outou finagalo ma ni o matou agaga, e maualuga lea aua e tu ese lava Samoa i ana tu ma ana aga i fanua, aisea? Aua foi lenei, o loo afifi ai i totonu o lenei aganuu le agalelei, fetausiai, faapalepale ma le alofa. O lea la lau Afioga i le Palemia, e ui atu i lau Afioga i le Fofoga o le Fono ma le mamalu o le Kapeneta, o loo maualuga lava le faamoemoe, pe faapefea ona tatou faatumauina pea lenei maa taua o loo

faasilisili i o outou finagalo ma o tatou faamoemoe. O le talionuga o lenei Itumalo e mafai ona faatumauina pea lenei maa taua a Samoa ua pele i lou finagalo ma ni o matou agaga, pe afai e mafai ona faatino i tulaga o le atiina ae o le atunuu i fuafuaga ma ni aiaiga o faavae ai ma faatino i ai le atiina ae o le atunuu i luga o le faamatai ma aiga. Ou te taumafai atu ma lou faaaloalo e faapea le faalateleina o lou talitonuga o loo i ai, o se talitonuga foi lea o lo matou Itumalo. O le toatele o tamalii ma failauga e leai ni fanua foi nei e taua o fanua tuusaoloto 'freehold land', e mafai ai ona fai ni faaunegatupe e faatino ai ni atiina ae o faatoaga ma isi foi ituaiga atiina ae. O lea ua maua atu i totonu o le saunoaga a lau Afioga ma e avatu ai foi le famalo ma le faafetai i fuafuaga a le Malo i ni faaunegatupe e ono i ai ni tausaga ona le totagia lea 'suspensary loans'.

Ou te momoli atu lau faamalo ma le faafetai i lea tofa maualuga, o lea foi e toe mulimuli atu ma la matou talosaga ma le faaaloalo lava, alofa lau Afioga i le Palemia ma le Afioga i le Minisita o Atiina Ae ma le mamalu o le Kapeneta ina ia oo i le taimi e auiliili ai le faatinoga o nei fuafuaga o loo tuuina ai i totonu, ma ni ala e mafai ai ona aliali mai ma faatino mai o loo faaaogaina tele i fuafuaga le pule faa-matai ma le faaaogaina o auai i lalo ifo o le puleaga a le matai e faaauau ai nei atiina ae. Ae talosia ia alofa le Atua ma ia faataunuina lenei faamoemoe maualuga ua liliu i ai lau Afioga ma le mamalu ole Kapeneta, ou te talitonu e pei ona tuuina atu i luma o lau Afioga, le molimau foi o lenei Itumalo e toe foi ai Samoa i se tulaga tamaoiga maualuga ma le maopoopo, ma maua ai le toafilemu, saoloto ma le fiafia o tagata o Samoa. Ona o lenei ua maua foi lenei avanoa, e molimoli atu ai ni talosaga a lenei Itumalo i le aoao o Samoa, ao lea foi o le a ou taumafai atu o loo i ai ni vaega talosaga ua lafo mai e lou uso a faipule, le Afioga Leaupepetele e tuuina atu i luma o lau Afioga ma le mamalu o le Palemene.

O le Itumalo Aana Alofi Nu. 1, masalo a silasila lau Afioga ma le mamalu o le Kapeneta, o loo faaauau lava le tautua a lenei Itumalo i le fofoga taumafa a le atunuu i fualaau aina ma talo ina ia aveina atu i fafo. O loo matou fiafia e tuuina atu lenei tautua, e le gata i atiina ae o aiga ae faapea foi ona maua se auala e faatino ai la maotu taatua i le atunuu ma le Malo. Ae paga lea lau Afioga i le Palemia ma le mamalu o lau Kapeneta, o loo fai lava sina tele o tausaga e aumai pea lava talosaga a lenei Itumalo e galulue, aisea? Ua faigata ona faatino lo matou fia galulue ma le atiina ae ona o le faaletonu o matou auala ma vai, ae silasila foi o le isi lenei nuu tele lava e alaala ai le toatele o tagata soifua. O lea la ou te faalatalata atu ai ma talosaga i lau Afioga, ia alofagia lo matou fia galulue ua fia faatino le faiga o a matou atiina ae i faatoaga, e pei ona i ai lou finagalo, atiina ae afioaga ma alaalfaga ae ua faigata ona e leai se suavai ma leaga o matou auala.

E le gata i lea ona o lenei lava e i ai le talitonuga o lenei Itumalo, e mafai ona toe foi le tamaoiga o Samoa i ni tulaga lelei pe afai e aafia ma faaaogaina le pule

mamalu a alii ma faipule. O lea la e tuuina atu ai i luma o lau Afioga ma lenei Fono mamalu la matou ofo atu, o loo i ai ni faatoaga e lua, tua maota o Fasitoo le tasi ma le tua maota o Faleasiu le lua, o nei faatoaga e i lalo ifo o le Esetete Tausi, ma e tuuina atu la matou ofo ma le faaaloalo lava poo le a se finagalo a lau Afioga ma le mamalu o le Kapeneta ae faaaoaga lo matou Itumalo e fai ma faataitaiga e faamatuu ai nei faatoaga e faatino ai lo matou lagolagoina o lou finagalo o le tamaoiga o Samoa, o le tamaoiga o Samoa e mafai lava ona maua mai i le punonou ma galulue.

O lea la maotu te faapea atu ai ma le faaaloalo, o le a se finagalo i lau Afioga ma le Kapeneta, faamatuu mai nei faatoaga e lua, lafo le tasi ia Fasitoo e toatele tamalii ma failauga e i ai tomai eseese e mafai ai ona matou pulea ma faagaioia nei faatoaga e maua ai foi nisi faaeleeleaga e avatu i fafo ma fesoasoani i le faaletonu o la tatou tupe maua mai fafo 'foreign exchange'. E faapea foi ma Faleasiu, e le faia ai so matou loto ao lena ua tuuina atu ma le faaaloalo la matou ofo o le matou naunautai i lo matou fia tautua, matou te fiafia lava e faatino pea tau ane ai lou finagalo ma le mamalu o le Kapeneta, ona faaaoaga lea e fuafua i ai nisi o faatoaga o loo i tua-maota i tua ane o nisi afioaga o Samoa. Ua taatia atu lea vega o le matou faamoemoe ma le agaga maualuga e pei ona saunoa la tatou Fofoga Fetalai i lo tatou tatalo atu pea i lo tatou Tama oi le lagi e fesoasoani mai ina ia tusa ai a tatou fuafuaga i le galulue ma le faamaoni i lona finagalo.

O le isi vaega o le Tala o le Tupe sa ou matamata i ai ma toe vaavaai foi i tua, e pei lava ina ou talitonu o lenei lava Tala o le Tupe ua faataatia i le Maota e lau Afioga ma le mamalu o le Kapeneta, ua mafua ai lea ona silasila lau Afioga i tulaga lelei ma tulaga faaletonu i tausaga ua tuanai. O lea foi la e le mafai ai ona faagaloina ai nisi foi o manua ma faalavelave na tutupu i le tausaga ua tuanai aemaise le 1981 na aafia ai le aufaigaluega a le Malo. Ou te talitonu i lau Afioga i le Palemia ma le mamalu o lenei Kapenetaaemaise le mamalu o lenei Maota, e matua taua le aufaigaluega a le Malo i o outou finagalo, aisea? Aua foi o lenei vaega taua a le Malo, e faatinoina ma faagaioia ai fuafuaga ua liliu ai le tofa ma le faautaga poo faiga faavae 'policies' a le Malo.

O lau talosaga e faau ai faapenei lau Afioga i le Palemia e ui atu i le Fofoga Fetalai ma lou faaaloalo lava, afai ae mafai ona toe faatupuina le talitonuga le toatele o tagata faigaluega a le Malo i tamalii ma failauga, o faletua ma tausí, saoa aemaise le aumaga e taua lo latou sao e agalelei ai a latou galuega, aloaia la latou taumafai mai ou talitonu Tofilau, ou te tapa fua i lou suafa o fuafuaga lelei uma ua faataatia mai i lenei Tala Faataupu o le tupe, e faataunuuina, aisea? O le a i ai lo laotu talitonuga o lau Afioga ua faatama ai le atunuu, e faatauaina la latou sao i taleni e tele o loo faaaloaina ai e mafai ai ona faatino mea o loo fuafuaina e le tatou Malo. Ou te talitonu au le mafai ona faaauuina le fuafuaga a lau Afioga ma le mamalu o le Kapeneta e pei ona tagi mai ai le aufaigaluega a le Malo.

Afai la ua leai se tupe e mafai ai ona faataunuuina le faamoemoe, ou te faalatalata atu ma lou faaaloalo poo le a se tofa a lau Afioga ma le mamalu o le kapeneta, ae faatinoina ia se isi vaega o talosaga poo moomooga o lenei vaega taua o le Malo, o le faia lea o se arbitration board' poo se vaega e mafai ai ona faatumauiina lo latou talitonuga, o se tualga o fea ua i ai se tofa a lau Afioga ma le mamalu o le Kapeneta poo ua le tutusa ma se faamoemoe foi o le aufaigaluega a le Malo, o le a i ai lo latou talitonuga e maua ai foi lo latou loto tetele ma le faamoemoe o lea o i ai se isi vaega e mafai ona iloiloaina ai mataupu uma o fai ma faafitauli poo toatuga i le faatinoina o a latou galuega. E le fai ai pe faatonuina lau Afioga, ae ou te faalatalata atu taatia ane i tafatafa o lau Afioga ma le mamalu o lau Kapeneta e fai i ai se fuafuaga.

O le isi vaega o lau talosaga e uiga lava i le aufaigaluega a le Malo, o lea ua manino mai i le tala manino ua faataatia e lau afioga i luma o le Maota Fono, o lena foi ua molimoli atu se fautuaga i lau Afioga se fuafuaga mo le vaega, tau ia faapea o se arbitration board, ou te toe faaopoopo atu foi ma le faaaloalo lava se tulaga e toe iloilo ai le Tulafono e Pulea ai Tagata Faigaluega a le Malo.

Ou te faafetai tele atu i lou uso a sui usufono i le afioga Tea i lona faatuina faapea foi le mamalu o lenei Maota. Faamalo faafetai.

Atonu ua uma foi fautuaga sa tuuina atu i luma o le Afioga i le Palemia ma le Kapeneta e ala atu lea i lau Afioga, o le a faauma atu ai so matou manatu, o lena ua taatia atu se talosaga poo ua i ai se fuafuaga a le Malo e toe iloilo ai le Tulafono e Pulea Tagata Faigaluega a le Malo, ona ou te talitonu o loo i ai ni vaega e feteenai ma le faavae atoa foi male afaina ai o aia tatau o le aufaigaluega a le Malo. O le a faauma atu se manatu, ae tasi lava le isi itu lenei, ou te leiloa i lau Afioga pe talafeagai pe leai, ae le o po se lilo ina ua maea Faiga Palota i le 1982, e umi se taimi o faatali o se fono ma se tofiaina o se taitai o le atunuu. O lea vaega atonu e le o faia ai o outou finagalo ae ou te lagona lava e au ma lou faanoanoa ma le masiasi foi e talitonu ua faatasina lo outou paia ma lo outou mamalu aua o lena ua ee ia outou Afioga i le mamalu o Itumalo.

O le a le mea sa outou silasila i ai? Sa maua le avanoa, o nisi foi e le o nusipepa uma, o nisi foi o nusipepa e saili ai nisi tulaga. O lea ou te avatu ai ma le faaaloalo lau talosaga lau Afioga i le Palemia ma le mamalu o le Kapeneta aemaise o lenei Maota Fono, poo le a sa outou finagalo ae toe saili poo toe i ai se tulaga e le toe oo i ai, i le umi o lenei taimi o faataatia ae leai se tulaga maoti ma foia ai tulaga tatou te faanoanoa ai.

O nai fautuaga na ua lafo atu ae faauma atu ai au upu faapenei ma lou faaaloalo, lau Afioga i le Palemia ma le mamalu o lau Kapeneta, ou te talitonu lava e taua ma pele Samoa, i lea finagalo ma o outou finagalo e pei foi ona pele Samoa i lou nei foi agaga. Ia fai lena ma taiala i la outou galuega, ia alofa le Atua ma foai atu le mau, foai atu le onosai ma le faapalepale, ia alofa le Atua ma

foai atu le mau, foai atu le onosai ma le faapalepale tatou te fetufatufaa ai. O le a matou tutu mai i lona itu o le Maota, matou te fesoasoani mai faatasi tatou te feteenai ma a outou Afioga i le Kapeneta, matou te fautua ma faitio mai, e le o se mea lelei mo Samoa aua e pele ma taua Samoa ia i matou. E pei foi ona matou talitonu, e faapea foi i lau Afioga ma le Fofoga Fetalai, lau Afioga i le Palemia ma le mamalu o le Kapeneta. Ia, manuia la tatou Fono, o se upu ua sese poo se pati ua sala ia faatafea lea. Ia manuia lau Afioga i le Fofoga Fetalai, faamalo atu i lou onosai ma le tautai o le tatou Fono. Soifua.

Susuga PAPALII LAUPEPA



Itumalo Faaalaalafaga:

Faasaleleaga Nu.2

Filifilia:

11 Mati 1982

Faatauto:

13 Aperila 1982

Lauga Faataupou:

2 Mati 1983

Lau Afioga i le Fofoga o le Fono ma le mamalu o le Fono Aoaofaitulafono, e peiseai ua ta vaai atu ua avea le faatimutimu o le afiafi ua fai ma mea e le fia tulai ai i luga sui usufono e sausaunoa. Ae ui i lea, ou te faapa'i malu atu ma ua ou iloa ua vela foi le fala i lau Afioga i le Fofoga Fetalai faapea le mamalu o le Maota.

Ua ou tu atu e fia faaali ni nai manatu ma ni nai fautuaga i lenei taimi e fesoasoani atu ai i le Tala o le Tupe ua taatia nei i le Lauulu a Fono ma avatu ai ni fautuaga lau Afioga i le Fofoga o le Fono i le Palemia ma le mamalu o lana Kapeneta, atonu e toe mafai ai ona toe sasaa le fafao ma toe liliu le tofa i ni mea o lo'o faaletonu i la'u matau atu o lo'o tulai mai i totonu o le Tala o le Tupe lenei.

Lau Afioga i le Fofoga o le Fono, o le matua ma le autu o sa'u faamatalaga e amata atu ai e pei o le upu o le pese a la tatou Ekalesia e faapea, "O le alofa e sili lava lea." A silasila lau Afioga i le Fofoga o le Fono, ua atoa lenei vaiaso ma le isi vaiaso atu i tua talu ona ou maua le Tala o le Tupe, ma ua ou fiu e saili pe maua ai se alofa, pe maua ai se toomaga, pe maua ai se faamatalaga e mafai ai ona mapu i ai mafatiaga o le atunuu o lo'o i ai nei i le tau o le soifuaga. A'o le tali ua tuu mai e le tusi, talofa Papalii, saili i se isi mea le manuia, e le o maua i inei.

O le mea la e fia faamamafa i ai la'u tautalaga lau Afioga i le Fofoga o le Fono, o le afaina o tagata o le atunuu, o le afaina o o latou soifuaga pe afai tatou te pasia, pe afai e pasia e lo'u nei tagata le Tala atoa lenei o le Tupe lea ua tuu mai nei i o'u luma. Aua o i ina e aliali mai ai i lou lava manatu, pe a ou alofa moni i lo'u aiga ma lo'u itumalo aemaise Samoa o lo'o faafofoga, e aliali mai i ina e leai so'u alofa. O le a faapefea ona ou toe avatu lenei Tala ma ou toe pasia lenei mea e toe atili ai ona faamamafa le avega e amo e le atunuu?

Lau Afioga i le Fofoga o le Fono, a tatou tepa i tua i tausaga na tatou omai ai nei aemaise le tausaga ua mavae, e amata mai i le 1981 na amata ona vevesi ai Faigamalo a le atunuu, ma ou te mautinoa o na vesiga ua lagalaga ai finagalo ma mafaufau i le fia maua o se Faigamalo e maua ai se toomaga lelei ma le mautu e mapu i ai le atunuu ma maua ai se toomaga. Na amata mai i le 1981, 1982 ua atili ai lava ona vevesi le atunuu, lugā lalō upufai a le Malo, sui faafia le Malo, sii le tau o oloa, o le tele o oloa ua le maua, seia oo mai i lenei taimi, o le avega a le atunuu ua mamafa, ma ou te lagona o le tulaga ua i ai nei le soifuaga a le atunuu, e moni pe afai ou te faapea atu ua savavali i tuli, tulou, o le upu e to ia te au, ua savavali i tuli ona o le mamafa o le avega lenei e tauave. Ae a toe tuu atu la i ai ma lenei mamafa o le siitaga o le tau o le soifuaga e pei ona faataatia mai e le Tala o le Tupe, talofa lau Afioga le Fofoga o le Fono! Pe le o le toe tuaniu ea lea e gau ai le papatua o le kamela? O a ni fuafuaga lelei o tuuina mai e le Afioga a le Palemia faapea le Kapeneta? Ou te mafaufau lau Afioga le Fofoga o le Fono, e le o le taimi lenei, e tuu mai ai ae o se mapusaga le mea o lo'o saili e le atunuu. Silasila i le mafatiaga na tatou omai ai e pei ona ou fai atu? Sa tatalo Samoa ma talosia ia tuu maia se vaa faaola. Ae o le a le mea lenei ua taunuu mai pe afai e pasia e lou sui lenei Tala o le Tupe? O le vaa o le mala. Silasila lau Afioga, o le a le afaina o le atunuu?

Muamua o le vaega o tupe faaagaga e faatauina ai oloa mai fafo. O le a le mea ua tau mai nei? Ua tau ma inei i tauofoga i oloa o lo'o ua aumai i totonu o le atunuu, o le tele o oloa ua le maua, ma ua aliali mai foi lau Afioga a le Fofoga o le Fono, ua leai se filifiliga saoloto a le atunuu. E le o le sini ea lea o faamoemoega o Malo uma ma taitai uma o le tuuina atu lea, o le filifiliga saoloto, (freedom of choice) i ona tagata ina ia mafai ai e ia ona faaoga lana filifiliga e saili ai sona lumanai manuia ma faataunuu ai manaoga o lo'o lagona e ia lava ma lona aiga. Ua saunoa mai le alii Palemia i totonu o le Tala o le Tupe lenei e faaitiitia totogi mo lenei tausaga ina ia faaitiitia ai le manao o tagata. Oi a faaitiitia le manao, lau Afioga le Fofoga o le Fono o le natura lena o tagata ola o le manao. O le isi mea ua aliali mai i i o le taua o le filifiliga saoloto. Afai na o le tolu mea ua i luga o le fata o le faleoloa, eleni, patua-moa o mea na ua outou silafia ma tatou iloa, o fea le filifiliga? O fea le taua? Ua sola le taua o le filifiliga saoloto, ae ua taua ia i tatou le maua o nei mea e tolu. Silasila ua faatauaina le soifuaga o tagata, o le apa eleni, patuamoa ma le fasi mamoe. Talofa i le atunuu. E lei tau ane i o outou finagalo ma o tatou agaga, tatou tauofo ia o se mea lelei, tatou avea mea lelei mo lo tatou atunuu ma o tatou tagata? E lei tau ane i finagalo ma o tatou loto ma o tatou agaga, e a ea se moa atoa ae teu ia o lena patua-moa? Fai mai le faaupuga o lo'o i le tua o le pusa e aumai ai le patua-moa i le faa-papalagi "packed food". A faa-Samoaina lau Afioga le Fofoga o le Fono o mea e taumamafa ai pe aai ai taifau, tulou, o le upu e to ia te

au, ae silasila o lenei e fafaga ai le mamalu o le atunuu. Talofa, a fesili mai se atalii.....

Faafetai i lau Afioga le Fofoga o le Fono. O le autu o le manatu na avatu, ia fai ai se fuafuaga a le Malo o lo o nofoi mai nei, ae faafetai.

Ona alu lea o lau faamatalaga lau Afioga le Fofoga o le Fono i le faatauaina o nei mea taumafa a le o ni mea lelei mo le atunuu. Ae o le a le taua ua le iloa, o le a le taua ua sola ese. Ua sola ese le taua o lau filifiliga saoloto e pei ona ou fai atu. Afai ou te galue i le aso atoa ma afai ou te galue i le tausaga atoa e saili sau tupe, o lou afu ma lou taimi, ae a tagi mai le matua ua ta fia ai i se pisupo a avatu i ai se a igoa? Silasila o le matua alofa lau Afioga le Fofoga o le Fono na te ave mea lelei i ona tagata. O le mea lea lau Afioga ou te fautuaina ai le Afioga a le alii Palemia faapea le Kapeneta sei toe iloilo lava, sei toe sasaa le fafao ma liliu le tofa agai i le faatauaina o nei mea taumafa aua le soifua lelei ma le agai i luma mo se lumanai manuia o lo tatou atunuu.

Lau Afioga le Fofoga o le Fono ua tele foi ni Sui ua saunoa agai i le mea ua aliali mai i le Tala o le Tupe aemaise lava tiute ma e ono tataua ona ou faapea atu lau Afioga le Fofoga o le Fono e le manuia, e le manuia lenei mea ua tulai mai nei i le CDV i le CIF e so o se mea lava e aumaia i totonu o le atunuu. Lau Afioga a le Fofoga o le Fono ou te mautinoa o le a siitia le tau, aua e tele fesuaiga o le a aliali mai nei ma o le a faia pe afai tatou te liliu i le CIF mo le aoina o tiute o oloa e aumai i totonuu o le atunuu.

O le aano foi lau Afioga le Fofoga o le Fono, o lo o tuu mai i le Tala o le Tupe ma le saunoaga a le alii Palemia, o le toe uunaiina malosi lea o la tatou atiina ae ona o le manomia o fua o laueleele, o mea e gaosi i totonu o le atunuu e ave e faatau atu i fafo. Ae silasila lau Afioga o lenei ua pa'u mai le tupe faaagaaga mo le atiina ae mo lenei tausaga, pau mai i le \$8.9 miliona i le \$6.9 miliona. Ua matau atu lau Afioga a le Fofoga o le Fono e le lava lena tupe e atiina ae ai le manao lenei tatou te mananao i ai. Silasila lau Afioga, afai e faaitiitia le tupe o le atiina ae toe tului i ai ma le 20% i e o le a le maua ni galuega po o e o le a vaea, ma ou te lagona foi o le a faapea foi ona avea se toatele o tagata faigaluega i tua i le vaega o tagata taitoatasi ona o le tau o le soifuaga ua agai i luma. Afai la o le naunautai o le Malo ina ia toe uunaiina nei tagata e toe o i tua e toe atiina ae fua o le laueleele, ou te lagona e le taitai ona lava lenei tupe e fai ai atiina ae ia e manao i ai le Malo. O lea lau Afioga a le Minisita o le Atiina ae, sei toe silasila ane lava i le fuainumera lena pe le ono tataua ona toe tuu i ai se isi mea ae aveese se isi mea ina ia mafai ai nei ona atiina ae ma mafai ai ona toe uunaia ia atiina ae nei o lo o manaomia e ave fua o faaleeleaga i fafo e faatau atu ina ia maua mai ai sa tatou tupe po o sa tatou tupe mai fafo.

O le isi mafatiaga tele lau Afioga a le Fofoga o le Fono ma le afaina o le a oo i ai tagata lautele o le atunuu aemaise o lenei ua faamanuiaina i le maua o le eletise, ona o lenei foi ua aliali mai o le a totogi le tiute a le EPC i le suauu. Ma ou te lagona o le mea moni o le a aliali

mai i i o le toe siia foi lea o le tau o le eletise o lo o faamanuia nei. Ae le na o lena foi, lau Afioga o lenei foi ua fai fuafuaga mo se isi fale eletise e faaalua i fafie, tulou sei vae ane le paia. Ae silasila i le tulaga lea ua i ai nei a toe atoa le isi 20 tausaga i lau matau lau Afioga a le Fofoga o le Fono, a soona ta pea i lalo le vao o Samoa ua le agai mai ni timu, o le a le mea o le a tulaga i ai? Lau Afioga a le Fofoga o le Fono, e le taumafaina e tagata le eletise, ae o le suavai fai mai le tagata poto faapitoa a 72 itula e te le o taumafa i se vai ua mate ou tagata, o le oti le mea e oo i ai. Ou te fia faamanatu atu lenei mea i le Minisita e ona lenei matafaioi, toe silasila ane pe le ono tataua ea ona tuu lenei fale eletise ae fai nisi faiga e maua mai ai eletise e pei o le la o lo o susulu mai pea i aso uma ma aso uma.

Lau Afioga ou te fia oo ane i i i le mea lea o le lafoga i le malae vaalele. O lenei ua ou faitau atu foi e pei o le toatele o Sui na saunoa agai ai i lea mataupu, ae ou te vaai atu i le nusipepa o tu mai ai se faitioga mai tagata i fafo, ua fai mai ua faailoga lanu le atunuu lenei, ua faailoga lanu le Malo o Samoa. Ma ou te matau foi lau Afioga ua faateia le toatele o e o lo o vaavaaia ma faia lenei galuega o turisi i le omai o tagata maimoa i le atunuu, ona o le vave faia o lea fuafuaga ae o lenei e lei pasia e le Maota. O le mea lea e faanoanoa ai foi le loto lau Afioga le Fofoga o le Fono ona o nei mea ua faaalu ae lei maea ona tatou talanoaina ma lafo atu i ai ni manatu ma ni fuafuaga ma ni fautuaga a sui o le Maota.

O le Malae Vaalele foi lau Afioga le Fofoga o le Fono, ou te fia fesiligia ai masalo pe o le Afioga a le alii Minisita o Tupe o lo o i ai tagata e toafa ua faafaigaluegaina e avea ma tagata asiiasi a le Komiti Faafoe a Tupe i le Malae Vaalele, ma fai mai e \$8,000 totogi o nei alii. Pe moni lea mea lau Afioga a le Minisita o le Tupe? Afai e moni, e faapefea ona faafaigaluega nei tagata ae lei pasia mai i le PSC? Silasila lau Afioga o lenei o le a faaitiitia le aufaigaluega a le Malo i le 10% a o lenei foi ua faafaigaluega nei tagata ae o tagata i lau faalogo i ai o nisi ua faamalolo ae e totogi foi aua le maualuluga. Ma ou te manatu ai e mafai ona faafaigaluega tagata e 16 pe afai e tai \$2,000 totogi i le tausaga. O le mea lea lau afioga e manaomia ai se faamalamalamaga pe faapefea ona faafaigaluega nei tagata ae o le a foi le mafuaga ua maualuga ai o latou totogi, ma o le a tonu foi galuega e faia e nei tagata?

WSTEC. Ou te fia talosagaina lau Afioga a le Palemia sei silasila lelei ane i pulega o lenei faalapotopotoga. Ou te lagona o lo o lelei uma lava ia galuega o lo o faia e tagata o le WSTEC, ae pau lava o le pulega lau Afioga e popole ai. Fai mai le upu a le isi taitai, e leai ni fitafita leaga na o taitai leaga. O le mea la lea lau Afioga sei silasila ane i ai sei faaleleia ia lenei matagaluega aua ou te lagona o le tasi lea faalapotopotoga malosi i totonu o Samoa e mafai ai ona maua mai mea e ave i fafo e maua mai ai tupe nei o lo o manaomia e le malo. Sei e silasila ane foi lau Afioga i eleele e pei ona matou faalogo atu i ai ua fuafua ni eleele o le WSTEC e toe faafoi i alaafaga o lo o i ai ia eleele; Fagalele, Satapuala faapea

lena itu o Stuimalufilufi. Ma o se mea ua tatau lava lau Afioga i le Fofoga o le Fono ae ou te vaai atu foi ua i ai eleele ua uma ona vaevaeina e faatau ma e popole ai lou mafaufau pe afai o le a faatau. E na o le mauoa foi e maua na fasi fanua, ae a faapefea le mamalu o le atunuu o lo o tagi mai i se mea e tua i ai? Ou te fautuaina ai le Afioga a le Palemia ma le Kapeneta sei toe fuafua ane pe le ono tatau ea ona ave i alaafafaga, toe faafoi eleele pe afai ua le mafai ona galueaiina e le WSTEC sei atiina ae ai itumalo ma alaafafaga nei e leai se mea e tua i ai.

Lau Afioga a le Fofoga o le Fono, ona o au e tuaoi ma le Afioga i le Palemia i Savaii, o o ma itumalo e faifai mea faatasi. Ou te fautua atu ai i lau Afioga a le alii Palemia, ona o oe o lo o vaavaaia le WSTEC, sei e alofa ane, o Safotulafai ua leai se eleele e tua i ai ae o lena e taatia le 2,000 eka a le WSTEC i gauta. Ou te lagona foi ua leai se mea e tua i ai lou alaafafaga, faia sau tonu ae tuufaatasi o le a ta tutu faatasi ia maua so ta lelei, aua le faafofogaaga a Faasaleleaga.

Faafetai lava i lau Afioga a le Fofoga Fetalai. Atonu foi ua lava ia manatu ua avatu i lenei aso e fesoasoani ai i mataupu o lo o taatia nei i luma o le Fono.

Pei ona ou fai atu i le amataga lau Afioga le Fofoga o le Fono - 'o le laofa, o le alofa e tatau ona faasili'. O lenei la i le toe tepa atu i le Tala o le Tupe afai o au o se tama alofa ma se taitai alofa i lou itumalo, lau Afioga ou te le talia le Tala lenei, ma ou te tomanatu e toe faafoi le Tala lenei i le Komiti o Tupe sei toe aumai i ai nisi fuafuaga ona toe fai atu lea i ai o ni manatu.

Lau Afioga le Fofoga o le Fono, sa faapea foi le faamatalaga a le Afioga a le Tootooalii i se taimi ua fano, o Samoa e ona le Faamasinoga. Ma ou te faapea atu ai i lau Afioga o le a taatia iina, e moni o Samoa e ona le faamasinoga, faaali so ta alofa, toe liuliu le tofa ma toe sasaa le fafao, toe fausia se isi Tala lelei ma aoga ma e fesoasoani ai i le atunuu i lona mafatiaga ua i ai nei i le taimi nei ona taunuu ai lea o sini o faamoemoe ma o tatou manatu.

Ma ou te faaiu atu faapea lau Afioga le Fofoga o le Fono, fai mai se tasi alii Peresetene o Amerika e faapea, "e mafai ona ta faaseseina tagata uma mo se taimi puupuu, e mafai foi ona ta faaseseina se vaega o tagata mo taimi uma, a le mafai le mafai lava ona ta faaseseina tagata uma mo taimi uma lava." Ia manuia le Fono.

Afioga PATU AFAESE



Itumalo Faaalaafafaga:

Vaimauga Sisifo

Filifilia:

11 Mati 1982

Faatauto:

13 Aperila 1982

Lauga Faataupou:

2 Mati 1983

A e ou te lei alu loa, ou te faapai malu atu ma faafetai i lou itumalo o le Vaimauga, le paia ma le mamalu o

Faleupolu ma Sagauga, i ou tulaga faalupelupeina, ou tapanu ma ou faleupolu. Ua ou matua faamoemoe ma lou agaga atoa i lou itumalo, i lo outou alolofa ma le lagolago mai e pei ona ou faa-agatonuina ai lo outou mamalu ma avea ai au ma se tasi o outou Sui i le Palemene. Faafetai tapuai mai, faafetai tatalo.

Lau Afioga a le Fofoga o le Fono, e leai se e fia vave po o se fiapoto pe ou te taumafai foi e atiae lou olo. O Samoa o le ao-mamala, o le ia iviviva ma e le aofia foi matagi i paia eseese i Sui mamalu o le Palemene. A o lenei avanoa ou te faatepa atu ai i lau Afioga a le Fofoga o le Fono, o le agaga moni o lenei Sui o le faamuamua lea o le manuia, o le soifua lelei o Samoa i ona vaega eseese ma ona tagata uma, a e le o le taumafai o tatou i le Fono mamalu iinei e tusitusi o outou aao ma o tatou lima, po o ai e sao ae o ai e sese. O tatou, o lo outou paia ma lo outou mamalu, ua outou afifio mai nei ma tatou omai i lenei Palemene e le ona o tatou lava, ae ona ua filifilia tatou e o tatou itumalo e avea ma o latou sui ma siufofoga e auauna atu ai e sailia ai ni auala ma ni faiga o le a maua mai ai suiga lelei ma se soifua manuia i le lumanai mo tagata uma i o tatou itumalo, faapea foi ma lo tatou atunuu atoa.

I le taimi lenei lau Afioga a le Fofoga o le Fono, e matua faamamafaina e lou nei Sui le taua o le galulue faatasi o i tatou uma ina ia maua ai le sini o le faamoemoe toe tuu atu lea o Samoa i le tulaga ua manaomia lelei mo le toe faaleleia o le tulaga o lona tamaoiga ina ia taunuu atu ai i se fuafuaga toe fuataina, ona o mea sa faaletonu i aso ua tuanai. E lei fauina Roma i se aso e tasi. O lea foi la ua tatau ai ona tatou faatinoina le agaga o le onosai ma le faapalepale i le feagai ai ma faafitauli e pei ona tatou i ai nei, galulue fegalegaleai ina ia maua le lelei o le tamaoiga mo tagata uma, a le na o se vaega.

Le Fofoga o le Fono ma le faaloalo, o le a le faaleleia o le tamaoiga? E faapefea ona faaleleia le tulaga o le faatinoina o le tamaoiga? E le nao le faatinoina o le tamaoiga ae pe o le a foi se mea e mafai ai ona faatinoina lea tulaga. E pei lava ona masani ai lenei fonotaga, o le tele o saunoaga a Sui e mafuta lava i le tele o saunoaga ae leai ni mea e faia. A faa-papalagi - "It is not words for actions speak louder than words." Ou te faapea atu ai i lou atunuu, ia tatou taunuu atu i le sini o le faaleleia o le tamaoiga. Ma o lou talitonuga e faapenei, o le faia o galuega e faagaioia ai mea e faia e tagata ina ia maua ai so latou tamaoiga.

Le Fofoga o le Fono, o le faatupuina o avanoa e ala atu i galuega ua fuafua e le Malo mo aiga ma nuu ina ia maua eleele e atiae ai so latou tamaoiga. O le mea moni lava o lo o i ai i Samoa nei ni vaega se 4 o le tamaoiga; o e e matua maualuluga o latou tamaoiga, o e o lo o feololo lo latou tamaoiga, o e o lo o maulalo lo latou tamaoiga ma e e matua leai pe lipi le tamaoiga. O tulaga eseese la nei o le atunuu ia tamaoiga ua aliali mai e matua manaomia tele le faia o ni fuafuaga maumaututu ina ia sii i luga le tamaoiga o le atunuu e

amata mai i e e leai ni o latou tamaoaiiga sei oo atu lava i e e tetele o latou tamaoaiiga.

O le Ofisa o Aoga. Ou te talitonu o se matafaioi lava lea e taua tele i le Ofisa o Aoga, e le na o le aoaoina o tamaiti o outou alo ma a tatou fanau i potu faaonaponei, ae o le amataina lea o ni fuafuaga talafeagai mo le faia o ni aoga e mafai ai ona koleni tagata talavou. E pei ona outou silafia le tele o le autalavou o lo o tafafao nei i Apia, tamaiti ua uma aoga e leai ni galeuga faapena foi ma tagata matutua e le o i ai foi i lo latou soifuaga. O totogi o aoga, pei ona outou silafia le itumalo lenei o Vaimauga, o se itumalo e le tua i ni eleele, o le itumalo lenei e tua i le galuega, ma a faapea ua le lava le totogi o galuega e pei ona aumai ai i ia taimi ua mavae, ou te talosaga atu i le paia ma le mamalu o lau Afioga a le alii Palemia e ui atu lea i le Fofoga o le Fono, le Afioga a le alii Minisita o Aoga, pe a lau Afioga ae toe liliu le tofa ua pagatia tele lenei itumalo pe a faapea e faamoemoe le totogiina o aoga i totogi lea o lo o maua nei i le taimi nei e laitiiti naua le mea o lo o maua.

O le Ofisa o Eleele. Ua manaomia ni eleele o Vaimauga aua foi ua tele ina faoa eleele o lenei itumalo. Silasila foi i totonu o lenei itumalo, o lo o i ai le taulaga o Apia, o lo o i ai foi fanua o le Malo, o lo o i ai foi fanua tumaoti o lea Ekalesia ma lea Ekalesia. O le Aoga i Malifa, le aoga i Leifiifi, o le Kolisi o Samoa, TTI, Papauta, Falemai ma le Apia Park, o ia fanua uma lava e pei ona ou taua, o ni fanua na maua mai i le paia ma le mamalu o lo matou itumalo. O Apia ma ona tulaga eseese ona pau lava lea o le Taulaga i Samoa i Sisifo, ma o le toatele o le mamalu o le atunuu o lo o alaala ai ma afifio ai, e le gata i Apia nei ma tagata o le Vaimauga ae o lo o afifio ai foi ma alaala ai le paia ma le mamalu o isi itumalo mai nuu i tua. Lau Afioga a le Minisita o Eleele, pe mafai e lau Afioga ona toe faaopoopoina nisi eleele o lo matou itumalo aemaise Tiavi ma le auala foi pei ona tatou talanoaina i se tasi vaitaimi?

Lau Afioga a le alii Palemia e ui atu lea i lau Afioga le Fofoga o le Fono pe le mafai ona fai se fuafuaga ina ia mafai ai ona foia le faafitauli o le leai o ni avanoa e nonofo ai lea o lo o iinei i Apia ae fuafua se isi taulaga e ese atu ai ma Apia ina ia mafai ai ona fai sina matou manava laitiiti i lo le tulaga lea o lo o i ai nei. E pei ona outou silafia o le toatele o le paia ma le mamalu o lo o agai mai i Apia ma faatumutumu ai lenei itumalo. O lau talosaga atu lea ma lou faaaloalo lava.

Lau Afioga a le Palemia ma le Kapeneta, pe mafai ona toe suesueina e lau Afioga pe o le a le tulaga ua oo i ai le Sone Saoloto, lea sa taumafai ona amataina i se taimi ua mavae? A faapea e te suesueina ae maua ai se manuia o le atunuu ma ni galuega a le atunuu ou te talosaga atu ma lou faaaloalo ina ia faia loa lea galuega.

O le Ofisa o Faatoaga. Ou te fautua atu i le Matagaluega, o le agaga e fia faaleleia pea galuega tau fesoasoani po o le galuega lautele lea mo tagata uma e manaomia ni fesoasoani. Ua alagataua ona faia ni polokalame maoti i nuu ma itumalo e uiga i metotia ma galuega e faaleleia ai faatoaga ma faaosofia ai le fia

galue ma le fia atiae o le atunuu. Mai i aoaoga ia faia lea i le taitasi pe tai lua masina o le tausaga, ae le o le alualu loa lava. O lea foi aoaoga, pe o le a se tofa i lau Afioga ae taulia ifo ai faletua ma tausua ma tamaitai.

Lau Afioga a le Minisita o Galuega, e ui atu lea i lau Afioga le Fofoga o le Fono, ua ou mataulia pea i totonu o le Aoga a Samoa College, sau ai i Maluafou alu atu ai i Leifiifi ma Malifa, ou te faafetai i le alofa o le Atua ua le mafai ona tatou faalogo ma outou faafofoga i ni tala faale-lelei i aoga ma le taimi e tuua ai aoga. Ou te talosaga atu i lau Afioga a le Minisita o Aoga liliu le tofa ina ia mafai ona fai ni nai auala e savavali ai tamaiti nei i le taeao ma le tuua o aoga.

Lau Afioga a le Palemia e ui atu lea i le Fofoga Fetalai, pe mafai ona e tuuina mai i se taimi o i luma sau suesuega pe o le a le tulaga sa i ai le tulaga o le Tupe a le Malo i le taimi lea na faatauina ai le Sina. Pei ona silafia e le paia o le Fono ua tele naua saunoaga a Sui ua tusitusia foi i nusipape tulaga lava e uiga i lenei vaalele o le Sina. Masalo ana faapea e le o se vaalele lenei o le tamaitai o le Sina, ou te masalo ua faaupuiina i se isi upu faale-manuia i le tauina soo o lona suafa.

Lau Afioga a le alii Palemia pe mafai ona e tuuina mai foi i luma o le Fono lenei le tulaga o lo o faataatia ai le upufai o lenei Fono. Ou te faatusa lea i le tau o le Protocol po o le faatulagaina o le mamalu e aofia ai. Muamua i taimi uma lava o le Ao mamalu o le Malo, lona lua o Sui Tofia, tolu o le Palemia, lona fa o le Kapeneta, lona lima o le Faamasino Sili, lona ono, Fofoga Fetalai ma lona fitu o sui o Malo Afaatasi ma sui o Malo o lo o i totonu o lo tatou atunuu ma faipule o lo o avea ma Sui o itumalo. O lona uiga la o lau faamatalaga i le faatulagaina o tulaga tataua ma le aoga ma le maualuga e tuvalu sui o le Palemene, ae tu lima le Fofoga o le Fono. Faamolemole lau Afioga a le Palemia sei e tagai loloto i lea tulaga pe mafai ona fai se faaleleiga o lea mataupu.

O le mataupu lona tolu ua ou mautinoa sa e taitaifono i se tasi o suesuega e uiga i le faatosina (bribery and treating). Ma ou te lagona le ootia tele o o tatou agaga ma o tatou finagalo i ia mea na tutupu i mea tau faamasinoga e uiga lava i ia mataupu o le faatosina. O lea ou te talosagaina ai lau Afioga e ui atu i le Fofoga o le Fono pe le mafai i le taimi nei ona faatulagaina faale-tulafono se mea e amata ai ma gata ai le faatosina. Ma le faaaloalo lava.

O le isi itu lau Afioga a le Palemia semanu o lo o tautala i le tulaga tau tupe pe mafai ona toe fai se isi faataua i a tatou tupe pepa ia o lo o maua nei pepa o \$1, \$2, \$5 \$10 ma le \$20. Masalo o se sese o le fauina o ia tupe pepa ae a outou tagai lelei lava i ai, o le tele lava o ia tupe pepa o lo o i ai se tamaitiiti, tamaloa, po o se fafine o lo o ona faaogaina lona lima tauagavale. Ou te laogna e le o le agaga lea o le alii Minisita o lea vaitaimi sa i ai, ae ou te lagona o se sese mai le tagata na lomiana ua mafua ai ona le taumatau le tamaitiiti, fafine ma le tamaloa. Peiseai e aliali mai ai o le 90% o Samoa e tauagavale.

O le isi itu lau Afioga a le Palemia e ui atu i le Fofoga o le Fono o le mataupu lea i le vaega lea e i tua atu nei ai na silasila foi nei i ai i le taimi o le malologa. E lei mafai ona nofoia lea tulaga e fai ai le malologa a le mamalu o Sui ona ua fai si timu. Pe mafai ona e tagai loloto ifo i ai, atonu ua uma foi ona fai i ai se iuga a le Fono mamalu i lea vaitaimi ae na ona faamanatu atu i lau afioga.

O lau tautalaga faaii i lenei vaitaimi o le Minisita lea o Faamasinoga. Ou te talosaga atu i lau Afioga pe o le a se mataupu, pe o le a se mea e foia ai i le taimi lea o le a faia ai le aganuu a alii Faamasino? Ua ou matauina pea i tiami uma ou te auai i ia faamasinoga, o le paia ma le mamalu o le a faia a latou faamasinoga ae toe tulai atu i fafo ona o le a faia le agatonu i totonu o le Ofisa. Ou te lagona pe afai e talafeagai ai ma lou finagalo, a faapea o le taimi o le a fai ai le aganuu lea a alii Faamasino pe mafai ona taulia atu ai ma taitai, o e o le a fai a latou faamasinoga?

Ou te fautua atu i le Fofoga o le Fono ina ia faamamafa i lenei Fono mamalu lo tatou faatinoina o le agaga onosai ma le faapalepale i le feagai ai ma faafitauli o lo o tatou i ai nei ia tatou galuega. Ma o le tulaga o le faafitauli o le tamaoiaiga ua aliali mai nei ou te lagona ia lavapapale ma ia onosai lo tatou atunuu faapea foi ma o tatou Sui. Amuia tatou o lo o maua pea le soifua lelei ma e le toatele nisi o lo o aafia i le suiga o lenei tamaoiaiga. Ma ou te faatusatusa atu fainumera ua ou mauaina i le aso, i le taimi nei e ova i le 12 miliona tagata o le Iunaite Setete ua le maua ni a latou galuega ma ua vaea, o Ausetalia e 1 le tagata mai le 10 o lo o vaea ma e le o maua sana galuega ma o lea foi fuainumera e 1 i le 10 tagata o lo o i ai foi lea i Niu Sila e le o maua ni o latou avanoa i a latou galuega. Silasila foi i tala faasolopito o le lalolagi e masani ona maua mai e ova i le 2 miliona tagata sa i totonu o Nigeria ua tutuli ese e Nigeria ma ua le toe maua ni a latou galuega, ma o le taimi nei foi e maua le kuata miliona o tagata Niu Sila o lo o atu i Ausetalia e sue galuega ai.

O lau lauga lena i lenei taimi, ia manuia lau Afioga le Fofoga o le Fono, manuia foi le alii Palemia ma lana Kapeneta faapea foi le tofa i le taitai o le Itu Agai muamua faapea foi Asiaisiau le taitai o le Itu Agai lona lua ma Sui mamalu foi o lo tatou Fono. Soifua.

Mr RASMUSSEN, PETER VIGO GORDEN



Itumalo Faaalaalafaga:

Palota Taitoatasia

Filifilia:

11 Mati 1982

Faatauto:

13 Aperila 1982

Lauga Faataupou:

3 Mati 1983

Faafetai atu i lau Afioga le Fofoga o le Fono i lenei foi avanoa ua tuuina mai e avatu ai ni ou manatu i fautuaga

ma ni nai faitioga foi pe afai e i ai e faatautu i le Tala o le Tupe ua taatia nei i luma o le Palemene.

E momoli atu lau faafetai tele i lau Afioga i le alii Palemia, lau Afioga Tofilau le mamalu o lau Kapeneta i le galuega fita sa faafeagai ma outou i le tau faataatiaina o le Tala o le Tupe ia maeaea lelei ma maopoopo ma tuuina mai i luma o le Palemene mo se iloiloiloina. E momoli atu lau faafetai tele i le Ofisa o le Tupe sa faafeagai ma lenei galuega. Ma ou te faafetaia foi alii Minisita sa i ai i luma atu i le faiga-Malo i le tofa ia Tupuola Efi i o latou foi taumafai i lea vaitaimi.

Ae lei avatuina se manatu e faasino tonu i le Tala o le Tupe e muamua ona fia fai sau faamatalaga puupuu i le taimi a o loma faiga-palota tele ia Fepuari. E foi i tua lau faamatalaga ona e i ai lou talitonuga e afaina au i lou faamaoni i lou itumalo pe a ou le tautala i mea sa ou folafolaina po o mea sa ou tautala i ai ae lei avea i ai faapea o ni mea e faatinoina ae o ni au taumafaiga i lou nei Sui vaivai e lagolagoina ai faiga-Malo o lo tatou atunuu.

Ao loma le faiga-palota sa faaulutala se faaupuga faapea sa ou faia i lou itumalo, ou te lagolagoina faiga-Malo sao ma tonu i luga o le agaga faamaoni e fai i le mea moni. Ma o i e tau atu ai lou lagolagoina o le Tala o le Tupe e pei ona faataatia mai i le tele o ona vaega eseese aua o le mea tonu lea sa ou tautala i ai, ou te lagolagoina le Malo po o le Itu Agai sa i ai i le 3 tausaga ua mavae atu. E le mafai la ona ou toe foi i upu ua ou fai, ae tatau i lou tagata ona tatalo ia fesoasoani mai le Atua ia te au ma tau mai le mea e fai.

Ou te faamalo atu foi ma faafetai atu i lou itumalo, le itumalo salalau, sei tulou o le itumalo e amata mai i Aleipata ae gata mai Falealupo, ae atonu o le toatele lava e alaala i nei i Apia ma nuu foi e latalata mai i Apia, aua foi o le itumalo lenei e tua i galuega, e tua i galuega a le Malo, o lo o latou atiina ae lea mo o latou aiga ma lo latou fesoasoani i le Malo o Samoa. E tautua i lo latou galulue faamaoni tautua mo o latou aiga ia atiina ae a e a latou fanau i ni aoga e mafai ona latou faaaogaina ai. Atonu o le a afaina lea itu ona o le tulaga o pili ua aliali mai nei, ae i ai lava lou faamoemoe i le Malo, e i ai se taimi ou te lagona e i ai foi se fesoasoani a le Malo o lea foi ua siitia pili, ae faapea foi ona lau mai ni tusi e faafiafia ai le fanau aoga ma faafiafia ai foi matua i nei tupe tetele o le a totogi. Atonu e tofua lava Sui o lenei Palemene ma alo o lo o aoga i nei aoga. E faigata i le faalogo e faigata foi ona tali i se mea fou e tupu mai, ma o lenei la mea fou ua tilotilo atu le isi i le Tala o le Tupe faapea oka, oka se pili o le a i ai, a e le o mafaufau i mea sa faia e le Malo, le tupe tele sa sao mai i tagata, totogi lafoga e fesoasoani i atiina ae nei o le Malo, o le Kolisi o Samoa, Kolisi i Avele ma le Kolisi tele i le motu i Salafai, o aoga laiti i Malifa ma Leifiifi. Atonu a tuufaatasia le fesoasoani a le Malo i nei aoga e matautia le tele, atonu e faitau miliona. Ma o lea foi la ua naunau le Malo e fesoasoani i nei fanau e sili le pili ae atonu o le a faaleleia le tulaga i se isi itu. O le tulaga o faiaoga ma pe o le a lava le tele o le pili, soo se laau e fua manaia

mai ma faafiafiaina ai matua pe a faapea ua iu mai le aoga a se tama po o se teine na tigaina matua e faaoga i le taugata o le pili o aoga, taugata o tusi ma isi mea faapea, ae sau faaali mai ua maua lou tusipasi, ua maua lau sikolasipi ou te alu ai i Niu Sila po o Ausetalia, Amerika po o Rusia foi po o Saina Komunisi o lo o faia nei la tatou faiga -uo.

Toe foi mai la lau faamatalaga i le Tala o le Tupe i le faaletonu o le tamaoaga ua feagai nei ma i tatou, aemaise le Malo o lo o tulai mai nei o se galuega tele ua feagai nei ma latou. Ma atonu o nisi o fautuaga, o fautuaga aoga ua tuuina atu i nisi o Sui o le a faapea foi ona aloaia e le Malo fautuaga lelei. A tuu i se isi faaupuga o fautuaga faale-lelei ma se isi foi vaega mo le lumanai e mafai ai ona faatinoina nei fautuaga.

O se isi vaega sa ou tautala i ai i le taimi a o loma palota e le foi sau faamatalaga. O le tulaga sa ou tautala e faaleleia o aoga. O lena ua outou silafia faamatalaga sa tusia i nusipepa, pe tusitusia foi e le HRPP tulaga o le a taumafai lea pati ia faaleleia aua alo ma fanau a Samoa.

O le Matagaluega o le Soifua Maloloina. Sa tele foi faitioga i le taugata o le ulufale atu i le mai i le falemai, ae atonu o le mafatiaga o lo o feagai nei ma le Malo o lo o taumafai ina ia sailiili nai seleni aua galuega fai mo le tausiga o mai. Ae peitai sa laga foi e sui i le faaletonu o mea taumafa. Ou te faatoluina pe faa-faina lea fautuaga i lau Afioga a le alii Minisita sei silasila totoa i lea tulaga. O le tulaga o gasegase na avatu ae tea mai ua atili ona gasegase i le le taumafa lelei.

O le tau o le soifuuga i le vaitaimi ao tulai mai le Afioga ia Vaai i le tofi Palemia i ni nai masina sa galulue foi nisi o e sa lautogia e ave ma nisi e i ai i nei Komiti e taumafai se faiga ina ia faafoia ai le tau o le soifuuga sa i ai i lea vaitaimi. Tatou te le nanaina le mea sao, ua tele le pau, tele le pau o le tau o mea taumafa, ae o le faalavelave ua le manuia le faasoasoina, ua mafai ona fai se mea e tasi ae ua le manuia le isi itu. Ma atonu o le a silasila totoa foi le Malo i lea itu po o le Afioga foi a Le-Tagalao o lo o faafeagai ma lea Komiti ma mafaufau pe mafai ona fai se faiga e faasoasoata ai nei mea e aumai i totonu o lo tatou atunuu. O nei mea ua taua faapea o patuamoa, mamoe, araisa ma isi mea taumafa faapena, sei mafaufau ma alofa i le motu tele i Salafai vaeane foi o matou itumalo o lo o taape ai i lea motu. Sei alolofa le Komiti a avatu le ofo a le Kamupani i ni mea e fia lau mai ia avatu ai i totonu se vaega a faapea e 100,000 pusa eleni o le a aumai, ia tuu ese la po o le 40,000. O le a ou tau faalaitiiti Salafai aua e tele atu le mauoa o le gataifale o Salafai i lo Upolu nei aua o lea e fai ai nei faiga a vaa fagota mai fafo. Ae afai foi e sese au ia e talosaga atu i uso-a-Faipule mai le motu tele e i ai se taimi tatou te fetuunai ai ma fai se faiga o fesoasoani ai i lo tatou motu i Salafai.

O le isi vaega sa ou tautala malosi i ai o le faaitiitia lea o le auai o le Malo i taumafaiga faapisinisi. O le faletalimalo lea o le Tusitala, atonu o le mea foi lea e fai ai faiga a tagata faigaluega ona faapea o le mea fai tele, e

le popole tele i ai a e a taumafai le Malo e faatau atu ana sea i tagata Samoa, tuu ia tagata mai fafo aua e tele a latou tupe, ae o tatou \$10, \$50, \$100 e mafai e lea ona fatau sea a le Malo ma ave i ai so latou leo i totonu o lea pisinisi. Atonu o i e tofu lava le tagata e alu atu i totonu o le faletalimalo e taumafa lana ti ma tilotilo foi i le faiga o lo o fai ai le galuega a e o lo o faigaluega ai. Afai foi e le malie i le galue a le Pule, atonu o la foi e i ai le Komiti Faapitoa e ave i ai a latou fautuaga, vaai le tagata lea e faapea ma faapea a leai, sue se isi. Ia o si au fautuaga lea aua tasi lea mea sa ou tautala i ai. E tele foi nisi pisinisi o lo o aafia ai le Malo, o le fale-pia, sikaleti, Polenisia. Atonu o nei pisinisi a mafai ona faamatu malie atu e le Malo i ona tagata, ave i ai lo latou taumafai, ave i ai lo latou atamai e fai ai ma faaola ai nei pisinisi atonu o i o le a... ma faafoia mai ai le mea lea ua tupu nei i tagata Polenisia ua faamavae tagata faigaluega. Atonu e le o faamalieina foi lou nei Sui i le faamatalaga a e o lo o pulea lenei pisinisi i ala tonu ua ala ai ona faamavae pe ua vaea ai ia tagata mai a latou galuega. Atonu o lea e i ai le Komiti Faafoe o le a maua uma e latou faaupuga tonu; a o au ia o le faitau nusipepa, faalogologo i le Tala fou a le Siufofoga o Samoa (SBC News) ma isi mea e maua ai o tatou malamalamaga i mea o lo o tutupu i totonu o le tatou atunuu.

Afai nei la ua vavae ese nei tagata mai a latou galuega e o lo o galulue i le malae vaalele, o lo o galulue i felauaiga o tagata malaga o lo o galulue foi i le Ofisa i le taulaga nei, o fea a o i ai? Atonu o lenei pisinisi tulou, ona ou te fia faaogaina le upu lea ua ma'i -ua gasegase. Silasila foi, sa i ai Pili, sa i ai Losi ia o lo o i ai nei Apaula ma Sina, ou te le iloa po o ai nei igoa ia ona pau lava. Ua sola Pili, ua maliu Losi, ae toe o Sina ma Apaula ma isi tamai mea ia e feoi nei, ua taua o Seemu. Ia ae ou te manatu i le femalagaiga a le atunuu mai le motu o Salafai i Faleolo, po o le motu o Salafai i Fagalii. Ia lea ua alu ese nei Pili, alu ese Losi, tuu atu i ai Apaula, malaga mai le sa faimalaga atu i fafo e fia oo mai i Upolu nei ma ni nai oso foi ma aiga, peitai o lea e tuu atu Apaula. Na taumafai foi le SPIA sau tatou o i le matou vaalele, alu atu foi e le mafai ona fai mai e laitiiti le vaalele. Ona e sau lea iinei fiu e faatalitali oo mai au mea ua le ato. E malaga atu foi Sina e aumai au ato o nisi foi ofu sa tuu ane ai ua le atoatoa. Ia silasila totoa le Malo i nei kamupani o lea ua foliga mai lava o le a see atu lava le Polenisia i se tulaga o le a le mafai ona tatou toe aapa atu e taofi mai. Ma sei silasila totoa foi i le teine lea o Sina po o le a tonu le mea o lo o tupu ai. Po o se vaalele ea a Samoa o lea ua faapea mai ua faatau, ae sau lava i le faalogo faapea o lo o i ai lava se miliona pe fia ea olo o aitalafu i le 'Ronfin' ea po o le Kamupani lea a Nauru. Olou vaai foi i ai i tului a Nauru e matautia le mamafa. O le tului a Nauru ai o tului nei e aupito sili ona tele i faaunega-tupe o lo o tatou maua mai i isi motu po o isi foi atunuu e ese ai ma Samoa.

E ia te au le lagona ou te fia tuu atu i lau fanau se Samoa e mautu lona tamaoaga, se Samoa e galulue faatasi ona tagata, se Samoa e felagolagomai. Se Samoa

e uma faiga-palota tatou o mai i le Fale Fono nei fai a tatou faapati, fai pea le mea o finagalo le tagata i ai ma lona ia lagona o le mea moni o lo o faalogoina mai ia te ia lava. E faapena ona ou tautala atu i lenei aso ma ou te le faapea foi e i ai nisi Sui e le o tautala i lea itu. A o le mea lea lava ua ou lagona, tatou omai i totonu iinei, e manaia foi lou tilotilo atu po o le fesilafai foi o Sui mamalu e fealofani, e alofa, e faamagalaga ma taumafai aua Samoa ma lona lumanai. O au nei ua taua foi nisi o le Sui o le taulealea e faapea foi lou uso-a-Minisita le Susuga lea ia Jack Netzler po o le Afioga i le alii Minisita o Faatoaga. Ae tumu nei Sui i le faaloalo, tailo foi i ni faaloalo o nisi o tamalii o lo o sasao mai nei, o le faaloalo lenei e matautia. O lea foi sa ou nofonofa ai e fai si ou ne ou te tu i luga ou te tautala ae lei tutu mai tamalii o le atunuu e fai mai ni o latou manatu.

Lau Afioga i le Fofoga Fetalai, lau Afioga i le alii Palemia ma le mamalu o le Kapeneta faapea foi le paia maua i uso-a-Faipule, o lau tatalo pea ma lou agaga moni lea ia tuuina atu i luma o le Palemene e fai ai se tou faamasinoga.

O nisi mataupu sa ou fia tautala i ai e anoano ma tele e aofia ai galuega a tagata o e foi i lou itumalo, le aufai-faiva aua o au foi o le isi tagata fai faiva, o le aufai-faatoaga, le aufaigaluega i galuega e aupito sili ona maua, salusalu otaota, sei vaeatu lo outou paia, o isi ua fai-pisinisi ua maumea. Atonu o le fetufatufai o alofa, talosaga le vaivai i le malosi i le alofa e pei ona alu atu i le Faletupe e manao i se tupe ae faapea mai alu ia i o e leai se mea e mafai ona faamau ai sau aitalafu. Ao la e i ai fanua e mafai ona maua e galue ai ma tautua ai mo lona atunuu.

Aleisa. O se vaega o lenei itumalo ua leva ona tautua mo le atiina ae o Samoa. O le faaletonu la e i ai i Aleisa ma ou te talosaga atu ai i le Minisita o lo o fitoitonu i ai lenei mataupu o le tulaga o auala-tetele. Ua leva ona tagi lenei itumalo e faaleleia ma e le tau faalateleina fua le auala a e na ona faaleleia faalamolemole ma faata, aua le femalagaiga foi a lea alaafaga i le lauina mai o a latou faaleleleaga i le maketi, le afio mai foi ma tala mai aao e aumai fanua aoga ia latou aoga, po o le omai foi e fia oo i le falemai pe a faapea e tupu mai se faalavelave faafuasei aua e fai sina mamao o Aleisa ma le falemai tele i Apia. Ao faaletonu auala o sina fesoasoani a le Malo i tulaga ia tau atiina ae e atiina ae ai lea vaega o lo matou itumalo aua e le na o tagata o palota taitoatasi o lo o afifio ai. O lo o afifio ai nisi o tamalii ma failauga o le atunuu. Atonu o i foi o le a mafai ai ona faafiafiaina o latou finagalo e matua uunai le eleele aua le tamoaiga o lo o faaletonu nei i Samoa.

O mea tau vai o lo o faaletonu foi ae taatia ia le eletise sei soo muamua Upolu atoa i le auala foi lea ua soo ia ona fai ai lea o Aleisa, pe a fai ua faamoemoe e le o i ai i le atiina ae o eletise. Ae talosaga atu pea e fia maua se fesoasoani i lea itu. O se vaega foi o lenei itu o lo o alaala i fanua pu-moomoo i Talimatau, a outou silasila i mea o lo o nonofo ai nei tagata, o lo o tagi mai e fia

fesoasoani i le atiina ae o le atunuu e fia galulue i le eleele ae peitai e le o maua e i latou lenei manuia, e leai ni eleele. Ou te talosaga atu ai foi i le Afioga i le alii Minisita o Eleele sei silasila ane pe i ai ni nai eleele o lo o avanoa e faaavanoa pe lisi po o le a lava le faiga e fai i ai pe tuu i ai se 5 tausaga o e galulue ai pe fua lelei, e faapena foi ona toe fetuunai. Afai e leai, ia ua ou le iloa la po o le a se isi mea o le a ou toe talosaga atu ai.

E faapena foi la i lo matou itumalo i Aeleele, o ia foi e tua i le WSTEC ae lumafale mai foi i le isi fanua e le mafai ona fai ai ni atiina ae. O Aeleele ma Sogi a outou silasila i le fasi-mea lea o lo o alaala ai foi nei tagata ola o Samoa e lumafale i le fale penisini ae tuafale i le toga-togo. Ia alolofa le Malo e pei ona ou fai atu e toatele tagata e fia galulue, toatele tagata malolosi e tua i galuega, ae fia galue foi i le eleele. Ou te talosaga atu ma le faaloalo i le Malo i se latou fesoasoani i lea itu ma e taloaga atu foi le aufai-faiva, ia alolofa foi le Malo i le tulaga lea i le aumaia o vaa fagoga mai fafo.

E i ai le pese tatou te pepese ai i le masina lea o Novema "faasao mo a taeao". A omai vaa fagoga tetele ia mai fafo e tasi lava le faataatiaina o le upega ae fia masina e leo toe maua se i'a i le mea lea. Ou te tautala i lou faamaoni aua ua ou vaai i ai o fai. Sa i ai foi ma le afioga a le alii o lo o pulea nei le Ofisa o Faiga-Faiva ao fai lenei faataitaiga. E atoa le masina o ou alu pea i ai e vaai pe faamaonia lea tulaga, ma ou te tau atu ua matua faamaonia le le aoga ona aumai i Samoa o mea nei o vaa fagoga e fai upega. Ia alolofa i o tatou tautai o lo o taumafai nei e atiina ae le sami e totogi ai o latou vaa fagoga. Ua taugata foi le i'a ona o le taugata o vaa lea sa faapea e ui mai i le atiina ae o nuu ma alaafaga, ae peitai ua le o toe i ai lea mea. Ua alu atu lava le tagata ia faatau atoa lona vaa i le \$3,800, faatau mai ma le afi e 25 hp ua \$1,300. Ia faatau ma le penisini ua sii mai i le \$74 le 1981 i le \$118 le taimi lenei, ua tele tele le siitaga ua tusa e \$40 le eseese. O lea foi la e tau fetuunai e le paia o tautai o le atunuu, e mafai ona faamalieina le fofoga taumafa o le atunuu i i'a fou faapea foi le atiina ae ma tau totogi le latou penisini ma isi mea faapena. A maua mai foi se isi fesoasoani mai fafo, e fesoasoani ai i lea atiina ae aoga e fesoasoani ai i le tatou atunuu, e lagolagoina lava e lenei Sui.

O le talosaga i le atiina ae o nuu ma itumalo. Atonu o lenei polokalame o se polokalame aoga, o se polokalame ua loa foi ona fai, o se polokalame ua maua ai ni mea a nisi, polokalame ua fiu foi isi e leai lava se mea o maua. Ou te manao ia faaseseina au upu nei, ou te manao ia faaseseina ma o le faaseseina o upu nei ou te talosaga atu ai i le Minisita e faafeagai tonu ma lenei atiina ae o le atiina ae o nuu ma itumalo, pe mafai

ona aumai i le Palemene se Faamatalaga o Tupe na maua mai e faatino ai lenei atiina ae, o tupe ua faaoga, ma le aofai o vaa ua maua ai, le aofai o pa-uaea, le aofai o faleaoga, ua aafia foi ma falesa, o loli, ma nisi mea pe a mafai ona aumai se ata e faaali mai ai i Sui mamalu o lenei Palemene pe mata o le polokalame ua aoga e 100% pe aoga i le 50% pe ua aoga i le 10% o le atunuu.

Ou te talosaga atu ai i le Afioga i le Minisita afai e talafeagai ai ma le taimi o le a outou tali mai ai ma sailiili ai ia ou te talosaga atu ma le vaivai lenei Sui, ia alolofa ia aumai se ata laitiiti o lea polokalame.

Faafetai atu i lau Afioga i le Fofoga o le Fono...

Ae lei faaauauina atu lau faamatalaga pe faauma atu e muamua ona ou momoli atu le faafetai tele i le Susga ia Papalii e tusa ma le faatuina o le lafo faapea foi le na faaluaina, o e na ioe, e foi na tetee i le faaauauina o lou taimai. A ua talafeagai foi sa fuafua foi le lauga i le 30 minute. Afai ua i ai se vaega o lau lauga ua paopapa i la outou faafofoga po o le gagana ua faaletonu ona o le Sui e fou, atonu e le uma i i fonotaga, o lo o i ai foi nisi a tatou fonu o i luma o le a taumafai e teuteu mai i ai ia lau tautalaga.

Faafetai i lau Afioga i le Fofoga Fetalai i lou faapalepale mai ma lou onosai mai i le taumafaiga o lenei Sui. E momoli atu lau faafeai lau Afioga le Palemia, lau Afioga Tofilau le mamalu o le aiga-Kapeneta faapea foi le mamalu o Sui o le Fono. Ia alofa le Atua ia foai mai le malosi ia te outou uma. Faafetai.

Afioga SAVEA SIONE



Itumalo Faaalalafaga:

Anoamaa Sasae

Filifilia:

11 Mati 1982

Faatauto:

13 Aperila 1982

Lauga Faataupou:

1 Mati 1983

Faafetai lava i lau Afioga i le Fofoga Fetalai ma le mamalu o le Maota. O lenei foi taeao, o se taeao ua tau paie e tu i le la lenei aso, i le soifua maua ma le lagi e mama i lau Afioga, faapea foi le Afioga i le Palemia ma le aiga Kapeneta ma le mamalu foi i le Palemene o Samoa i Sisifo.

Ua ou tulai atu ma lou faaaloalo i lau Afioga ma le mamalu o lenei Maota e taumafai foi sou sao aua lava le faafoeina o le Sa o le atunuu. E le gata i lea, o se tasi foi o tiute faa-faipule ua avea ai au ma Sui o lenei itumalo e molimolitali i lo latou finagalo i totonu o le Maota o le Palemene o Samoa i Sisifo i ni auala e auala lea i se manatu faaalua. Atonu o mamalu lava o le atunuu ua uma ona aisa pe oo foi i ai le leo o Lufilufi, o Sa le avea o le atunuu. Samoa e, ma lau tapuai maia. Ou te le faatauagavale foi ia Samoa i Sasae o lo o tatou soatau mafana i le vasa Pasefika ona e talu ai e tele lava le aoga. O lea foi la matou te faapea atu ai, tapuai maia.

E muamua ona ou faafetai i lau Afioga le Fofoga Fetalai ona e moni a au, le saunoaga a le Sui mamalu sa mavae atu nei, ua tatau ma onomea ia te oe le Nofoa o le Maota lenei aua i lou iloa e te tutoatasi, e te le faaituau, e te faamaoni. I lenei foi taeao ua uma ona e toina le pa i le viiga i le Atua, ua uluitino matagi lelei, talosia ia faafofoga mai Ieova i le tatalo.

Lau Afioga, i le matau atu i le taulumaga o lenei tauaofiaga, amata mai lava ina ua maea la tatou palota lautele ia Fepuari 1982, sa ou tautalagia foi le aso ananafi i ni matatia e sili ona matautia i tala faasolopito o le atunuu, o ni matatia aoga, ogaoga, matautia, matuia so o se mea. O ni matatia foi ua faatuina i lenei paeaiaga, atonu o se aoga foi lea po o tama fanau a le atunuu lenei o Samoa mo le lumanai. Ia talosia ia ina ia sao a la Paulo, faatuanai i mea faaletonu a ia muamua i mea sao.

Lau Afioga, e anoano lava ni manatu e fia molimolitali i lenei taeao ma lenei aso aua o le mea moni o lo matou nuu e i ai le suafa lea “e lua po lua ao”. Ae le o i ai foi se naunauga aua e matau atu i le Maota lenei a ta mamafa atu foi ia ua leai mai; ae sili la ona ou faamama tatou talatalanoa i ni taofi taua ina nei meane ua ou le aulia le 30 minute.

O le tau o le soifuga lau Afioga ma le mamalu o le Maota. Ao le i papale mai lenei nofoaiga, amata mai i lona tau amataga i le 1982, lau Afioga ua tumu saesae Samoa i folafolaga ma tautinoga. I le matau atu la i le taeao lenei ma lou faaaloalo, ia atonu foi o le a pea mai le Afioga i le Palemia, tuu atu sina avanoa ia lava vaega. E pei lava ona maua i ni Sui-a-Faipule ia latou saunoaga i taimi ua mavae, a fofou loa lou faiva ua tapena loa mea fagota so o se mea ma e faapea foi la le aso ma le faiga-Malo. Ua leva foi ona lului malie le Afoga i le Tootoalii i le toi lenei, i le mea o se tamalii, onomea, fetai, agavaa i le ma ou te toe faaluaina foi se lafoga i le tama matua le Vaa-i-Malae. O le Afioga ia Tofilau e tele ona itu e sili ona manaomia. A fai i le Ekalesia e amanaia, o se faifeau e sili ona ou fia lotu ai; a fai foi i le atunuu e lafolafola tama seu gogo, o le fuesina foi o lo o i ai. A tuu mai foi i le Maota lenei i Tiafau nei, ua avea ai o ia ma tama o le atunuu, o se tasi o toe ulutala. I nei la folafolaga lau Afioga e ua anoanoai, e foliga mai a ou faaupuina i se faaupuga faa-nei-ona-po, ia tailo e mafai ona faapea o le tau ‘ole’ole, e mafai ona faapea atu o se faatosina, i au lava ia faaupuga i lou lagona atoatoa i ai. Aua o le mea moni o le Maota lenei, e sao ai nisi o saunoaga, e le milimilia ai faauu ni upu, o upu moni, o upu faamaoni ma upu o le alofa ia Samoa mo a taeao.

Ma o nei la folafolaga lau Afioga ia tailo po o afea. Masalo o le a faatalitali ia Kapilielu po o Agelo, e ui lava la i ia lagona ae ou te manatu amuli faataunuu. Nei meane ua i ai se tofa i le Maota, ai o au nei ou te lima tusitusi pe ou te fia faasinoina sese, ou te fia mulimulitali i upu ma saunoaga ma tautinoga ma folafolaga. O faataitaiga faigofie lau Afioga, afai lava ou te tautino i sou alo laitiiti alu ina tae le otaota ona e sau lea avatu sau keke, e pei o le peapea, o le upu e to ia te au. Afai la e le faataunuuina lea folafolaga e alu le aso atoa o tau pepeloina oe. Atonu e mafai ona ou faatino lea faataitaiga faigofie ma le malamalama gofie inei faapupulaga.

Ona ou see atu lea lau Afioga, o lo o ou i ai pea lava i nei folafolaga lau Afioga, aua o se tasi nei o vaega ua ou faaupuina ua ala ai ona tatou faapenei. I le o lo o i luma nei se tasi o nusipepa e lomua e le Itu Agai lea ua seei

Saunoaga Faataupou a Sui Usufono 1961-2011

nei, ua faaigoaina o le HRPP - O le Itu e Puipuia Aia Tatau a Tagata, o lona uiga e puipuia foi ma lau aia tatau ma ua ao la ina ou faaalua i se auala manino. E faapea lenei faaupuga o le malelega mai Salega. Ia tailo ou te le saili foi, e pei lava ona ou fai atu i le uluai taimi ua uma ona aisa Samoa ma ona upufai. I le tatalaina o le Fono Faitulafono i le tausaga 1983 na aumai ai le malelega a le Ao o le Malo i le Maota lenei, fai mai nusipepa a le Itu e Agaia Aia Tatau, o le Malelega mai Salega, atonu ua talafeagai, ae faatusatusa ane e lau Afioga ma le Maota lenei. O lenei la malelega o lo o i ai ni folafolaga, ioe lau Afioga, folafolaga ia ua ala ai ona tatou penei.

Faafetai lava i le Uso-a-Faipule ma o ia lava foi vaega ua malamalama foi i ai, faafetai le faamanatu mai. Ae ona o se agaga e fia faamalamalama se mataupu, ia o le a le toe taua foi lea vaega aua e lelei foi le faauilavea e toe maua ai nisi manatu fou.

O lo o ou i ai pea la i folafolaga. Fai mai se faitauga o lenei lava nusipepa ua le talafeagai ai i lau lava faalogo ma lau aia tatau, e tiga lava ona fai atu Komiti e faatu sao le tau o oloa ae ua faalavelave le Malo le malamalama atoa ma le le loto i ai ina ia manuia taumafaiga. Atonu o le Malo le malamalama lea sa tuanai atu e i ai le Tofa a Tupuola. Lau Afioga, e faanoanoa foi le taofi aua o nei lava faaupuga, e lua ni mea matuia e maua mai ai, i lou lagona faa-Sui Usufono. Muamua, e manua ai le loto. Lua, e faatosinaina ai le mafaufau. Atonu o le ala lea ua seetia ai nisi o itumalo i le malu o le tai masa inei lava faaupuga; afai e leai faafetai.

I le Tala o le Tupe ua taatia nei i le Maota lau Afioga ma le mamalu o le Palemene, ou te fia faitauina ni upu taua tele i lau faitau e tusa ai ma le auala atu o lau faamalamalama o lo o fai nei. Talu ai le faaletonu ma le le mautu lelei o la tatou atiina ae o le tamaoiga ma o lea, o le mea moni a faaletonu loa le tamaoiga ona tatau loa lea ona foia vave i ni faiga mautu ma talafeagai.

O lau fesili la o se mea e fia faamalamalama ma le faaaloalo i lau Afioga. O a la ni faiga mautu, o a ni faiga e talafeagai? Atonu o le mautu lea ua amata mai nei foi e le Susuga i le Le-Tagaloa o lo o taitaia lea vaega sili ona manaomia o le tauofoga, lou Uso-a-Faipule faafetai atu foi. Ae o se mea e sili ona ogaoga lau Afioga i lenei lava mataupu o le tauofoga, atonu e te lei afio lava e taumafai mai sau faatau. Ua amata ina gaogao sefe, gaogao fata o faleoloa a o atu i e o lo o faapea ua maua le tauofoga e tasi lava le tali lea na maua i le taeao nei i le saunoaga a se tasi o Sui, ua leai. Ua lona fuaiupu e 6, ua faitalia lava le tagata po o le fai-pisinisi i lana aia tatau i ana meatotino. O lona uiga, po o fea lava e tau i ai lenei tauofoga, ia tailo. I se taimi talu ai nei latalata i le Kerisimasi ua faatau le falaoamata i le uafu i nofoaga faitete. O ai e pau i ai pe a lavea se tasi i lea tulaga? O ai e faafoeina ia mea? Ua ala ona faapea ona ua natinati, naunau le atunuu ina ia fia maua. Lau Afioga e pei lava ona ou talanoa atu ma avatu so matou lagona vaivai i lenei aso.

Na maua foi tala i le faalogo o le a sauniuni mai se ata o lenei lava mataupu o le tauofoga mo lenei tausaga atoa i se eleni, masalo pe faapea ea o Amerika e aumai ai. O le fesili la e tulai mai i lou lava Sui Usufono, afai lava e aumai le eleni o le ituaiga o le A1, 3 taimane po o se isi lava ituaiga. Aafai e tatala atu lea eleni e tasi pe 3 ni ia, o le a taumamafa ai lava le atunuu ia Mati, Aperila e tau ia Tesema. Ua leai se filifiliga, ua leai sau aia tatau e fesuisui ai. O le tasi lenei vaega e sili ona ou faanoanoa ai lau Afioga i lenei lava mataupu o le tauofoga. Ou te manatu a avatu foi le tele o ni manatu i la lea vaega e avatu foi ma tuu ane ai, a e o le autu o le taofi e auala atu i lau Afioga le Fofoga Fetalai o le Maota nei, ua sili ona tuu, tuu nei loa, e leai sona aoga tele i le atunuu. Afai foi o se tasi lea o folafolaga e tusa ai ma le tulai mai o le faiga-Malo lenei e le talafeagai. I le 2 i le 4 tausaga talu ai e tele lau filifiliga e fai, o le mea sili ona naunau i ai le atunuu o le maua, ae o le lē maua, e faapenei la ona tatou i ai i le mativa.

O lea la ou te faapea atu ai aua e taua foi ia te au se finagalo na faaalua e le Afioga ia Mamea i tusitusiga lava a lenei Maota a o lo o maua lea i le pasiga e 158 i le aso 7, masina 12 i le 1979. Sa ia taua ai e faapea tuu ia nei mea o 'allocation' (tupe faaagaga mo le faatauina mai o oloa mai fafo) ona e auala ai faa-polokiki. Atonu ua faamaonia foi le taofi, ai la o lea na tuu ai ae fai le tauofoga. Ou te manatu afai ua tali lea taofi, ia e sili ona toe foi mai la tatou tuusaoloto i le aufai-pisinisi e aumai a tatou oloa sei lalata foi i le faiga-palota ona toe faaoga lea o le saunoaga a le Sui mamalu.

E maua foi i le saunoaga a le Sui mamalu i le Malo nei o Samoa o se Malo saoloto, ae pei e tetee i ai le Afioga ia Fepuleai. Ou te faaluaia foi ona e foliga mai ua amata lava le faiga-malo a le Afioga ia Tofilau i le pulepuletutu mai o lenei mataupu na tau aliali mai i le taeao lenei. Na faia au i lea faaupuga i le Tala o le Tupe i lona pasiga e 11 e soo tulutulu parakarafa ia e 2 a o lea e uiga mai e eseese aua o lea lava parakarafa e faapea. O le a ou faitauina atu: O lea ua fuafua ai e le Malo e afua mai i le aso 1 o Aperila 1983 se lafoga e totogi i tagata taitoatasi ua nonofo i faletalimalo e \$1, ae o lalo ifo o lea parakarafa o lo o i ai le \$20 mo le malae vaalele.

Faafetai lava i lau Afioga, ou te faafetai atu foi i le Sui mamalu, ae talu ai ona ua e saunoa mai, e leai sa ou tau apaapa lava i lou Nofoa ae ua fai sina mamao i tua ae ou te usitai lava e pei ona faatonuina ai le mamalu o le Maota nei.

O le Tiute. O le fesuiaiga nei o le tiute ua aliali mai i lau Afioga ma le Maota atoa ai ma le faafofoga a si o tatou atunuu, ia o lea ua fesui mai i le CDV i le CIF. Ae ou te fia faamanatu atu lava, ae lei aumaia se taofi i ai i lau foi faitau i ai i le Afioga i le Minisita o Galuega nei le Tofa ia Taua sana saunoaga i le Maota lenei, maua lea i le pasiga 722 i le aso 2/5/80, e matua faitio tele i le nofoaiga talu ai ona o le tau o le soifuaga ua matua maua talu ai le tiute. Ma sa faapea se faatusa a le Afioga a le alii Faipule po o le Afioga a le Minisita i lenei vaitaimi, ou te faatusaina le tau o le soifuaga lenei

ma le tiute i se “tagata ua tau malemo” vaeatu le faafofoga a le atunuu ma le mamalu o le Maota lenei.

Ia i lenei vaitau atonu foi e sao le Afioga a le alii Minisita. Ia a o lau faitau i ai i le taimi lenei ma lau faaupuga i ai, e tusa ai ma le fesuaiga o totogi o le tiute, lau Afioga, o se tagata ua matua malemo, goto una i lalo. Aua foi i lau matau ma le suesuega i ai i tusitusiga a le Maota lenei i lenei faiga-Malo talu ai, i na tausaga pe latou te lei faaogaina ea lenei tiute ua tau o le CIF, le tiute foi lea fai mai e faatau loa o le tau o le taavale i o, o se faaitaiga, tuu loa i ai ma lona inisua, tuu i ai ma lona tau i felauaiga, ona aumai foi lea i le uafu tuu i ai ma ona felauaiga iinei ona faaopoopo foi lea i ai ma isi tiute ia e taua o le tiute faaopoopo. O lona uiga a faatusatusa la le tau o le taavale lenei i le tau lenei, e sili atu i le 30 ma ona tupu pasene. Ou te le lelei foi ini fuainumera lau Afioga a e o lau faatatau lenei i ai. Ia o lenei la ua auala mai ai lau faaupuga, o se tulaga ua i ai i lenei vaitau, o se tulaga o se tagata ua malemo ma goto uga i lalo. O le siitai la ua i ai nei ua matua pagatia faasasao ai le atunuu.

Faafetai lava i lau Afioga. Afai o le finagalo lea, ia peiseai o le agaga lava e faamanino lau faamatalaga e tuuina i luma o le Maota. Ia o agaga lava ia e aumai ai ni faaitaiga. Ui o lea, ia e augofie foi le auauna nei.

O le ala ou te fia taua pea a o ou i ai pea i le Tiute, o lea foi ua toe atagia mai i le Tala o le tatou Tupe le Matagaluega lea a le aufai-moli po o le EPC. Ua i ai foi se isi faaitietiega o le avega mamafa i lea lava vaega o le aufaigaluega a le Malo i le EPC. Ia e lagona foi ia te au lau Afioga, peiseai lava a sii le tiute ona oso foi lea o le iunite latou i luga. Aua o lau matau pe ua 23 sene ea le iunite ua i ai nei. Ia afai o le a faamaonia lea vaega, ia o le a faapena foi ona soso i luga le totogi ma le siitia o le tau o le eletise o le a faaopoopo atu i le mamalu o le atunuu o lo o latou faaogaina le uila.

Ona ou soso atu lea ma le faaloalo lava i lau Afioga i le Ofisa lea o Aoga ma se lumanai manuia o le atunuu. I le faitau atu i le Tala o le Tupe i le \$150,000 o le a sue mai i tamaiti aoga o le Malo ina ia faafetai e totogi ai faiaoga. O le fesili ia te au lava, lau Afioga ua silafia lelei la e le Kapeneta ma le Afioga a le alii Minisita o Tupe, e gatafia e lenei tupe pe maua foi lenei tupe. Ia a faapefea la ona maua lau Afioga, o lea lava ua alalaga ua faa-fagogo-tagiao le aoga fua o alo o le atunuu, a o lea ua fafa atu ai ma le toe faaopoopo o pili o totogi o tamaiti. Ia o lau tali - afai o se numera sa i ai nei e maua se 10,000 oni tamaiti aoga, i matua ua latou lagona lenei siitaga o pili o aoga. Ia tailo, afai e toafa pe toalima lau fanau, vae atu lau Afioga ma lenei Maota, ua ou le gafatia.

Faafetai lava mo le uso-a-Faipule ua le lagolagoina foi o le manatu vaivai, ia ou te faafetai foi i e na lagolagoina. Ae talu ai e le mafai lava ona noatia se taofi i lau Afioga ona o ita, o lota uluai taimi lenei o se Sui e fou mai i le Maota lenei; a o lea ua matau atu o le a faalolo lava lo matou tootoo a e usitai i le Maota.

O turisi po o tagata tafafao mai. A e ou te lei taua lea vaega, e ao lava ina ou lumafaleina foi le Afioga a le alii Minisita o Tagata Tafafao, le Susuga lea ia Tuilaepa e pei lava o aso ananafi. Leai, afai foi ua e faafitititia, ia ou te tautino atu o lea lava e manino i le atunuu; a tua le nuu, e iloa uma lava e Lufilufi matai Atua. E le gata la i le ta masaniga faale-atunuu, ta te masani foi i le Maota lenei ua 14 masina talu ona ta feiloai. A e ui la i lea, afai e te le fia masani ia te au, o naunauga lava o Lufilufi e pola puipui ona tapanu. O le tasi lenei o atiina ae ua matua mafatia tele. Ou te le toe tau faamatala atu lau Afioga, aua e ogaoga foi le Sosaiete o Tagata Tafafao e taumafai o lenei atiina ae. Na saunoa foi le Afioga ia Le Mamea ua tulai atu i se fonotaga talu ai i le 1979, e matua faamafanafanaina lava lona lagolagoina o lenei atiina ae o le atunuu, o tagata tafafao mai. Ia o lea la ua tulai mai nei lau Afioga, le faataunuuna o lea vaega e le Afioga a le Palemia ma le Kapeneta. Atonu lava a o lei faaiiina lau lauga, ou te faatuina atu ai le vaega lea e 12 o le Tulafono Tumau, se lafo ina ia talanoaina lenei mataupu ona o se mataupu e taua tele mo le lautele, ma e o se mataupu faavavevave.

E tele lava ni mataupu ae talu ai ua puupuu lou taimi o le a ou see atu i le Esetete.

O lenei Matagaluega ou te le iloa po o ai e pule ae o le a tuu atu pea i lau Afioga a le Minisita ma la outou Kapeneta, o oe lava lea e faafoeina lenei matagaluega. E tele mea ua faaletonu i le Maota i Niu Sila ona o le tulafale o le nuu lea e pulea nei, le tulafale lea o Leaula o lo o pule nei i le Esetete i Niu Sila.

Ou te usitai lau faatonuga lau Afioga a le Fofoga Fetalai. Ia afai foi ua sala se gagana a la outou auauna, ia e faamoemoe lava o le Maota lenei e sulu ai finagalo ma ni tofa mamao. Ia manuia lava le fonotaga.

Tofa SEUMANUFAGAI TUFATU



Itumalo Faaalaalafaga:

Palauli

Filifilia:

11 Mati 1982

Faatauto:

13 Aperila 1982

Lauga Faataupou:

3 Mati 1983

Lau Afioga i le Fofoga o le Fono faafetai mo le avanoa. Ae ou te lei tautala i ni manatu, e momoli atu lau faafetai i lau Afioga le Fofoga o le Fono, ona ua uma ona e momoli laau i fogaa aua se faafetai i lo tatou matai, ma ua tatau foi ona muamua mea ia i Matautu-sa aua le viiga ma le faafetai i luga, aua foi se tatou faapolo ma se tatou faasagi i le matai sili i le lagi. Faafetai i le Atua ua tatou maua lenei taeao fou, lagi e mama i lau Afioga le Fofoga o le Fono faapea foi le Palemia ma le Kapeneta, faapea le mamalu o le Palemene i lenei taeao fou. Faafetai i le Atua ona o lenei taeao fou, sa lilo i manatu e mafai ona toe potopoto i le aso ananafi na atofa

ai ina ia mafai ona tatou penei. O ia la faatasiga uma sa tatou tuu i luma o le Atua aua e ui lava i le tofa liliu ma le utaga loloto, ausaga e le tuvae mea uma i le finagalo o le tatou Matai. O lenei la ua tatou maua lenei taeao foi i le alofa o le Atua, lafo i le Atua lenei aso.

Ma ou te muamua ona avatu lau faafetai i le tapuaiga a le mamalu o Samoa. Faafetai i le tapuaiga i le Afioga a le Ao Mamalu o le Malo o Samoa, faapea foi i le Sui Tofia; faafetai i le tapuaiga a Samoa atoa i Aiga ma a latou Tama, Pule ma Tumua, Ituau ma Alataua, Aiga i le Tai ma le Vaa o Fonoti. E aafia foi le leo ma le tautalaga i o tatou uso i Sasae, o Amerika Samoa aua le tapuaiga i le mamalu ma le maualuga o le Faleagafulu, Sua ma le Vaifanua, Fofu ma Aitulagi, Ituau ma Alataua, Saole ma Saleaamua, upu i le Launiu na Saelua. E faapea foi i le tapuaiga aua le aofia o alii, le paia ma le mamalu o Faatui, le auvaa o tootoo ma upu i le Manuatele, ia tapuai maia. Tapuai maia Auauna a le Atua ua talafaauto ia Samoa o lo o latou nono se manuia o Samoa atoa faapea foi tapuiaga i Ulu o Kamupani eseese o lo o latou fesoasoani i la latou tautua i le Malo o Samoa i le auala mai o nisi mea aua le Malo o Samoa.

O le aso o le a ou tuusao i ni fautuaga, ou te le ta i utumaa ma nisi tulaga, ae ou te tuusao i le fautuaga ona ia vave ona maua le tulaga o le tatou aso ma mea fai. Lau Afioga a le Fofoga Fetala'i ou te fautua atu, e ala atu i lau Afioga ona o tulaga i le Minisita o Faamasinoga. O i ai le mataupu matuia lava i lea foi matata. O faamasinoga foi nei ua iu a latou faamasinoga ae tuai ona fai a latou iuga. O lea tulaga e aliali mai o i ai ni faafitauli se tele, ona o la e lau mai luma se iuga o se faamasinoga, taatia taatia toe fai mai le iuga ua i ai se eseese laitiiti i le faafofoga ae na latou faalogoia. Ou te talsoaga atu ma le faaaloalo i lau Afioga a le Fofoga Fetala'i, faafofoga le Minisita o Faamasinoga, ia alofagia ma tataua lava ona uma le faamasinoga, o le taimi foi lea ua tataua ona maua ia faaiuga, ona o lena lava le tulaga o lo o aafia ai tele le mamalu o Samoa.

O lona lua. Ou te fautua atu i lau Afioga a le Fofoga Fetala'i, ua auala atu lava i lau Afioga tulaga uma i le itu lea e uiga i vaa lau-pasese i lo matou mata o Salafai. O lo o i ai lava faafitauli e tele. O nisi aso o lo o tofafa le mamalu o le atunuu i ia nofoaga, ona e o atu e le o sau le vaa, afai lava e o atu ua tea le taimi a o lo o i luga pea le la, ia ua tofafa i lalo pe toe foi mai foi. O lea e fautua atu ai, le Malo e o Samoa e ala i lau Afioga a le Fofoga Fetala'i i le Minisita o Femalagaiga ina ia alofagia ma toe faaopopo mai se vaa mo le vai-nuu lava lea. Ou te le toe tautala i aso ua alu ma nisi tulaga, a o le taimi nei ou te talosaga atu ma le ava lava, ia aumai se isi fuafuaga ina ia faavave mai ni vaa mo lea vainuu, tele lava tulaga ua i ai ma ua faaletonu. Ona o alo o le atunuu o lo o aoga ma fia maua mai aoga, ae omai ua tea le taimi, pe toe fia foi atu foi, ae o atu faapena i luga o le uafu. Ma le faaaloalo lava.

Ou te talosaga atu ona o lenei itumalo faatasi ma Satupaitea e faasino tonu lea i le alii Minisita o Galuega. Ona o lo o i ai le faaupuga e faasolo pea le auala ma

faatasi ai ma le moliuila a o le tulaga o lo o i ai, ia o lo o pagatia pea nei itumalo e lua aemaise lena vaega atoa o lo o nofo ala i le va o Salelologa, Palauli ma Satupaitea. E momoli atu lau talosaga i lau Afioga a le alii Minisita, ia alofagia o lena foi ua taoto iina le talosaga ina ia faataunuuna lea faamoemoe e tele tulaga e aafia ai.

O le falemai foi i Satupaitea o lo o tausia ai le soifua maloloina e faigata foi o le leai o se moli. O lea ou te talosaga atu ai ina ia faaauau atu i ia nofoaga e lua la tatou galuega.

O le talosaga i mea ia o Fomai. Lau Afioga i le Fofoga o le Fono, o tulaga o Falemai tetele o i ai i lo tatou atunuu o Samoa, ou te le tautala faapito i le Falemai o lenei itumalo. O se mea lea o lo o tulai mai i le tele o Falemai i itumalo ua na ona taua o Falemai ae leai ni Fomai. O lea e talosaga atu ma fautua atu o tulaga lava ia o faafitauli. Afai o se afioaga mamao ma ni nofoaga o i ai ni Fomai, ia o se isi gasegase atonu na tuu e manuia ae ua oo atu i le Falemai e leai se Fomai toe fuafua i le isi vaega o i ai le Fomai, e taunuu atu ua tulaga le manuia. O lea ou te tatalo atu ai ma fautua atu, ia alofagia ia tulaga e le faapito na o lenei itumalo, a o falemai uma o Samoa e i ai ia tulaga.

Ia e tele mea ou te fia tautala i ai ae ua aafia foi i saunoaga a nisi Faipule. Ma e ou te le toe foi atu i ai; tau ina tulaga mai faapea. Pe afai e oo i le taimi ina nei meane ua faapea mai se isi vaega, e lei tautala le Faipule lea i le mea lea, ae ou te faapea atu ou te faaopoopoina mea uma lava na saunoa i ai le mamalu o Faipule ua uma ona saunoa. Ou te talitonu foi la e tatau ona maua i ai sou avanoa i se taimi mulimuli.

Le mamalu e o Samoa, e i ai le tulaga o lo o aliali mai ina ia tofamamao ma ia uta loloto; lea ui a o lo outou paia ma lo outou mamalu, Aiga ma a latou Tama, Tama ma o latou Aiga, Pule ma Tumua, Ituau ma Alataua, Aiga i le Tai ma le Vaa o Fonoti, ou te fautua atu. O lo o matau pea i le faalogo ia tulaga o a tatou fono faatupu, faatamalii, aua nei o tatou fetineiai, aua nei ponaiva ae liaina i ala, o lo o faafofoga le lalolagi atoa ia tatou fonotaga. Aua nei faasea mai le Malo o Samoa e faapefea ma faapefea; e leai e pule lava le tamalii ia i lona lava finagalo; ae ou te fautua atu ma ou tatalo atu, Aiga e o aiga, o Tama o Tama-a-Aiga aua nei o tatou fetineiai. O lea foi ua tulai mai lea Malo e le fau ai, toeitiiti foi uma le tausaga a ia tatou taumafai i la outou tofa faatupu ma le tofa faatamalii uta faa-faleupolu ma tulaga fealoai faale-atunuu, talosia ia aua nei ponaivao ae liaina i ala i le faafofoga mai a le lalolagi atoa ona aumai lea i le Malo o Samoa.

Ia o lau fautua atu lea, e le umi sau lauga a o le fautuaga lava ina ia alofagia faatamalii ona fai le faiva, faatupu ona fai le faiva aua o le tupu. Ia, ia viia le Atua.

O le Tala o le Tupe e pei ona maau i ai le Afioga a le Palemia ma lana Kapeneta, ia e momoli atu lau faamalo ma lau faafetai. O tulaga uma ua uma ona outou saunia, o o outou mama na ina ia maua mea uma e pei ona outou fuafua ina ia manuia le Malo o Samoa aua taeao. Tafi i le lagi lau Afioga i le Fofoga o le Fono faapea foi le

Afioga a le alii Palemia ma lana Kapeneta, ia viia le Atua. Le Palemene o le Malo o Samoa, ina ia maua se tofa ma le utaga loloto. Ia manuia le Fono.

Afioga SIFUIVA SIONE



Itumalo Faaalaalafaga:

Gagaifomauga Nu.2

Filifilia:

11 Mati 1982

Faatauto:

13 Aperila 1982

Lauga Faataupou:

1 Mati 1983

E muamua ona ou momoli atu le faafetai tele i le Nofoa

i le Afioga i le Fofoga o le Fono ona o le avanoa taua mo lou Sui. Ua faafuaseia ona ou tulai atu ona ua matau atu i le Maota ua leai se tasi e tulai mai e tauaveina le avanoa lenei, ma le manatu foi o le Sui na sei mavae atu nei, o se tasi lava e uso mafana i lalo o galuega ma Komiti e pei ona lautogia ai i matou. Sa ou manatu la e fetuutuunai le tatou galuega, ui o lea e le faia lava sou loto i le mea ua tofa i ai le Nofoa i lau Afioga i le Tama a le Malo, lau Afioga i le Fofoga Fetalai.

Ou te manatu o lou Sui e le tele nua ni au upu e fai i lenei avanoa ua tuuina mai mo au. Ae ou te lei fai atu se upu e ao lava ona ou faatulou atu le paia o le atunuu. Le paia i le Ao o le Malo o Samoa i Sisifo, le paia o Aiga ma a latou Tama, o Tama foi ma Aiga, le paia o Tumua ma Pule, Ituuu ma Alataua, Aiga i le Tai ma le Vaa o Fonoti; le paia foi ia Sua ma le Vaifanua, Fofu ma Aitulagi, o Faatui ma Tootoo aua a le Manuatele, le Tootoo i le Faleula. E ao foi ona lagona mai lou leo o le Pasefika i Saute nei seia oo atu i Niu Sila, Ausetalia, Amerika ma nuu mamao i nisi o le atunuu o lo o tau faafogafoga mai.

E faafetai atu foi i le tapuaiga a Ekalesia e fia i le atunuu i la outou tapuaiga aua le alofaiva o taitai o le atunuu. Lau Afioga i le Fofoga o le Fono faapea foi le mamalu o le Palemene i ona tulaga faalupea, le afio i le alii Palemia, le Kapeneta ma le mamalu tele o le Palemene. Ou te manatu lava o lo o nonofo tapuai le atunuu aua le tou alofaiva, ina ia to se tali ma faataunuu moomooga e lafo atu pea e aliali pea i taulaga-osi o lo o faapea ai ona e tauaveina ai le Nofoa i lea aso ma lea aso e lau Afioga i le Fofoga o le Fono.

E lelei ona ou faafetai atu i lou itumalo ao faafogafoga mai nisi o lou itumalo o Gagaifomauga Nu.2. Faafetai atu i le paia o Sa Afa ma Sa Peseta ma Samauga le paia i lo la toalia i le toafia o tulafale ma Taulauniu, le paia ia Safune. Ia tapuai maia. Ou te matua momoli atu lau faafetai ona o le avanoa o lenei nofoa ua ou tauaveina mo lenei foi tolu tausaga. O le a le tomai, ia tatou tuufaatasi i le Atua e fesoasoani mai, o Ia lava na te foai mai manatu lelei e ono ou fesoasoani ai i le atiina ae o le tatou atunuu.

E lelei ona ou faafetai atu i le Tala o le Tupe ua tuuina mai nei i totonu o le Palemene. E tele nisi o itu taua ou te manatu e ono tatau ona fai i ai se fautuaga e faapea - Le malo e, pe a ou vaai atu faale-mafaufau i le mea ua tulai mai i le atunuu i lenei taimi, e lagona lava le faanoanoa i nisi o faiga-Malo ua mavae atu. Ao le fesii tali gata, afai o le a tuu atu ai pea faapea, o ai la e tali mai i le tiga ma le oi o le atunuu? O lea la ua ou manatu ai, e fai sina fautuaga puupuu e faapea.

I le Ofisa o Faatoaga i le vaai faale-mafaufau i le mea ua tulai mai ai nei, ua matauina, o nisi o alaga-tupe ua soona faaoga le tatau i le tulaga o lo o aumai ai le soosoo-tauau a le Malo ma fesoasoani mai fafo. Atonu ua ou manatunatu nei e ono moni le faitau a se tasi o tama, o le sa tu i le foe i nai tausaga ua mavae, pe a ou taua foi lea itu le Afioga i le Aloalii, sa ia saunoa ai i le atunuu aoao ma ia taua ai se fuitau faapea, e le o manaomia e le Malo o Samoa i Sisifo ni fesoasoani e aumaia ai i tua ma ni manoa. Ua ou taua lea itu ona o le Ofisa lea o lo o mafuli atu i ai a tatou atiina ae, le Ofisa o Faatoaga. A ou manatu ma tilotilo atu i le Tala o le Tupe lea ua tuai mai nei, ou te manatu o se vaimea pe miliona ma ona tupu se vaega-tupe o le Malo o Samoa ua faaaluina i nisi o itu ia o lo o manaomia mai e fesoasoani ia mai fafo. Ona ou faapea ifo lea, pe ai se a ua faapea ai? E leaga ea pe a vavae maia lenei vaega-tupe ua faaagaaga e le Malo e tuuina atu i le mamalu o le atunuu, i le pule a alii ma faipule i autalavou o a Komiti o vaega eseese o le atunuu o lo o tau atiina ae le tamaoiga? Ua lava lelei lena e tuuina atu i ai e fesoasoani i ai, atiina ae ai le lumanai o le atunuu. Ou te le talitonu i lenei mea o le atiina ae e faatino mai i le tele o taavale, matagofie fale e nonofo ai alii mai fafo, totagi ai e le Malo nisi o vaega-tupe e le ono tatau ona totagiina e le Malo. O lea la ou te manatu ai sei silasila totoa i ai le Afioga i le alii Minisita o lo o faafeagai ma lea itu.

Ou te manatu lava o le vaega lea o le Ofisa o Faatoaga pe a o latou ia o lo o feagai ma le vaega lea o Faiga-Faiva. I se suesuega i ai i lea itu ua matauina ai ua leva ona tatau ona agai le atunuu i se isi o atiina ae e pei ona taua foi e se tasi o Sui lea, o lo o fai nei i le motu lea o Tutuila. Ina ua siligia le Matagaluega i se auala e faaono faigofie ai ona tuutuu ifo i lalo le taugata o le tulaga o lo o taatia mai ai le tau o lo outou fofoga taumafa e ala i 'a o lo o maua nei i le Maketi, o le tali mai, e mafai ona fai, pau lava le mea e le atoa se miliona o se tau o se tatou vaa fagota e i ai uma le faatotogaina mai i mea ua saunia faaona-po-nei. Pei o le mea lea o lo o i ai nei i Tutuila o lea sa taua e se tasi o Sui e masani ona solitulafono i lona fagotaina lea o le gataifale o lo tatou Malo ma faapena ona avatu ai i fafo atu ma le atunuu. Na fai i ai sailiga i lea itu, o le mea na maua i ai e matua ioe i ai le o lo o vaai lea itu o se mea ua tatau ma onomea ona faia se atiina ae faapea i totonu o le atunuu. Sa ou fesiligia le alii o lo o ona vaai lea itu pe o le a se manatu i le atiina ae o lo o taatia mai ai nei i vaa fagota, ma o le tali mai ua faale-o-alumia i le taimi nei talu ai ua fai si taugata, fai o

vaa fagota a o le faatotogaina foi. O lea la ou te fautuaina ai le Malo pe le o le taimi ea lenei e saili sa tatou vaa fagota mai fafo e i ai lona faatotogaina i itu taua ia. Aua o le tali mai a le o ona vaaia lea itu, e tasi lava le alu o le vaa lea e fagota, tutumu uma pusa-aisa ma mea uma ia na saunia i le fesoasoani lea na aumai i le Malo o Iapani lea o lo o taatia faale-fetaui i le maketi o ia. I luga o laulau i'a o le a faapena foi ona matua faatumulia lea lava tamaoiga o le fofoga taumafa o le atunuu.

O le Matagaluega o le Fale Meli. O suesuega itiiti i lea vaega na maua ai o le taimi lenei ua tatau ona silasila totoa le Malo i nisi o alo ma fanau a le atunuu e ono tatau ona latou sailia pe tuuina atu i atunuu mamao mo nisi e ono tatau ona latou soosoo-tauau i alii mai fafo o lo o galulue ai mo le taimi nei. Aua o le mea moni e leai se tasi o le atunuu o i ai iinei po o ona tauaveina ia itu i le taimi nei, talu ai e le o i ai le agavaa faapitoa e pei ona manaomia mai e ia lava vaega o le Fale Meli, po o ala ua faaaogaina i telesi po o telefoni i atunuu mamao ma nisi lava itu faapena pei ona i ai le atiina ae lea o lo o taatia mai ai i le Matagaluega o Fale Meli.

O le a ou oo mai i le vaega lea e taua o le 'Ministry of Transport' (Ofisa o Felauaiga). Atonu e le o toe po se lilo i le faafofoga mai a le atunuu ma le silasila mai a le Palemene i nisi o taimi e le o mamao atu sa fai ai se sailiga i Fiti a le mamalu foi o la outou Komiti i le vaega lea. O lena na iloa ai le tulaga faaletonu o lo o taatia mai ai nei i na vaega tele o le Malo, e iu ina tele se faamanuiaga e maua mai ai i le uafu. E tele lava vaega-tupe o lo o taatia mai ai nei i le taimi nei, e leai se mea o faia i ai. O lea la e fautuaina ai le Matagaluega sei matua silasila totoa i ai i lea itu. E le gata foi i lea, o le tasi foi lea vaega o lo o tauaveina le matagaluega lea a le Ofisa o le Tiute. E lelei foi ona sei silasila i matafaioi ae o lo o galulue e soosoo-tauau ma le matagaluega fou lea ua faatuina nei, ina ia faafaigofieina ai ona aumai le tamaoiga o le atunuu o lo o faapena ona taatia mai ai i lena vaega o le atunuu.

Ou te fia tautala laitiiti lava i le vaega lea o lo o taua so o e nisi o le CDV ma le CIF. Ou te matua lagolagoina lava le vaega o le Tulafono ona o itu ia. E pei a ou manatu i aso ua mavae ma le faiga sa faataatia mai ai galuega fai i lea itu, o le mea lea e igoa o le CDV e peiseai pe a ou fuaina i le fua lea, e le o atoatoa ona maua ia le tau atoatoa o le mea lea o lo o manaomia. Aua foi o lo o faapena ona auala mai ai nisi o mea le tonu ma le le sao o lo o tuuina mai i totonu o le atunuu. O se faataitaiga faapea e \$100,000 oloa ia o le a aumai nei, o le mea la talu ai e le o i ai se inisiua e tuuina i ai pe laitiiti foi le inisiua faapea o le a inisiua i le \$50,000, o le a faapena ona mulimuli i ai le Ofisa o le Tiute i lea itu. Ma ou te manatu la ua tatau ona tuu i ai ma le inisiua lea ua talafeagai ma le tau o le mea lava ia ina ia mafai ona maua atoatoa e le Matagaluega o le Tiute le tupe e ono tatau ona totogiina e le e ona ia oloa i le Malo.

E lagona le faanoanoa i le Matagaluega o le Falemai. Ou te manatu lava ua tatau nei ona silasila totoa le

Afioga a le Minisita o lo o feagai ma le Matagaluega lea ona ua aliali mai le tele naua o nisi o tulaga tofi e le o faatutumuina. O le matagaluega lea toetoe lava a leai se isi o ona tauaveina se tulaga maoti e oo mai i le taimi nei, ma atonu o lea ua maua foi e le mamalu o le Palemene se vaega-tupe tele ua tipi mai ai i tupe faaagaaga o le matagaluega i lenei tausaga talu ai ona o itu ia ua le o mafai ona faatutumuina. O le mea lea ua aliali mai, e le uma mea faaletonu e tutupu i lea matagaluega.

O le Matagaluega o Lafoga. Ou te manatu sei toe teuteu pe silasila totoa i ai le Afioga i le alii Minisita i lea itu. O le mea la ua molimauina e lou Sui ua tele tuusaunoaga ua tuuina atu i le mamalu o le aufai-faatoaga e auala lea i le leai o ni lafoga. Ae o le mea ua aliali mai ua leai se tuutiitia pe faaitiitia le taugata o lo outou fofoga taumafa e ala lea i mea o lo o faatau mai i totonu lava o le atunuu po o le maketi. Ae o i latou ia sa tatau ona galulue faatasi ma le atunuu o lo o fita-i-tuga foi i le atiina ae o nisi o matata eseese i le lotoifale o Apia nei po o e o lo o faafeagai ma galuega i le matata lava ua talafeagai lava ma lea tagata. Ae o le tuusaunoaga lea ua tuuina atu i le vaega lenei o le aufai-faatoaga sa ou manatu pe le o le taimi lenei sei toe teuteu ai le taimi lea ona ua aliali mai latou te le o galulue faatasi ma le Malo i le atiina ae o le atunuu.

Ou te fia tautala laitiiti lava i le 'tender system' (tauofoga). Ou te manatu ua tatau lava ona ou matua momoli atu le faafetai i le Afioga ia Le-Tagaloa le o lo o ona tauaveina ona tiute i lea itu pe a finagalo ai foi le Sui o lo o taua lona suafa ina ia malamalama gofie i le mamalu o le Palemene ma le atunuu o lo o faafogafoga mamao mai. O lou lava Sui ou te manatu ana galulue faatasi le atunuu ma le Malo po o le aufai-pisinisi foi ma le Malo ou te manatu o le a faafaigofieina lava ona faatinoina lea itu. Talu ai o le mea ua alalaga ai le atunuu ua taugofie le eleni, mamoe, patua-moa o mea ia o lo o taumamafa ai le mamalu o le atunuu i tua ma le lotoifale i Apia. O le manatu lea e i le toatele o le aufai-pisinisi pei lava o lo o manatu ina ia saga faateleina pea le tamaoiga e pei lava ona aumai ai i aso ua mavae, ao sologa lelei le Malo lenei, ao le taimi lenei ua faale-omanuia le Malo. O le mea la lea e tatau ai ona silasila totoa i ai lo tatou foi faiga-Malo i le taimi nei. Fai se tatou ai.

O sina fautuaga itiiti lava i le mamalu o le Malo. O le mea lea o lo o tulai mai ai i le taimi nei i lo matou motu i Salafai, e tusa ai ma nai sailiga ua uma ona fai i ai e lagona lava le faanoanoa. O lea foi la e ono tatau ai ona ou fautuaina le alii Minisita o lo o feagai ma lea itu. O le mea ua tupu mai o le fesoasoani lea na aumai i Ausetalia mo auala tele i le motu i Salafai i ni suesuega i ai ua faapea mai, pau lava le vaega o Savaii e ave i ai le fesoasoani lea mai Salega i Asau ona gata ai lea. A silasila i ai le mamalu o le Palemene i le tulaga o lo o taatia mai ai nei le Itu-o-Tane le itu lea ou te sau ai ma e lagona lava le faanoanoa pei na o i i le alatele lea e maua ai sina ta, ae tasi lava sina timu itiiti pupu. E le o atoatoa

le malamalama o le Ofisa o Galuega latou te faia ai lea galuega. Na ou siligia foi nisi o lo o tauaveina lea matata o le tali mai a fua i le lautele ma le umi o le oga-ala i le vaega o le Itu-o-Tane, e fai lava si taugofie. A vaai foi la faale-mafaufau i le alu agai i le Itu-Salega e laitiiti lava si oga-ala a e fai si taugata. O le mea la lea ua tulai mai nei pei ua i ai se manatu ua faaituau foi ona fai o lea mea, pei ua le sao ona fai ina ua siligia le alii lea o lo o ona tauaveina le matagaluega.

Faafetai atu lava i le faauilavea foi a le alii sa avea ma Minisita o le Matagaluega lea i aso ua mavae. Peitai o lea ou te tautala agai i le tulaga i le suesuega na faia agai i le matagaluega i le taimi nei i le alii Inisinia lea o lo o ua see ane nei i le Nofoa pei o lea ua Pule-Lua. O le tali mai a le alii, a ou fia talitonu e sili ona ou vaavaai atu i ona seevae, tulou foi le Maota. O le alii lea o lo o Pule-Lua i le PWD o le alii mai Holani. O le tali na aumai, o le fesoasoani e gata i Asau. Masalo alii sa tauaveina nofoa o ia itumalo i ia fatia ua alu ma faiga-Malo ua mavae, masalo ai sa i ai se agaga faapea ua lava latou i le la itu o Savaii, ae matamata pea matou i le palapala tulou le mamalu o le Maota. Atonu e lelei lenei ua tau timu mai a e ou te tau atu i mugala e le mafai ona e silasila i le pefu o le mea o lo o i ai. O le ala foi la e talosagaina ai le mamalu o le Malo sei alolofa ia, sei taumafai atu se vaega itiiti o lenei lava itumalo po o le Itu o Tane o lo o aofia ai foi nisi o le mamalu o Sui. O le mea o lo o faamaonia ai, e le o saunia ia ia alii mo le fuafuaga i le la itu a outou malaga atu i Savaii ona outou silasila lea i Maliolio na fau nei e le PWD le ogasima, sau le tafe o la ua tu i le ogamanava o le vai ia sima. O i e aliali mai ai e lei saunia le vaega lea o le Malo latou te tauaveina ai galuega tetele faapea. O le tali mai foi a le palagi lea i la ma talanoaga, fai mai, malie na ola atu sima o le auala laupapa o le a fai ae tali mai le kamupani ua leai se sima ua uma, ona faapena ai lava lea e oo mai nei o le tali o la e tau saili se isi mea e maua mai ai ni nai uamea itiiti e ono fausia ai le auala laupapa lea i Maliolio.

Lau Afioga Tofilau le ua tulai mai nei i le foe o le Palemia o lo tatou Malo o Samoa i Sisifo, o si au faamatalaga laitiiti e ono aoga i lenei taimi ma le agai i luma. Maumau pe ana alaala mai i i Tupuola sei fai i ai nai au fuaitau itiiti lava ia. Ui o lea, tau ia ina ia taua le va ua ou taua lea itu aua e ono tatau ona silasila totoa i ai le Malo i le taimi nei ma le lumanai. O mea ia e igoa o faatosina ona o faiga-palota, po o faatosina ona o le fia maua o le paoa, faatosina ona o le fia maua o le pule. Ou te manatu ua oo mai le taimi e tatau ai ona toe silasila totoa le Malo i Tulafono o lo o faataoto mai ai le tulaga o faatosina. A ou manatunatu i le taimi ua mavae ma le faataatia maia o lenei lava mea o se mea e toetoe lava a liliu ai le atunuu, tulou o le upu e to ia te au, talu ai o le naunau i itu vaivai lava ia ua ou taua nei. O lea la ou te manatu ai, sei toe silasila totoa i ai le Malo i Tulafono Faatonutonu o nei lava mea o Faatosina. Aua o mea lava nei o faatosina i lau tau o le mea mai fafo ae le ono ma tatau i la tatou agaifanua ma le faa-Samoa aua o lo o i ai lava faiga masani a le atunuu e fai ai. Peitai

ou te manatu e tatau lava ona toe silasila totoa i ai le atunuu i le taimi nei, aua o le mea moni o le mea lava ua uma ona tupu.

Faafetai atu lava i ou uso le Afioga ia Leaupepetele na fatuina le lafo ma Tea na faaluaina. O le agaga moni e faapena lava ona fai ona o lou manatu tele i le mamalu o le Palemene ae o le a ou tau atua i se taimi mulimuli le mafuaaga e fia faaauau ai nisi o manatu i nai ou Sui lava ia.

E ui o lea, sei ou toe liliu mai lava i nai vaega itiiti ia e totoe. O le mea lea sa ou manatu ai, maumau lava pe ana o alaala mai le Tofa ia Tupuola sei fai ma pine faavae i itu ia. O le mea e faamaonia ai ona o itu nei, o mea na tutupu mai taimi o faiga-palota. Pe a o manatua e se tasi se isi o tatou uso sa tulai i le Palemene le Afioga lea ia Mapuilesua, e lelei le taua pea aua e faamaoni ma faamaonia ai au upu ia e tau fai atu. O le ala foi lea o lou tetee i le itu lea o mea tau faatosina. O upu na saunoa ai le alii lea i lou lava Sui e faapea mai “Sifuiva sau i le vaega lenei a matou”. Sa ou fai atu, po o le a le vaega? Le vaega a Tupuola. “Sa ou fai atu, o le a le mea ou te alu atu ai? “Sau ina e Minisita,” ‘Minisita i fea? Minisita i le Tiute. Sa ou fesili atu, oi ua i ai se Minisita i le Fale-Tiute latou?

Faafetai lava, e faigofie lava. Sa ou manatu lava e tatau ona tuu mai se isi avanoa pe tasi pe lua ni nai minute. A e ui o lea atonu o le mea lava o lo o fia taua ma ou te manatu e faatauaina lava i le agai i luma i lou lava Sui. Atonu foi e aoga foi i nisi o le mamalu o le Palemene mea nei o le fia tau ma sui. Atonu o lo o alaala mai i le Maota lenei se tasi o tama o le atunuu o se tagata ua matua, ae ina ua ma feiloai ma ma talanoa i itu taua ia, saunoa le Taitai o le faiga-Malo, leai matou te mulimuli lava i le mea tonu o lo o i ai a outou faiga-Malo. Ae peitai ua ese le mea na tulai mai mulimuli ina ua ma feutagai foi i nisi o mea le taua tele i le aumai i totonu o le Palemene. Ae ui o lea tau ia o se mea e iloga ai, o upu na saunoa mai ai se tama lea ia te au, malie Sifuiva, ai lava o lou manatu o au ou te faavalevalea o le a ala ai ona e tusi ma faapena. Ou te faamalulu atu, faamolemole le mamalu o le Palemene ia te outou tama matutua po o e foi ua lautogia i tofi faapea, sei silasila totoa i le uiga o le aumaia o nei ituaiga faaiuga, e le aveesea lava ma lau faila ou te tilotilo lava i ai aua ou te le iloa pe faavavau lou tofi i lenei tulaga ou te tu atu ai, ae fai lava ma mea e silasila i ai le mamalu o lenei itumalo e autovaa mai i lenei nofoa.

Ona faapea lea o au upu e momoli atu lau faafetai tele i le Fofoga o le Fono ona o le avanoa taua ua e tuuina mai mo au ou te avatua ai le vaega o lenei Fonotaga i lenei aso ae ona ua uma foi ma lou taimi.

E momoli atu lava le faafetai tele i lau Afioga i le faatautaia o la tatou Palemene i ona tulaga uma. E faamalulu atu ai i le mamalu o le atunuu a i ai se upu ua sala, ia malu ave i fale e potu lava le tautai ae sese le atu. O nai au upu ia e fesoasoani mai le Atua i lenei aso ma le tatou fonotaga, ia manuteleina lau Afioga le Fofoga o

le Fono faapea foi le mamalu tele o le Palemene i ona tulaga faalupea. Soifua.

Afioga TEA PEATO



Itumalo Faaalaalafaga:

Faasaleleaga Nu.3

Filifilia:

11 Mati 1982

Faatauto:

13 Aperila 1982

Lauga Faataupou:

1 Mati 1983

E muamua ona ou faatulou i le paia o le Nofoa, lau Afioga i le Fofoga Fetalai faapea foi lau Afioga a le alii Palemia aemaise Sui mamalu o le Palemene. Ou te faapai atu foi ma faatulou i le tapuaiga a Samoa i ona tulaga faalupea, i le paia tele i Aiga ma a latou Tama, Tama ma o latou Aiga, le paia lava i Tapaau ma Tootoo ia Tumua ma Pule, Ituau ma Alataua, Aiga i le Tai ma le Vaa o Fonoti. Ou te faatulou foi i le tapuaiga a le afaigaluega paia a le Atua i soo se Ekalesia i totonu o Samoa.

Lau Afioga a le Fofoga Fetalai, ae ou te lei malaga mai i le Fono lenei sa fautuaina au e se tasi o tama matua o lou itumalo. “Tea, ae lauga i le Palemene, tautuana ma oe ia e tautala faatatau i le taimi”. Sa ou fesili po o le a le uiga o lea fautuaga, ae sa ia faapea mai - “Ae lauga, ia fuafua au upu e te tautala ai i le matua ua i ai. Aua nei e lauga faa-toeaina, leaga o la e faafofoga Samoa, e mau e matau, mau ē e faalele. Ina nei e soona tautala i upu maotua a le aganuu, ao le atunuu lenei o le atunuu tofi, e i ai lauga i taimi e tatau ai. O le ala lea lau Afioga a le Fofoga Fetalai, e taua foi ia te au lea fautuaga, o le a tautala i upu gofie, upu tuusao.

Ia lau Afioga a le Fofoga Fetalai, o le Tala o le Tupe ua folasia nei i luga o le Laulau-a-Fono, e faatusaina nei e lou lava Sui o se afa-fulifao ua taia ai Samoa ma lona Malo. Ua ala ona ou faatusa i se matagi agi malosi lenei Tala Faatatau o le Tupe ona ua talitonu lou Sui e matua malosi ma mamafa-tu mo le mamalu o le atunuu lautele.

Sa saunoa se isi Sui i le aso ua mavae, sa faapea mai - Paga le gasegase o Samia, ua leva ona sue se fomai. Tulai mai lea Fomai, tulai mai lea fomai o lea la ua tulai mai o se fomai poto faapitoa, ua taumafai nei e togafiti se gasegase ua oo nei ina ui, po o le a oo ina uma. Ona aumai ai lea o se vai e ui ina oona, ae atonu o le vai lea e manuia ai le gasegase. Ae i lou lava talitonuga lau Afioga a le Fofoga Fetalai faapea le mamalu o le Maota, atonu o le vai lea o le a malolo ai le gasegase ae o le a oo ina maluu ai le vai, ona ua oona tele. Ae atonu o le gasegase e ono togafitia i le “aspro” po o le “asprin” i se mea faigofie faapena, ao lenei ua tuu mai lenei vai oona, talofa i le gasegase.

Lau Afioga i le Fofoga Fetalai, o le faafesili ua tulai mai i lou mafaufau e uiga i le Tala o le Tupe lenei, ua ala ona tele nua nei faafesili lau Afioga, ona o lo o teu mau

i lou mafaufau ma lou loto ia saunoaga ma fetalaiga a le Maota lenei, i fatia ua sola ma paeaiga ua mavae atu. Sa saunoa malosi Sui mamalu ua pale mai nei i tofi o le Malo, talofa i le atunuu ua oi ma pologa. Na faatu atu e le Malo ua mavae tiute ma tulafono o tiute, o le lauga tete lava ia a Sui mamalu; ou te talitonu o lo o molimau mai le atunuu atoa ma Sui mamalu o lenei Maota. Sa matua tete malosi ma faapea mai, talofa, a fia maua ni tupe a le Malo, ona pau lava lea o le mea ua mao fetuunaiga e le Malo o le sii o tiute. E a pe a saili se isi auala ua mamafa tele le avega a le atunuu? O le faafesili la lau Afioga a le Fofoga Fetalai, ua fai mai nei le saunoaga a le alii Palemia i le Tala o le Tupe, o le tasi lenei vaifofo sa tatau ona uia i faiga-Malo ua tuanai, o tiute e sii i luga. Ae ai se a na le saunoa ai e sii tiute? O le tasi lea faiga-faavae sa tatau ona fai, ae leai sa le faapea ona fai. Ae tulai mai nei, o le a le mea ua fai? O lena e silafia e lau Afioga faapea le mamalu o le Maota, e maoae le sii ole tiute ua i ai nei, sii le tiute o oloa e gaosia i totonu o le atunuu, sikaleti ma pia; sii le tiute o oloa e faaulufale mai i totonu o le atunuu; sii le tiute faaopoopo po o le ‘primage duty’ mai le 4% i le 8%, tiute i luga o le CIF ae le o le CDV e pei ona sa masani mai ai. Ae ai se a na le fautua ai faapea i faiga-Malo? Ai se a na tete ai? O faailoga fesili ia lau afioga.

O leisi itu o totogi o tagata faigaluega. E talitonu lou Sui lau Afioga a le Fofoga Fetalai, na mafua le tete faaumiumi a le afaigaluega a le Malo i le tausaga ua mavae ona o saunoaga ma fetalaiga a le Maota lenei. Talofa i le afaigaluega, talofa i la latou tautua matavela. E le alofa Tupuola ma lana faiga-malo i le tautua matavela a le afaigaluega. Sa tatau ona sii totogi, a faapefea ona soifua tagata, faapefea ona ola fanau e faatauvaa totogi, e faapefea ona ola i nei tamai totogi? O le ala lea o le faamaoni o tagata faigaluega ona o le laiti o totogi ae ua alu ae i luga le tau o le soifuaga. O saunoaga ia ma fetalaiga i totonu o le Maota lenei. O le mea moni lena ou te tautino atu, ou te le alo i le mea sao. Fai mai lava le lauga a le Afioga le alii Palemia, e leai se sii o totogi, e lei i ai foi i le tausaga ua tuanai. Fai mai se tasi fuaitau a le Afioga a le alii Palemia, a sii totogi ua tele tupu ua umia e tagata; a tele tupe e umia e tagata ua tele le manao i oloa mai fafo, ua saga sii sii. Ua sui o le a ia faaupuga? Sa outou fai mai, “talofa i le mamalu o le atunuu”. Ua a nei? Ua leai ma se sii o se totogi o tagata faigaluega.

Faamalolo litaea o tagata faigaluega. Fai mai le Tulafono a 55 tausaga o le soifua o le tagata ua tatau ona faamalolo aua ua matua lona soifua, ua afua lana tautua. Ua faapea mai nisi saunoaga - “talofa e, a faamalolo, a faapefea ona ola, a faapefea fanau, faapefea noga-tupe la e tau totogi. Fai mai o le a le Tala o le Tupe? Ia vaea le 10% le tumau i le Ofisa o Galuega. Aisea na alofa ai ananafi ae ita nei? Ma e tele le faailoga fesili, pe ua mafua i se a ona ita, ae sa alolofa talu ai? Ua taunuu le upu i le pese a se tasi Ekalesia, “faateete i upu soona lafo aua e toe fai mai lava”. O lea la ua taunuu le upu ma le tala lea. Aisea na soona saunoa ai, ao lea ua toe

ulufale mai ma toe aumai i le Tala o le Tupe. Fai mai o faiga faavae sa tatau ona uia i faiga-Malo ua mavae, sa tatau ona uia. Ae sa le faapea ona fautuaina le faiga-Malo ua mavae, sa le faapea. Ua matua le malamalama lou Sui i le Tala lenei. Ma o le mea moni lau Afioga a le Fofoga Fetalai, ua mataala tele le Afioga a le alii Palemia ma le faiga-Malo ua tulai mai i fautuaga mai fafo, fautuaga o faalapotopotoga o mea tau tupe mai fafo, a ua galo la latou silasila i le atunuu. Ua manao fuainumera tupe ae galo le soifua ma le ola o le atunuu o le a faataunuu ai nei fuainumera.

Lau Afioga a le Fofoga Fetalai, na saunoa le Afioga a le alii Palemia "tatou osi taulaga". Oi, ia a tatou osi taulaga i le soifua ma le ola o le atunuu. Talofa, i le atunuu ua toe foi mai lava saunoaga ma fetalaiiga i aso ua mavae. Ua taunuu ai se tasi muagagana faa-tamaiti ma teneiti, faapea a le tama i le teine, "e ese lava oe na e ataata mai foi i le taeao ao lenei foi ua e atigu mai i le afiafi, na e alofa ananafi ao lea ua e ita mai".

Lau Afioga e faanoanoa lava lou Sui ma o le mea moni masalo na o au lava le Sui e nofonofu mau i lou itumalo ma faitau maeaea le Tala o le Tupe. Ona ou faapea lea pe ai se a na le suia ai se isi auala pe afai e i ai se tomai faapitoa, saili nisi auala ae faamama-avega atu i le atunuu. Aisea ua lulu faatasi mai ai le faapau o le aoga o le tupe, sii tiute, sii pili o tamaitai aoga, le siia tologi o tagata faigaluega, vaea tagata faigaluega, sii i luga tiute o oloa ma tului o noga-tupe. Ou te ofo i nei faiga! Talofa o ai e lava tauave?

Lau Afioga a le Fofoga Fetalai, e matau pea e lou Sui e tau lava le pua ma lafo i le faiga-Malo, i le tele o nisi o Sui na papale mai i le tofi o le Malo. Sa saunoa nisi Sui - "talofa i le luma o le atunuu ua aitalafu, a nei e faatau Samoa, toetiiti uma le tau o Samoa." Ou te le ioe i lenei manatu. E le mafai, e le mafai ona faatau le atunuu mamalu lenei o Samoa. E faapefea ona faatau? E le mafai ma e sese le faaupuga, sese ia molimau. O le mea moni lava, so o se atunuu o le lalolagi e taumafai e nono mai tupe e atiae ai le atunuu. E le o se luma ia te au le aitalafu, e taua ia te au e atiae ai le atunuu. O le luma ia te au lo tatou sagisagi ma tatou faapea atu - o lenei lava le atunuu na mua i malae i faiga-Malo a le Vasa Pasefika, na muai tutoatasi, ae omai o tatou tuaoi i le Vasa Pasefika, silasila mai i le atiina ae ua matua pau i lalo. O le mea la lena e tau o le luma ia te au. Silasila atu e pefu ala e na o le lio o Apia e i i le moli-uila. O la e tele faaputuga-tupe a le lalolagi, o le a le mea tatou te popole ai? Omai, omai, e i ai lava auala e foia ai, e togi togi malie; o le mea moni lena i lou talitonuga. Fai mai nisi molimau, talofa i o outou alo ma a tatou fanau, a nei a fai fai nei noga-tupe a faapefea? E eseese talitonuga lau Afioga. I lou lava talitonuga faa-Sui Usufono, afai o le a tatou nofonofu nei ma le taumafai tatou o taitai o le atunuu e atiae le atunuu lenei, e pologa outou alo ma ni a matou fanau i aso oi luma. O le a omai i latou e ave ma taitai i o latou foi taimi ma faapea ane, o le a ea mea na fai e o tatou tuua ua mavae? E leai se atiina ae o le atunuu, e leai se mea, talofa o le a tatou faapologa a

tatou fanau. Aua o le mea e taugofie nei e faaopopo le tau i le tausaga lea. O le poumoli na aumai nei i le \$10, e oo atu i le isi tausaga lea ua \$20. Silasila la i le avega o le a tauamo e o outou alo ma tatou fanau pe a le atiae tatou, e auma ona sasagi faapenei - Le atunuu manaia, le atunuu na mua-i-malae ae maualalo le atiina ae.

Sa saunoa nisi Sui o le luma le 'Sina'. O se luma o le atunuu le 'Sina' lea na faatau mai? Ia ia te au lava ia i lau Afioga ma le mamalu o le Palemene lenei, ua matua fiafia ma avatu lau faafetai i e sa latou taumafaia lenei atiina ae o le 'Sina', ae le o se luma ia te au. O le luma i lou Sui i le tulaga sa i ai lo tatou atunuu i aso ua mavae, afai e fia malaga i Niu Sila e momoe i le malae vaalele i Tutuila, e o atu i tamai vaalele tatali le DC10 o le Ea Ni Sila e malaga ai, aua foi a malaga a faapea mai o le malaga a le Ea Niu Sila o le 5 i le afiafi, e amata ona la'ula'ula atu i tatou nei i le 6 i le taeao, na o atu lea faasavili ai i Tafuna i le aso atoa. A fai mai le uaealesi mai Niu Sila ua tuu i tua le malaga i le 5 i le taeao, talofa ua alu ma le po e tofafa ma momoe faapio-lua i luga o nofoa le mamalu o le atunuu. Ou te faapea atu ai, soia, soia tou te tau le pua ma lafo. Soia le tatou faapea, "Tupuola ma lana faiga-Malo ua oi le atunuu, ua leaga." E leai, ua maoae foi le tulai mai o latou i le atiina ae o le atunuu. I lo matou itumalo i Savaii ana le tulai mai Tupuola e le taumamafa ini vai magalo o le upu e to ia te au, o le mea moni lea. Tulai mai Tupuola ua mumu moli, e moni o ana fuafuaga ua leva ona fai, ae faatoa faatu i taimi o Tupuola.

Faafetai i lau Afioga i le Fofoga o le Fono. Ma pei ua tau galo foi nisi manatu ona ua pei ua fevesiai le Afioga le alii Palemia ma le Tofa ia Tupuola ona o lau lauga. Ae faapea ona faamanino atu le uiga o lau faamatalaga na sei mavae atu i le taimi ua mavae. Sa i ai le paipa o Faasaleleaga sa afutoto ai foi lenei itu aemaise le itu lea o Amoa, ae lei oo atu lava se suavai i lo matou itu; sa gata le faamanuiaina i le itumalo lea o le Afioga a le alii Palemia. O le ala lea na ou taua ai, aua na maea ona umusa le paipa lea o Faasaleleaga, tuu mai i le puleaga a le Malo. Ua alu atu faafitafita le aoina o tologi o paipa vaeane le mamalu o lau Afioga ma le Maota, ae lei maua se suavai. O le mea moni lena, ou te le tautala i se mea faaoleole pe sese. O la e faafofoga mai lou itumalo, e faamaoni lau upu lea e fai atu. Tulai mai nei le Tofa ia Tupuola i le taitaiina o le Malo, fai le vai-pamu i gauta o lou itumalo, lea ua mafua ai ona ou fai atu.

O le mea lea ou te fai atu ai lau Afioga a le Fofoga Fetalai, ou te le faasea i le faiga-Malo ua mavae, ou te faafetai i lo latou tulai mai ma lo latou taumafai e atiae le atunuu lenei. E tele so latou sao, ma o la e tautala galuega, aua e moni lava le upu e leo-tetele galuega i lo upu. Ae ou te faufautua atu i le Afioga a le alii Palemia ma lana Kapeneta, soia tatou te ave le faasea ae tatou galulue pe afai ua outou tulai mai e fai sa outou sao i le atiina ae o le atunuu; ina nei uma ane le nofoaiga e leai; ona faapea lea - Oi, o lea e leai lava se mea sa faita foi o le a se mea o le a tulai mai.

Lau Afioga e tele ina ou fia tautala i le Tala lenei o le Tupe, ae pei ua ou manumanu i lou taimi aua ou te talitonu e le toe faatagaina sou taimi.

Lau Afioga a le Fofoga Fetalai, na o se fia faaopoopo atu foi e avatu ai se fautuaga e tusa o sau fesoasoani mai. Sa tatou talanoa i le taimi ua fano ao lei amataina la tatou felafolafoaiga ona o le agaga lea e pei lava ona taua, o le fia maua o le taimi ina ia lava le taimi e talanoaina ai ia manatu ma sa e saunoa o le a tuu atu lava ia te oe lea tulaga, ma o le a aumai le avanoa ia i matou nei e fou, ina ia faapea ona lava o matou taimi. Ua matau atu la i le taeao lenei ma felafolafoaiga, ua le o lea. O le mea la lea ua ou soso atu ai...

Faafetai i lau Afioga. E tele ni mataupu sa ou fia talanoa i ai lau Afioga e ma le mamalu o le Palemene ae peitai ane ua faatapulaa lou taimi. O lea o le a tau faaiuiu atu ai le manatu. O le 'tender system' (tauofoga) sa ou fia tautala foi i ai peitai ane, e pei ona ou taua ua puupuu lou taimi. Na ona ou faatalosaga atu faapea i le Taitaifono o le Komiti Faafoe o Tupe o lo o taulamua i le "tender system" (tauofoga) e le manuia lea faiga. E ao ona faamuta faamolemole. Ma ou te le talau atu faafitauli ma le anoanoai o faafitauli i lou itumalo talu ai na tulai mai o le 'tender system'.

O le isi tulaga o le Popo, lau Afioga a le Fofoga Fetalai. Ua tolu nei vaiaso talu ona faapau le aoga o la tatou tupe, ma ua ou manatu i lea lava taimi sa tatau ai foi ona maua le siitaga o le popo, aua o le mea moni e le po se lilo sa i ai popo sa maua mai e le Komiti Faafoe o Popo ia le tau ae le i faapauina le aoga o le Tālā. Ia o lenei lava e faapea, ai ua tali avatu se fuafuaga a le Malo po le Komiti Faatino o le Popo i la lea tulaga, ina ia faaosofia ai matou i tua e sali le popo aua le lava o a tatou oloa e auina atu i fafo mo a tatou tupe faaleoleo, po o tupe faaagaga. Ia o le aotetelega lau afioga ma ou manatu ou te matua tetee i le Tala o le Tupe. E le mafua lou tetee ona o ni faiga faavaega, leai. O au le isi Sui e matua musu i mea ia o faiga faavaega, ae ua mafua ona ou tetee ona o le aia a lou lava Sui, ua tulitulia mai ai au e lou itumalo e aveia lou leo ma o latou Sui i totonu o le Maota lenei. O le latou finagalo lea ua ou fai atu ai, aua e pei ona ou taua, o au o se Sui toatasi lava i Savaii e mafuta pea i lou itumalo i aso uma lava. Ma o le fautuaga lava a lou itumalo, ae alu i le Fono ia e tetee malosi. Ia lau Afioga ou te matua teena lenei Tala o le Tupe, e ui ina talitonu lou agaga ua pasia. Ia manuia le Fono.

Afioga TOEOLESULUSULU SIUEVA



Itumalo Faaalaalafaga:

Aana Alofi Nu.3

Filifilia:

11 Mati 1982

Faatauto:

13 Aperila 1982

Lauga Faataupou:

1 Mati 1983

Faafetai i lau Afioga i le Fofoga o le Fono mo le avanoa ua tuuina mai. E muamua ona ou viia le Atua ona ua Ia valaauina au e fai ma sui o lenei Itumalo o Aana Alofi Nu.3 ua mafua ai nei ona ou oaoa nei i Faleseu ma ou sao i Maomalie, malo le tofa faatamalii, malo le uta, faafetai alofa ia manuia la outou tapuaiga.

Lau Afioga i le Fofoga Fetalai, o se faaupuga ua saunoa i ai nisi o lenei Maota le tofiga o le Fofoga Fetalai ua faapea ai o le tofiga o le Aitu-o-le-Aoa, pau lava lenei o le moomooga i lau Afioga, ia faale-Atua lau faamasioaga, ia e alofa a ia tumau mausali e le maluelueina, o ou mama na.

Lau Afioga i le Fofoga Fetalai ma le mamalu o lenei Palemene afai ou te sao, o lona Valu lenei o Nofoaiga. Ma atonu e mafai ona tatou ioeina tasi lenei nofoaiga ua aupito sili ona vavao ai le atunuu. I le aso 18 o Mati 1976 lea na malo ai Tupuola Efi i le tofi Palemia, le palota lea na malolo ai le uso o lona tuua o Tamasese ile 31 palota i le 16, ma i lana uluai lauga sa ia faapea ai, "aua nei faitau lau Afioga Tamasese o lenei palota e faamaonia ai ua fultua Samoa i Tama-a-Aiga, po ua faatuaunai le mea uliuli i ona fofoga," ae faaupu ia i se faaupuga faigofie, ua saili e Samoa se fofo mo ana faafitauli, ma o le tofa lenei e tausi ai Samoa e le tofa lima-tusitusi, e le tofa saua, e le tofa tau faaleaga po o se tofa tau faifai. Leai o le tofa e faamagalalo, o le tofa e alofa, e faamaoni. Aua nei maumau lo tatou malosi i lo tatou fetuituiai ma lo tatou faatauailoto, ao lea e tuu mai faafitauli e anoanoai ma le fita, e ao ona agai i ai lo tatou malosi.

I le tulaimai o lenei paeaiga, e molimau e le Atua, faamasino le atunuu, le ituaiga tofa la lenei ua 6 tausaga talu aona pulea le Malo ma le atunuu atoa, le tofa e faamagalalo, o le taofa e alofa, o le tofa e faamaoni.

Afai ou te taua faafitauli ia ma atugaluga, leai ou te ulufale mai i le Maota lenei o Samoa, leai o lea e mailaila le itno lenei vae atu le Maota lenei le Palemene. Ioe, e tele mailaila ma ua pele gasegase ao mea e mailaila e faamanatu mai pea. O le mea moni lava e 12 tausaga o tautua afutoto i le Malo, o fea o i ai? Tuli i le ala, ave i le Faamasinoga o ai e sao, e le tofa faamagalalo, o fea le tofa alofa ma le faamaoni? O fea le tofa e le lima-tusitusi, e le saua, e le tau faaleaga, e le tau faifai? Lau Afioga e pei lava ona ou fai atu e faamaonia mai i molimau a le atunuu ia tatou nofoaiga, e amata mai lava ona vevesi tufa solo mamoe, faatau i tupe, o ava malolosi o mea uma, e silafia e le Atua. ua a nei? Tulai

mai le Afioga i le Aloalii, o fea ua fai i ai, fea le tofa alofa? Fea le tofa faamagalo? O fea le tofa saua? La ua faataatia i le ala. Ua a nei? Tulai mai le Tootoalii. Fea o i ai? E oo mai nei lava ananafi lau Afioga i le Maota lenei, fea la o i ai le tofa, le tofa lima-tusitusi, le tofa e le saua, le tofa e le taufaaleaga? Oi a faatau-matatao o lea e tapuai le atunuu e saili se manuia mo alo ma fanau. O lea ou te fautua atu ai i lau Afioga i le Palemia Tofilau, e tele faafitauli lenei ua tatou fetai. Ae afai tatou te au ma le Atua, e leai se isi e faasaga tau mai. O faafitauli nei ua ou taua i le tatou faiga-palota, omai tama papalagi mai o, fai mai o le oo, o le faatosina, faatau le atunuu. O ai latou e faamasino i le mamalu ma le paia o le atunuu lenei? E tataua ona ave i ai lau faamuamua, lau Afioga i le Palemia.

O le aoatelega o ou manatu. O le uiga o le saunoaga a lau Afioga i le Minisita o Tupe po o lau Afioga i le Palemia, e tusa o le Tala o le Tupe, ua ou tomanatu atu ai i le uluai saunoaga a se tasi o taitai iloga o Peretania ina ua vatau Peretania ma Siamani ua tapa e Peretania se toa e tulai mai ina ia mafai ona tetee atu le malosi faa-Hitila lea ua tulai mai, sa ia faapea atu ai, "Peretania e, e leai se mea ou te ofoina atu vagana lenei, o le afutoto o loimata maligi ma tatou galulue punouai, Peretania atoa, faalagolago i le Atua." O lea laa la na ala ai ma o i na toe foi ai le puleaga malosi o Hitila. Ina ua e tulai mai i le tofi Palemia, lau Afioga a le Palemia ua avatu lau faatuatua i lau afioga, ma e pei ona ou fai atu tatou te le mailoa ao lou tulai mai o le aso lava foi lea na tulaueleele ai le DC9 i totonu o le atunuu lenei. O au le isi DC9 na taunuu muamua i Samoa i le 1942 lea na sua ai eleele o le nuu lenei faatasina i ala e pei o le fanauga a Isaraelu, la lea la ua ou fai atu sua po o le a le tulaga-Maota tatou te oo i ai ia mausali le faavae pei o le fale o le NPF, sua i lalo. O le a le taavale tino lelei mai faataape le afi ae toe faapipii. O le Tala o le Tupe lea ua tuuina mai, o le a le isi mea e fai? Ua gau le Malo, e leai lava s isi fofo, ia o le a faatautala faatautala le popoi le soona fai, oleole tupulaga o el a le isi mea a fai? E ui ina fologata ao le taimi lenei e taumafai ai.

Faafetai lava i lau Afioga i le Fofoga Fetalai, ia ou mama na, lau Afioga i le alii Palemia i la outou paeiga.

O le tulaga i le Tala o le Tupe. Lau Afioga i le Fofoga Fetalai o Samoa e pei foi o le tele o isi atunuu i le Vasa Pasefika, o meaalofo lava latou a Samoa na tuuina mai e le Atua, muamua, o lona laueleele lafulemu e afua mai i mauga-mu, o lona tau mafanafana, o le tele o le timuga e pau i le tausaga, o le maoae o le itjla e susulu ai le la. O le tulaga o lo o tulai mai ai nei o tatou laueleele e 80% o le faitau aofai o eka o eleele faale-aganuu. E 11% o a tatou eleele pe a tuu aofai o lo o umai e le Malo o Samoa i Sisifo, e 4% o le Esetete Tausi, 4% o lo o umia tumaoti.

O le isi a tatou meaalofo mai le Atua o el tatou gataifale e tumu i figota. Ao lea foi ua uma ona faatulafono o le 200 maila agai i tai e lio ai. O lea e tumu ma o lea o lo o omai i ai vaa-fagota foi nei e pei o le Tifa o le Moana mai o Tuituila ma lau atu le tamaoaiga o Samoa tuuapa ona ave lea i Amerika a o lea e tau seu ni a tatou ia.

O lona lua o tagata soifua o le atunuu lenei o lo outu paia ma lo outou mamalu e 157,000 tagata soifua o Samoa. E le o au maua e isi atu nuu lau afioga e te tagai mai nei i le lalelei, malolosi, tino lelei o le tausiga a le Atua ma o mea totino ia na foai mai e le Atua, Ae tagai i malaga o lo o e feafioai ai Initia, lava latou ia e le o se upu paole, pe tau faatevateva. E le pei o le mamalu o le atunuu o lo o sasao atu nei ma le lautele. O le tamaoaiga a le Atua aua o mea totino ua foai mai ma o le tulaga o lo o i ai i faamaumauga i le tasi tausaga i le 14 tausaga e 50% o le tatou faitau aofai lea e i ai i i le vaega lea. O le vaega la lea o lo o sue aoga nei, ma ou te molimau atu lau Afioga i le Fofoga Fetalai ae tagai i tupulaga ua oo i ai le taulaga i Apia i le 12 i le po ua leai se eseese ma Amerika, ua leai se eseese ma nuu ia o lo o tulai mai nei faafitauli le vaega lea le 50% lea o le atunuu o lo o i ai e leai se aoga leai se galuega. E le o iloa faasevasevaloina ma ou te fai atu a le mafai ona foia e se faiga-Malo le faafitauli lea, tuu i ai se isi 5 tausaga ona e tagai lea lau Afioga i le Fofoga Fetalai.

O le vaega malosi o le atunuu 15 tausaga i le 44 tausaga, 41% le malosi la lea. Loe malosi la lea e le o mafai ona faamanuiaina atoa ai foi ma le tatou laufanua o lea o lo o moomoo ai nei tagata turisi e omai, le laulelei o laufanua, mafanafana le tau, fiafia tagata soifua o le atunuu. O lau fesili la, e lei i ai se faiga-Malo ua mafai ona faafesootai maealofo nei a le Atua, le 81% ia o eleele e le o faatoaina, le 41% ia o le au-malolosi e le o maua ni galuega, le tatou gataifale lea e taatiatia mai.

O eleni ia na aumai nei i le atunuu lau Afioga i le Fofoga Fetalai, e maoae a o le mea lea ua molimauina, e le o tulaga manuia i'a ia e faa-eleni. O lea e aupito sili ona tua le asi asi ma le atu. Ua molimauina foi le tau pe a tuu-apaina ia i'a, e lua tala i le apa. O lea la ou te fautua atu ai lau Afioga i le Fofoga Fetalai, le nofoaiga lea ua pae mai nei, fai se faiga, fai se faiga e fesootai ai. E 81% lea o le eleele o le atunuu o lo o umia e le atunuu, e 41% e le o maua ni galuega, le gataifale lea ma le laueleele. E i ai le atugaluga i lau Afioga i le Fofoga Fetalai i le VAega e 102 o le faavae ua taofiofi ai le faamatuu mai i o o tatou eleele. Lau Afioga i le Palemia ma le tou nofoaiga, ia o lea ua outou silafia, e le mafai ona alu i luma le atiina ae o le atunuu lenei vagana ua saili mai se faiga e mafai ai ona faamalieina vaega ia e fa.

O le a ou see atu la i le pili o aoga ia e vavao ai nei le Maota vae ane lau Afioga a le Fofoga Fetalai. I le Tala Faatatau o le Tupe lea i lona itulau e 25 o lea o lo o i ai vaega-tupe nei ma e 4 aoga nei o le a ou taua atu, o le 'Demonstration School o le Apia Infants', o le 'Apia Primary ma Leifiifi'. O aoga nei o lea ua tuuina atu i ai e le Malo le kuata miliona e faatupe ai ma isi mea totino e faagaioi ai. Ao le fesili, a faapefea la le aoga a Satapuala? Faapefea le aoga a Fasitootai? E leai se mea. O pili nei e maua mai i le siiga lea ua i ai nei ona pau nei o aoga o lea e aafia i le siiga o pili ia. O

Vaipouli, o Avele, o Kolisi o Samoa ia ma aoga la ia a le au-mauoa ia e i Apia lea ua tuu atu i ai e le Malo le kuata miliona e fai ai. E le gata i le le fai faleaoga ae teu fua e le Malo le kuata milliona. o pili ia e maua mai nein a o le \$60,000.

Lau Afioga i le Fofoga Fetalai ma le mamalu o le Palemene, ou te le manao ou te toe vaايا le vaega-tupe lenei i le tausaga lea, vagana ua see mai le kuata miliona lea e faatupe ai aoga a le atunuu atoa. Ma o le mea moni lava lena e tatau ona fai i ai. Aa faatupe mea aoga a tamaiti ia e totogi pili ai nei, ona tatau oo loa lea i le mea lea ua tatau i ai nei ina ia aoga fua le atunuu. Aua o le au-maumea uma a le atunuu o lea e aoga i i le 'Demonstration School', Apia Infants, Primary School ma Leifiifi. O le siitaga foi lea e i ai nei ia 4 i le 5, 5 i le 6. O le matou nuu ia e \$10 le pili lea e totogi a faapefea nei tagata? O lea e fai fua e le Malo faiaoga, fai fua faleaoga, totogi le lotoa, fai uma mea uma. E faapefea le lautele o le atunuu? Pen a o se vaega a faa-pasene, masalo pen a o le .9% o le atunuu lea le vaega lea o lo o taumafaina le afutoto o le atunuu, ma e fautua atu ai e le toe tatau ona taatia mai i le Tala o le Tupe i le tausaga fou, faasafua mo le atunuu atoa le kuata miliona lea sei aoga fua le atunuu.

O le tulaga i le lafoga o le malae vaalele - I se tusitusiga sa tuuina mai e le Vaega o lo o faafoeina tagata tafafao sa faia se latou sailiiliga i le tausaga e 1979, o le faitau aofai o tagata sa tulai mai i totonu o le atunuu lenei e 27,000. Ae fai mai le latou faitau o tupe uma sa faaalu i totonu o le atunuu i tagata tafafao nei e 1% sa maua e le Malo, e 99% o lo o matuu atu, a le o faletalimalo, le au-vaega foi lenei e o e tafafao. E 99% le au-vaega foi lenei o lo o faamanuiaina i mea ia, a o le Malo e 1%. A tatau fuafua i tupe o lo o faaalu ai i le atinaeina o tagata tafafao mai, i le malae vaalele lava o lo o vavao ai nei ma o lea foi e tau saili i fafo ni tupe, o le fesili la o fea e aumai ai? a faa-pasene le siitaga lea ua i ai nei, o lea e pei ua faapea 14% le Malo ae 86 le au-maumea ia, ou te talitonu lava au o lena e talia. Pau lau fautuaga i lau Afioga i le Palemia ma lau Afioga i le Fofoga Fetalai, e toatele vaa ia o lo o taunuu mai i le uafu, e leai se lafoga. O lea foi ou te iloa sa fautua foi e lau Komisi ina ua saili se tupe e totogi ai le aufaigaluega e oo mai i le taimi lenei e lei faatinoina, faapea foi ma le mamalu o le atunuu o lo o femalagaai i Tutuila ma Apia. Ona pau lea ole tupe lenei e pei o le lafoga e fuafua lea i mea o lo o faamalieina ai le mamalu o le atunuu e femalagaai. A fua i le 20 i le uafu ia lea e te tagai i ai e leai se fale e tua i ai le au-maimoa pe a taunuu mai. A fua atu foi i le mamalu o le atunuu o loo feoai i le va o Tutuila ma Apia ia e satia i le po atoa e leai se fale. O lea la na ona fautua atu ua tatau ona muai saili e le Malo e faalelei mea ia ona fai loa lea i ai o se fuafuaga.

Lau Afioga i le Fofoga Fetalai ma le mamalu o le Palemene o le tulaga lea i le mea o lo vavae ai nei i le CIF ma le 'primage duty', o le EPC ma isi ituaiga lafoga. Pei lava ona ou fai atu, e leai se mea e alofaga i ai le Malo. O le a le mea a tua i ai? Afai e folo-gata le

fualaa ona apu lava lea o le fofo a tatou lisiina le vaa, ia o lona uiga foi o le a le manuia le atunuu. Ma o le tolotolo i tua, o le a atili ai ona faulai i luga le faaletonu e tatau ona faia. Pau lava le fautuaga i lau Afioga i le Fofoga Fetalai ma le mamalu o le Malo, o le tulaga o lo o i ai le sailiga-tupe a le atunuu i le taimi lenei, o lo o aliali mai ai e mafulu atu tele le Malo i le tulaga lea o tiute. I le Tala o le Tupe i le tausaga nei, o lo o faapea ai o lo o saili mai i le tiute le 49% o le tupe maua. O le isi Ofisa e sosoo atu i ai o le Ofisa lea o Lafoga, na o le 23%, o lau fautuaga ua tatau nei ona amata le Malo e faaseese atu Tuu uma le tiute, see i le mauoa lea e i i lafoga ia. Ou te talitonu foi, tasi ia fautuaga na tuuina mai i le tatau Malo. O le lape ia ua utiuti le tiami e tapena ai a e ou te talitonu foi o le finagalo foi lea o lau Afioga ma lau nofoaiga. A faamatuu mai tiute faapau i lalo, ae see atu i i toe tapena lafoga a kamupani, ina ia mafai aona tua i ai le Malo aua o latou tonu ia o lo o matuu atu foi i ai faamanuiaga a le atunuu. E pei o le kamupani foi lea o lo o tuu-faasaunoaina i ai e le gata i lafoga ae faapena foi i le totogiina o tiute. I le 1982 e 16 kamupani na pasia e le Malo ma o le tupe o le tiute sa faamatuu atu i ai e 5 miliona. Mai le 16 o kamupani na, e 5 kamupani na tuu atu i ai le 5 tausaga e le totogia se lafoga, e 1 le kamupani e 3 tausaga e le lafoa se lafoga. O le 16 foi o na kamupani sa tuuina atu i ai ma taavale e 17 i le 20% le tiute. Le vaga la lea ou te fai atu ai nei ina ia mafai ona see mai le tiute ae tuu atu i le vaega lea. O se tupe maoae e \$5M ae afai tatou te sailiili foi i ai ia lea ou te fautua atu ai i lau afioga ua tatau nei ona tofia se Komiti sa sailiili po o le a le faatinoina ma le faaogaina ma le aoga moni i le atunuu o lea mea. Pau le aano ina ia maua tagata faigaluega. E pei o le pia, sikaleti lea ua mafatia ai nei le atunuu, lea ua le maua pei o el afitusi lea e tusi atu e uma lava le afitusi e lei ola, ao le taugata ia. O mea uma faapena, e le o faamalieina le agaga na ala ai ona tuu atu. a o le aufaigaluega o le mamalu o le atunuu lea o lo o latou taina le vao ma sailia mai tupe maua mo le atunuu, ia e leai se mea. O la lea la e fautua atu ai i lau afioga, o ema ia e tatau ona tagai i ai lau afioga ma saili se fofo i se auala faanatinati lava.

Atonu ua tau lata mai lou taimi, ae i lau Afioga i le Fofoga Fetalai e le mafai lava ona ou tuua le avanoa e mafai ai ona ou laga le mataupu lenei ona tasi lenei mataupu na uunaiina ai au ina ia ou taumafai ia ou oo mai i le Maota lenei o Samoa ona o mafuaga ua fiu i saili ua toe o le lagi e tagi i ai i po ma ao o eleele o Satapuala ma Satuimalufilufi. O le aso 25 o Me 1942 sa faatasina ai i ala le itumalo lenei ma o le faaupuga, o lo o i ai o le manuia o le Malo o Samoa i Sisifo, o le puipuia o le saogalemu o tagata uma e i ai i lau Afioga a le Fofoga Fetalai ma le Afioga a le Palemia, o le nofoaiga a le Kapeneta, o el atunuu atoa. Ua lafoai mea totino a le nuu lenei, aisea? O le saogalemu o le atunuu. Mai le 1942 seia oo mai i le 1947, 6 tausaga faatasina pei o le fanauga a Isaraelu i le vao, leai se mea e tua i ai na o Satuimalufilufi la ua see i o i le taufusi. O la e i ai o eleele ae e lei maoti atu i le taimi lenei. O Satapuala,

tulai mai foi le Tofa ia Tupuola Efi fai le malae vaalele i le 1971 faalalo uma niu, o ulu o mea toto ae oleole i le \$5. Ua leva ona uma, faaalu ma le auala i tua ua leai se mea. O lea foi e oo nei o le fea mea e sili i lau Afioga i le Fofoga Fetalai ma le mamalu o le Palemene, o le malae vaalele po o le ola o tagata o lou itumalo? Ua uma ona avatu e ositaulaga mo le manuia ma le puipuia le atunuu. O le a le mea lea e tali mai ai? E leai se mea. O le 1959, ave le 242 eka i le Vaimauga, o le a le mea ua oo i ai? O lea e mauoa ai. O le a lema ua oo i ai Satapuala? Leai se mea, fiu i tagi mai ma o lea ou te fai atu ai ua aafia le soifuaga. E oo i tapuaiga o le aso Sa e oso loa le 'Sina' taofi tapuaiga o le pop au le 'Air Pacific', taofi tapuaiga, aisea? O le pologa lea e fai nei. O le mea moni lava o i ai se agaga o le Malo e tali mai ai le mea na ofoina atu mo le manuia o le atunuu atoa ua ta fiu ma o lea ou te fai atu ai e le o se upu faapaole.

O lea la sa ou taua ai le malae vaalele o lo o i ai le vavao e fai i le po e tin ii le 10.00 faaota tatala i le 6.00. O le mea foi lea ua mafaufau i ai le nuu lenei, ioe e le gata i le va o le laueleele ma le sami ma le ea. E pei foi ona silafia e alu afioga na tulai mai nei foi le paia ia Salepaia ma Galumalemana ma lea itu o le itumalo tau taofi, e sili ia ona o le matou feavatai ma le vaai i le Malo a o el mea moni o lea lava ua amata ona tuputupu ifo. Afai la e manatu le Malo e faaleleia, ia vave i le tausaga nei.

O le matagaluega sa ou faigaluega ai i Gataifale. Ou te fautuaina lau Afioga i le Palemia ina ia tofia se Komisi Suesue i le taimi lenei ina ia saili ai le mea moni o i ai. E tele matagaluega sa fai Komisi Suesue ma o le mea lea na tuli ai le Tofa a Lavea i le OFisa o Leoleo, pei o le mea lea na tuli atu ai le isi tamalii i le Falemai a o le matagaluega lenei e leai se isi. I lau faitau i ai o lea e i i, o le miti a le Afioga a le Minisita o Asi Eikeni na fai i le po, tulai aumai le pili lea e tusitusia ai i i, leai se mafuaga na alagata ai ona fai lenei mea. O lea e fememeai, pasia i le 1978, 13, 16 o Tesema faatoa saini ai le aao o le Ao o le Malo e pasia e 5 tausaga. O le a le mea na topelau ai, ia o lea la ua tulai mai. O ai e mautinoa e lelei lea mea o le a alu atu nei i ai. O le tala a le Matagaluega e 60 tagata e toe faafaigaluega ona mafai lea ona faatino le mea lea. E fautua atu ia tofia se Komiti Suesue. E le gata i lea o le Ofisa o Tupe. Pei lava ona ou fai atu a tatou faafou e le na o le tino a o le afi le mea taua. E fautuaina Tofilau, le Afioga i le Palemia le Minisita o Tupe tofia nei se Komisi, sa ou faalogo sa tofia ae teena. Ua ou fautua atu nei afai tou te alofa i le Malo i le atunuu, ua leva ona pologa, tofia se Komisi Suesue. O le alaga-tupe a le atunuu o lea e tauave e le tauau o le tagata e toatasi. E faapefea ona 159,000 o le atunuu e lei malamalama se isi, po o le a le finagalo o le Atua tatou te fetautauai e sue po o fea o i ai.

Ia vae atu le paia o le Palemene e faamalulu atu foi, leai ua leva ona asa mai le vao. Afai foi e tetele atu ia o lea ua fai atu e 12 tausaga o ou tautua i tai, na uunaiina au e sau iinei aumai faafitauli ma ou te lagona ia te au ma lou itumalo aemaise le atunuu. Ia manuia le Palemene.

Susuga TOGIA TALOA



Itumalo Faaalaalafaga:

Aiga i le Tai

Filifilia:

11 Mati 1982

Faatauto:

13 Aperila 1982

Lauga Faataupou:

2 Mati 1983

Lau Afioga i le Fofoga o le Fono ma le paia o le Palemene, le paia i le faafogafogaaga a le Ao o le Malo faapea foi le Sui Tofia, tainane foi le faafogafogaaga a le atunuu ia Samoa i Sisifo faapea Samoa i Sasae. E faamalulu foi i le faafogafogaaga a le atunuu pe a ou le oo i o latou paia, talu ai ona o le fia faasoina o le taimi, ae pau lava le mea tau ina ou faapenei, tulou, tulou lava o outou paia i o latou sa ma o latou faiga, o le aufai tatalo foi e i ai Ekalesia e fia e faatulou atu. O le a tatau foi ona ou manatua lou itumalo aua o lou timalo ua ala ai ona ou tulai atu i le nofoaga lenei. O le tapuaiga lava lea a le Toafa o alii ma le Toalua o tulafale, Sau ma Sauma, Aiga e lua ma upu ia Laupola, ia manuia le tapuaiga. Faafeai foi i le Atua o lena ua e siitia ai le viiga i le Atua ou te le toe agai foi la i ai, ae o le a ou agai loa e tusa o le Tala o le Tupe o lo o ua folasia nei i lumamea.

I lau matamata i le Tala o le Tupe ma lau suesuega i ai, masalo ou te toe foi lava i le saunoaga a le Sui lea sa saunoa faapea o se Tala o le Tupe o le matua faigata ma le ogaoga ma e matua oona ma inu gata. Ma o lau foi la tilotilo i ai ou te faaopoopoina i ai e faapea o se Tala o le Tupe soona fai ma le fai ma le lē alofa.

Ou te manatua saunoaga a le Tootoalii ae lei tulai mai i le tofi Palemia, sa faapea ai lana saunoaga e 2 mea taua i se faiga Malo, ae faapea le faasologa. 1. O le va fealoaloai ma le filemu o le atunuu; 2. O le Tala o le Tupe. E peiseai la ua ou aumaia lea saunoaga ona o le matuia o lau vaavaai i le Tala o le Tupe, toe faaopoopo la i lea saunoaga ia folafolaga fai ona faapea lea o lou mafaufau, ua faigata ona ou faavasega le Tala o le Tupe aua o lea ua feteenai nei ma mea lea na ou saunoa ai atoa ma folafolaga.

Na maua foi i lau faalogo faapea ia nisi Sui ua ala ona faapea le Tala o le Tupe ona o le tulaga o le tupe ua i ai nei. Ia, e le talia e lou mafaufau lea faaupuga faapea ua tele le aitalafu e le gata i totonu ae o fafo foi, aua o le mea muamua o nei folafolaga na fai ao silafia lelei le tulaga o lo o i ai le seleni a le Malo o Samoa.

O lona lua, o lo o i totonu o le Faamatalaga o le Tupe ua aafia le tamaoiga o Samoa ona o le tamaoiga o le lalolagi ua faaletonu. Ma ou te talitonu au e moni; e le faapea ua ou fai atu sa atoatoa le faiga Malo na tuanai atu nei sa taitaia lea e le Tofa Tupuola, leai e i ai o latou sese, e i ai o latou lapelapega, ae pau lava le mea ou te fai atu ai e le na o Samoa o aafia i lena tulaga. Sa ou manatua le tulaga o le tupe a Niu Sila i le 1980 e \$229,000,000 sa le mafai ona totogiina e Niu Sila i le

Saunoaga Faataupou a Sui Usufono 1961-2011

taimi lea i le 1980. Peiseai la a aumai le faaupuga lea e faapea mai ia te au ona o le leaga o le faiga Malo, ou te ioe i ai i lea vaega ae ou te le ioe atoatoa i ai.

O le pau lena o fefaatauaiga o le paleni lena a Niu Sila i le 1980.

Faafetai lava i lau Afioga a le Fofoga Fetalai, ae ou te faamalulu atu foi ua galo ona ou nofo i lalo. Ae faafetai i le fesili a le Sui mamalu. E \$229 miliona e peiseai o le mea lea na sili ai faatauga i lo le tupe na ave i fafo ae le faapea o la latou tupe faaagaga lea. E faamalalama atu ai i lau afioga ua malamalama le fesili.

Faafetai lava i lau Afioga. O le Tala la o le Tupe i lau matamata ma lau vaavaai i ai lau Afioga, peiseai la o le a agai muamua lau faamatalaga i le tau o le soifuaga. O lau fua i ai e tusa o se saunoaga a se tasi o sui i si toeaina ulu sina lea na ae i niu e lima ua ou iloa a fua la i ai e le 5 niu e a'e ai le toeaina a e o le a 7 i lau fuafua i ai.

Silasila foi lau Afioga ma le mamalu o le Palemene, e tolu siitaga o le tau o oloa lea ua ou vaavaai atu nei i ai, ae a fua foi i ai e tusa e 60%. O le soifuaga o le Samoa e faamoemoe i oloa mai fafo pei o mea taumafa ma lavalava. Ina ua ou vaavaai atu i le siitia o le soifuaga e pei lava ua fai sina mafamafa i lenei taimi. Ou te talitonu o le mea tatau ae peiseai a fua i ai i le siitaga muamua o le faalaitiitiina lea o le aoga o le tālā Samoa (devaluation) aua o lea lava e silafia e le aufai mafaufau ia lea tulaga.

O lona lua, o lea o le a fua le tiute i mea e tolu; o le tau o le oloa, inisiua atoa ma felauaiga. O lona lua lea o siitaga. O le tolu o lea foi la o le a toe sii le tiute faaopopo i le 8% i lo le 4%. E peiseai la ua fai sina matuia. A fua la i ai ma faapea e faatusatusa i ai le siitaga e tusa e 25% pe a laitiiti. O lona uiga la, afai o le tau o le oloa e \$100 afai e 25% e sii ai e \$125 o le a totogi. A faapea o le pick-up e \$10,000 o le a \$12,500, o le faatusatusaga lena lau Afioga ma le mamalu o le Palemene.

Ona oo mai lea i i totogi o Aoga. Ua tau sola foi sou manatu aua pei o le faamalalama a se tasi o Sui le Afioga a le alii Minisita e le aafia tua. E moni foi le saunoaga a le alii Minista ae ou te manatua o mea aoga e ui uma atu i le Ofisa o Aoga ma e oo lava i ai lea siitaga. O le totogi o totogi a le Malo po o galuega a le Malo e fua i le totogi lea ua i ai nei tatou, e \$5 lea e alu ai i fafo faaopopo i ai ma mea ta te alu ai e ave le kilia ua soo se Matagaluega lava e te ulu i ai toetoe lava a totogi tupe i taimi uma taimi uma lava. Pei la e foliga mai i i ua le o se Malo mo tagata ae peiseai o se Malo sue tupe.

O le totogi foi o le Malae Vaalele mo tagata fai mai, leai ou te talitonu ua lava ma toetoe finagalo faaalua i lea mataupu.

Ona ou see atu lea agai i tului o lo o sau ai i le Tala o le Tupe. Ou te talitonu au e na o se 10% o le atunuu e mafai ona toe sefe se tupe i lenei vaitaimi ae o le 90% ou te talitonu o lo o tau utiuti le seleni aua aoga a tamaiti faapea foi ma mea taumafa. E le faapea la ua ou fai atu ae pau lava le mea ia faautagia mai e le Afioga a le

Palemia faapea foi le Kapeneta ni manatu e silafia e aoga aua Samoa i le aso ma a taeao.

Ona oo atu lea o sau faamatalaga i lou itumalo aua mea e fia fai. E silafia lelei lava e le Afioga a le Minisita o Galuega lou tuitui atu e uiga i o matou auala. Pei foi ona saunoa nisi Sui i le taimi ua mavae, o tausaga foi ua fano e moe i le pefu toe ala i le pefu, le itumalo lenei. O lea foi ou te vaavaai ua tele tupe ia o lo o fuafuaina mo le eletise. O lou lava talitonuga e le oti se isi pe a le mumu eletise ae oti pe a Afioga e i le Minisita sei alofa ia toetiiti lava tupu se faamai i lo matou itumalo.

O auala, o fanua, e pei ona taua e se tasi o Sui i lana saunoaga i le taeao nei, a faatusa i ai e 25 taamu e ola i lalo o niu o lo matou itumalo. Ae le gata i lena o fanua e na ona oso atu lava tau i le WSTEC ua leiloa la e matou le mea o le a fai o lenei e uunai atu atiina ae a e leai se mea e mafai aua o matou e tua i le sami.

O le mea la lea e fia avatu ai se manatu, faamolemole sei afea nai o matou nuu i lena tulaga; a le faamatuu mai ni eleele o le WSTEC alofa o la e i ai eleele ia e fai mai isi o eleele o Falelatai ma Samatau.


O le tulaga foi i le Afioga a le Minisita o Falemai sei e tagai ane i lo matou falemai i Manono aua e silafia lelei lava le tulaga o Manono e faigata auala; a faapea la e i ai ni mai tigaina ou te iloa e oo mai le mai i Leulumoega po o Falelatai ua leai se ola.

O se tasi o mataupu ou te fia valuvalusia ai aa o le fau e tusa o lou itumalo sei tagai ifo i ai, o se mea e malolo i ai pe a faatali vaa i Manono-uta lea o lo o laina pea ma timuia. E lelei outou i Savaii o lo o i ai le uafu ma fale e malolo i ai ae o Manono e leai lava ma se mea e tua i ai.

Lau Afioga a le Fofoga Fetalai, masalo ua latalata lou taimi ae pei ona ou faapuupuu atu o le a ou toe foi i le Tala o le Tupe. Peiseai ua galo ia te au si vaega lea, aua i lau tilotilo i ai, e leai lava se mea faapea o fai mo le manuia o tagata na o le pau le mea lea e fai e totogi e tagata tupe. Na o sou manatu. Ai se a le mea na le faamama avega ai ae sii lafoga a pisinisi aua ou te vaai o lea e sii tau o oloa ma ua tele ai foi la latou polofiti, ae amo uma lava e le tagata-a-lautele lena siitaga? Ou te vaai foi i le Tala o le Tupe e le o talanoaina se vaega e uiga i tagata e le o faigaluega aua e pei foi ona saunoa nisi o lo o tele le au faalafua i le maketi i aso uma lava.

O nai ou manatu ia ou te folasia i lumamea ae pule lava outou o e ua fai ma taitai o le tatou Malo pe amanaia. Ia e faamoemoe la i le Atua e fesoasoani mai e tusa o le galuega. Ia manula lava le Fonotaga. Soifua.

Tofa VAILOLO FILIPO



Itumalo Faaalaalafaga:

Faas aleleaga Nu.4

Filifilia:

11 Mati 1982

Faatauto:

13 Aperila 1982

Lauga Faataupou:

2 Mati 1983

Faafetai atu i lau Afioga a le Fofoga o le Fono ma le mamalu o le Palemene, ua ou tulai atu foi e fia faaali se taofi e tusa ma le Tala o le Tupe ua taoto nei i lumamea. Ia o le a le magalo ia ia te au faaaloaloga o le teine o Sinaalesaele pe a oo ina laasia le paepae muamua o le Maota o le Tupu ma faapea ane, 'Tulou', seia oo ina laasia le paepae valu ona tootuli lea ma ifo ma faapea ane tulouna lau afioga a le tupu, tulouna lou pa'ia e ta'i, tulouna le paia o le Maota, tulouna lou taeao ma lou lagi e mama. I le o lau faatulou foi lea i le Maota ma Samoa ua potopoto, o le faatulou foi lea ia Samoa o loo faafogafoga mai i ona tulaga faalupelupeina i ona vaega eseese. O le Maota foi lenei, e leai se isi e uluai tofi i ai pe 'ale'ale i ai leaga o le Maota o le faautuga-tagai a Samoa, o le Maota o le aava, o le Maota foi o le filemu. A o lei agai atu sa'u faamatalaga i le Tala o le Tupe, e taua tele ia te au muamua i lo'u mafaufau lo'u itumalo ma lo'u nuu. O lea la, o le a ou tautala muamua lava i le vaega lea.

O mea e fia faalelei i lo'u nuu ma lo'u itumalo, o le a ou tautala muamua i eleele, i lau afioga a le Minisita o Eleele. Fuataga, o oe o se tagata atiina ae ma e te filifiliga foi e atiina ae le laufanua ma le eleele. O le sini taualuga foi o le Malo o lo o naunau ina ia mafai ona atiina ae le eleele. O gauta o matou i lo matou nuu o Lano, o loo ua faalava ai eleele tau papalagi ua leai se mea e tua i ai lenei nuu. O le talosaga, aumai la outou silasila i le vaega lea, leaga e tatau ona aumai se laufanua e tua i ai lenei nuu ma lenei itumalo. E le mafai ona manuia se nuu pe afai e tuafale i le papa, vae atu le upu e to ia te au, pe tuafale i eleele tau papalagi, e leai o le matafaioi lava lea a le Malo. Afai ua ave e papalagi le eleele lea ona o nisi mafuaaga ua le maua e lo'u Sui i lenei vaitaimi ma lenei augatupulaga, fai la e le Malo se auala e fai a'i le vaega lea ma foia ai le faaaitaui lea, avatu eleele sei galulue ai tagata ma atiina ae mai ma lagolagosua mai i le Malo.

Lua, o lo o ua i ai se faaaitaui tele i lo matou nuu pe afai e malosi tafega. O loo ua i ai se auala laupapa a e ou te le faaupuina o se auala laupapa. O lenei ala ua le lelei ona fausia e le tatou Malo, ma a oo ina malosi tafega ona oo lea ina lofia ma le nuu i tafega. O le mea la lea, lau afioga a le Minisita o Galuega, sei silasila lava faamolemole i le vaega lea, ma le faaaloalo. Afai e le o gafatia i mea tau tupe a lo tatou Malo i lenei taimi ona fai se auala laupapa fou, aua o le mea lea e tatau ona fai se ala laupapa fou, e le o lava la le lapopoa o paipa ia,

vae atu o le upu e to ia te au, o loo alu ai le suavai i tai i le sami. E tatau la ona avatu ni paipa lapopoa tau ina faanofo ai i lenei taimi seia foia ai le faaaitaui o loo faafeagai ma lenei nuu, ma faaoo ma le tatou moli i le nuu o Puapua i le vaivao. E lelei lava le faatau lelei le tatou moli i le mea e ao ona gata mai ai, ia mumu foi lena vaega o le Faasaleleaga.

O le agai mai o sa'u faamatalaga muamua i lenei Maota. A o o'u talitua'a mai tua ma taputapua'i mai i taimi ua mavae ma fatia ua sola, i le liuliuina o le tofa ma

1 e faautaga i lenei Maota, i tuua ma pupu-toa ua mavae, o le a lava le tuga ma le lavelave o se mataupu, e ave ave lava e matala ane lava ua taoto i paga ma taoto i tulaga matagofie. A e a manatu foi i nai na tuua, e leai leai lava ni Polofesa na i ai, leai ni tipiloma maualuga, e lei iu foi i ni Iunivesite sa iu lava i aoga faatauva'a i si o tatou atunuu. A e a manatu atu i le fusia o le tofa ma le faautaga i le va fealoaloai, o se mea lea e sili ona pele ia te au, ma o se mea maualuga lava lea ou te talitonu, e ao lava ina tauave pea e lenei Maota. Aua afai a e oo ina tulai mai o tulaga vesia, o le le maua o le nofo fealofani ma le le maua o le toafilemu, e vevesi Samoa. O le mea lea, ia mau pea le toovae i totonu o lenei Maota, ina ia mafai ona masuiga malie se mataupu tuga a e filiga aua Samoa.

Ou te fia tautala muamua i Faiga Palota. E le o toe po se lilo i le faafogafoga a le Maota atoa ma le atunuu, ua ave ave lava nei mea o palota tauau lava le atunuu a masoe, vae atu lava Samoa. Atonu e i ai aso o loo agai mai o le a tatou matauina ni tulaga faigata e sili atu ona faigata o le a feagai ma le atunuu. Ua oo lava ina femisaa'i itumalo ua tau lava nisi itumalo i mea nei o faiga palota. Lau afioga i le alii Palemia, ou te avatu sa'u talosaga e faapea – Toe sasa'a lava le fafao i faiga palota, atonu e le maua gofie se vaifofo, a e ua ao lava ina saili se vaifofo i le taimi lenei aua a tuu fau, ia o lena ua ou ta'u atu, e oo lava ina masoe le atunuu, pe o le a tupu mai ni faalavelave matautia tatou te le mananao ai. O se taofi agai i le vaega lea, pe le o fai si umi o le va foi lenei o faatulai ai le faauluina o Sui, aua o le tulaga lea e i ai faale-tulafono e tolu masina; Pe le sili ona faavave fai le faiga palota ona foia lea o mau faaaitaui, foia le faaaitaui o le faatosina, ma nei lava mau vesiga tatou te matauina. O le mea, ua le toe natia, ua matua masoe lava Sui e o i le faiga palota, ua matua masofa lava i faiga a le atunuu, a o le atunuu foi latou ua matua leai lava se isi e poi, ua le toe fefe foi se isi i le Atua. O tulaga matautia ia ua aliali mai i faiga palota. E ao lava ona tatou saili se vaifofo, ia pe le tau ane lea vaifofo, ou te tau ta'u atu e au, aua le taumafai pe sui le tulafono pe a fai a e mafai a e vave fai le faiga palota aua le falo umia, vae atu le paia o le Maota.

Lua, pe lei oo ia i le taimi lenei tatou te silasila mamao ai, pe le sili ia ona toe faaopoopo atu tausaga o nofoaiga? O le mea lea e matauina, ia e ave ave o se tolu tausaga le nofoaiga, aumai a latou fuafuaga, e uma ane le nofoaiga a ua faatoa amata ona faatino na fuafuaga, ia pe le taitai

foi ona mae'a ona faatino. Pe lei ono tatau la i lenei taimi ona toe silasila toto'a le Maota po o le a se auala e mafai ai ona faaopopo tausaga i mea ia o nofoaiga faa-Palemene. Afai e fa, lelei, lima lelei.

O le isi fautuaga, pe lei oo ina alagatau ona palota maia o tatou tagata mai fafo e pei ona fai i nuu mamao? Pe lei oo ina alagatau ona palota mai o tatou tagata mai Niu Sila, tagata ua faamaonia o latou matai? E faigata i lou mafaufau i le taimi lenei ona iloa se auala a e ou te manatu ua alu lava aso ua agai i luma aso o le soifuaga. Ua le o toe taugofie foi ia i latou ona malaga mai e palota, ua fai foi sina fita. Ia ma le isi, pe lei lelei foi ia i tatou i Samoa nei a e maise i matou i Savaii ona faia ni nai fale Palota iinei i le aso o le palota ina ia sefe ai le faimalaga ma faafoia ai nisi mau faafitauli e aliali mai.

O le a agai mai se manatu i le Tala o le Tupe ma ou te faalogologo mai lava i aso ua mavae e masani lava foi lele ona faapea seisi sui faamalo, faafetai ua vivii, vivii a e iu ane ia vae atu le upu e to ia te au ua fana tutui le Minisita o Tupe. A e lelei ona ou faapea atu ua taligata i lou mafaufau le Tala o le Tupe i sau faaupuga, e lei lelei ona tapena. Ia o le mea lava lea ua tupu, o lea ua oo ina aliali mai i le tatou Tala o le Tupe i le tolu faiga-malo i le tausaga. Aua ou te manatu ana lava le vaisua e tapena ai le Tala o le Tupe ou te lagona lava o se Tala o le Tupe e aupito sili ona manaia ma matagofie ma lelei. A o le faalavelave ua utiuti le va ua faia ai le Tala o le Tupe, ona iu loa lea ina faatumutulima ma ta'eta'ealuga. Ou te lagona o se fautuaga tele mai fafo lea ua sau ai le Tala o le Tupe lenei. O fafo o a latou lava fuafuaga masani, o fuafuaga a le Faletupe lea o le Va o Malo e tuu lava e latou i le mea latou te lagona e lelei ai latou, a e faale-manaia tele tulaga o loo i ai le atunuu. Sa tatau ona aumai le latou fuafuaga e fuafua toto'a e tatou, fua i le mea lea e soifua ai le Samoa, aua le fuaina i le mea o loo soifua ai tagata i nuu la. A aumai iinei ia tatou fetuutuuna'i fua i le malos, fua i le tulaga talafeagai o i ai le atunuu, pe vaivai pe malos. Afai tatou te iloa e aumai se fautuaga, e le talafeagai e ao lava ona ave le mea tatou te iloa e lelei ai o tatou tagata. E le faapea foi o le a tupu ai so latou faagaulemalie ona tele lea o ni mea o le a oo ina latou fanafana mai ai i tatou. O lenei foi upu faapea o le luma lea sa ou faalogo foi o agiga i lenei Maota, ia o le luma le 13 miliona a o nuu la, e oo i nuu tetele o Amerika o la e nofo aitalafu e tai fia piliona ma miliona i latou...

O le vaega la ou te lagona e fia agai i ai se faamatalaga o le vaega lea i tagata faigaluega a le Malo.

O lea ua tulai mai nei le tatou Tala o le Tupe o le a le siitia o latou totogi. Ou te lagona o se lagona taligata tele lea o loo i ai nei tagata aua foi o le mea ua sili ona taligata ma faigata o lea ua tatou nonofo nei ma sii i luga le tau o le soifuaga, sii lava matua maua le mea o le a oo i ai, a e le siia o latou totogi e tau faapaleni ai le tau o le soifuaga. O se mea lava lea ou te lagona e taligata tele i le tau o le a i ai. Ma ua tafafao foi taliga o Tufugauli...

Ia lelei atonu o la e faafofoga mai tagata faigaluega o le Malo ma le vaega la lea. A e o le mea moni lava e le natia, o lea lava e aave tala o lea e i ai le faagaulemalie o tagata faigaluega a le Malo. Ia o lenei la na ona matou faamanatu atu faapena, ina nei ave ave nei le tou mataupu a e oo ina tutupu mai ni pefea ona lafo lea o le uluulu o le laau iina, a e lelei lava le matou tuitui atu o le papaga ma avatu se faufautuaga.

O le vaega lea o Tauofoga – O le mea lea o le tauofoga i sou taofi, e lelei le sini o le faamoemoe na ala ai ona faatulai. O le fua taua lava o le faamoemoe lea ou te lagona e lelei, o le lelei ina ia taumafai ai ona faapa'u. A o le faalavelave e tasi, o lea ua tupu mai ai nisi faafitauli e matua lasi lava ma tele. O le aoa o le lou taofi ou te naunau pe sili ia ona faapafala le mea lea o le tauofoga, a e sili ia ona tuu i le faitalia o le tagata ia. E lelei le i ai o le oloa a o la e maua foi ma le tupe, a e leaga le i ai o le tupe a e leai se mea e mafai ona faatau. E lelei ona toe tuu le avanoa i le au-faipisinisi ma le atunuu ma e o loo latou okaina. Ou te lagona o mea nei e la'u mai nei vae atu le paia o le Maota, e faigata foi le atunuu ona tau atu a e le o ni mea e ono lelei tele mo le soifuaga. E ao lava ona tatou magafagafa foi i le vaega lea, e lelei e pa'u, a o ona tua foi la e ao ona tatou silasila ma tatou magafagafa i ai.

Sa agai atu foi sau faamatalaga ananafi i lafoga nei o le Malae Vaalele. Sa talanoa foi ma e o loo vaaia lea vaega, ua tele lava lo latou le fiafia i lenei mea. Ia ma tatou lagona foi lava e moni so latou faagaulemalie, a e sa i ai le fuafuaga i sou lava taofi, afai ua aumai a ua mamafa le vaega lea o le lafoga o le malae vaalele, pe le sili ona tuu i totonu o le pasese le \$20 lea, ona mama lea i le faalogoaga a le tagata. A e a tuu matilatila mai le \$20 o le vai tuli-aitu lava lea i tagata e omai i le tatou atunuu. E sili ai le tapuni faletalimalo ia e i ai iinei, aua foi, a fua i ai, ia e le tele foi ni a tatou faatosina lea e ala ai ona omai tagata tafafao, a e a toe mamafa atu ma le vaega lea ia ou te lagona o le a matua segisegi lava tagata, o le a le lalata mai iinei, a o lea foi e loma la tatou taaloga o le Pasefika o le matua aafia lava o tagata i le vaega.

O le mea la lenei ua ou faaoloolo maau atu ai pe le sili la le fuafuaga lea e tau ta'u atu i sou manatu pe le sili ona momono i totonu o le pasese atonu lava e mama le vaega lea, a e a tuu ai pea ia e leai e sili ona taatia ma aua le faia.

Ua matauina e lou tagata le Ofisa lea o Femalagaiga, o se vaaiga faanoanoa ia te au le tulaga e i ai le ofisa lea, ua toetiiti lava lavea se isi i se taavale. A oo lava ina pisi ma ua matua tumutumu le atunuu i femalagaiga, e oo lava i fafo i le auala tele ua laina ai tagata, vae atu le mamalu o le atunuu. O lau afioga la o loo faafeagai ma la lea vaega, pe le sili ia pe a toe silasila pe le sili ona toe fau lelei le fale a e fai se fuafuaga, ia fau lelei ni nofoaga e alaala ai le mamalu o le atunuu. Ta te alofa i le mamalu o le atunuu a oo ina timu ia e faapena lava ona aafia ai. A e sili pe le lelei ia ona fai se isi fuafuaga agai i

Saunoaga Faataupou a Sui Usufono 1961-2011

ai pe ave foi le Ofisa lea o Femalagaiga i se fale e fai se fale lelei e see i ai.

O le isi lea vaega ma o lea foi sa laga e nisi o Sui ia e momomo lava foi le agaga ona o nai fanau aooga. Ia ou te le toe tau talau atu le fetogi aluga o folafolaga ma na tulaga aua ua agiga foi i le Maota lenei, pau lava le mea, alofa i le avega o le a toe fafa atu foi ia i latou toe faapena, fa'i o lena a o le faiga o faleaoga ma mea eseese faapena.

E toe lua ma le faaaloalo lava. O le vaega lea e pei ona i ai le lagona, e ao lava ina toe silasila totoa le Malo toe fai se faatatau agai i ai i o matou faleaoga nei, o loo i nuu i tua, ona o lenei lava e tigaina matou e fai. E faalelei e matou faleaoga, ma fai uma mea i tulaga faapena vagana lava Faiaoga e totogi e le Malo. Pe le sili foi la ona faapea ona fai tamaiti aoga nei o loo ave i ai le tupe a le Malo pe le sili ona faapena ona fai a e o ifo e o loo tau-malae ma i latou o loo aooga ai a latou fanau e fau faleaoga, fau e latou ma faalelei e latou ona mama lea o le avega o i ai i le Malo ma le tau faatupeina.

O aoga ia a lotu e pei ona taua ai se faatusatusa, ia leaga o la e lava e gafa i latou ma le faatupeina o le totogiina o Faiaoga ma i latou uma. E tele lava le vala ma le eseeseega.

Lau Afioga i le Fofoga Fetalai ona pau ia o nai manatu o se sao ua avatu i lumamea. A i ai foi se upu ua lape ia tau ia ina ia aua le faitauina i so outou finagalo aua si au faaoloolo maau, leaga e tele le tatou galuega. E lelei lava le tatou lagolagosua faatasi aua a tatou galulue pitovaa ia ona faaletonu lea o le atunuu. Manuia le Fono.
